

АҲМАД АЪЗАМ

АСҚАРТОҒ ТОМОНЛАРДА

Қисса

*Ўз вужудингга тафаккур айлагил,
Ҳар не истарсен —ўзингдан истагил...
Алишер Навоий*

Йў-ўқ, турмушимдан кўнглим тўлмай, ҳаётдан норозилигим ё ишларим юришмай, шу яшаётган жойимда ножойлигимдан эмас, нимаданлигини ўзим ҳам билмайман, тушунтиришим қийин, аммо мудом нималарнидир қўмсайман, аллақаёкларга кетгим, ўша ёқларда ўзимга ҳам номаълум ишларни қилгим, бу ишлардан кўнглим тўлиб, кўкрагимни мундок бемалол қўтариб юргим келаверади, лекин ҳеч қаёққа кетмайман, бирон нарса тўғаноқ бўлганидан, кетолмаслигимдан эмас, ўзим, ўзим кетмайман, эҳ-ҳ, кетсамми, а, дейман, кетвортсамми, а, дейман, кетсам—зўр-а, дейман, кўзимни юмиб, ўша борар жойимдаги ажойиб ҳаётни, ўзим амалга оширадиган ажойиб ишларни хаёл қиласман, ҳозир шундоқ ўрнимдан тураман-да, кўчага чиқиб, ўтаётган бирон машинага қўл қўтараман, деб чоғланаман, ҳаёлимни бири биридан баланд, ширин орзуларга тўлдириб энтикаман, аммо учишга шайланган қанотларимни елкамга маҳкам жипслаб, ўрнимдан қўзғалмай ўтиравераман—бир туртки, бир ҳаракат етишмайди, кетай-кетай деганимда ичим ҳувиллаб, бўм-бўш бўлиб қоламан.

Тонгда уйғонаман, бутун борликни маҳв этиб, лак-лак, минг-минг туман қўшиндай бостириб келаётган музaffer, устивор нурлар деразадан ёпирилиб киради, кўнглимга бир яхши, қудратли режалар қўйилади, сакраб туриб шу ишларни бошлаб юборай дейман, ҳозир, мана, ҳозир туряпман, турдим, деб шайланиб ётавераман, тонг тамом

отади, бутун атроф ёришади, офтоб ҳам ёйилиб, нурлари ҳам бояги устивор маъносини йўқотади, ҳали ҳам ётган бўламан, бир маҳал — энди ётишга имкон йўқлигидан, шуурсиз ҳолда кўрпадан чиқаман, ҳеч нарсани ўйламай кийинаман, бирдан турмуш ташвишларига ўраламан, рухим сўлишиб, кўчага чиқаман.

Кўчага чиқиб кўраман: ҳамма яқдил бир оломон бўлиб, қаёқларгадир — мен боролмайдиган томонларга отланган, бирбирини танимайди, лекин бариси ҳам ўша томонларга кетяпти.

Тушда кўчага қарасам ҳам, кечда қарасам ҳам шу ахвол: ҳамма бир ёкка, мен билмайдиган томонларга кетяпти.

Биродарлар, нега мени ташлаб кетяпсизлар, дегим келади.

Давраларда ўтираман, сұхбатларга қулоқ тутаман: яқинларим, дўйстларим ҳам мен кўрмаган нарсаларни гапиришади, менда йўқ ташвишларни айтишади, ҳатто уйларида хотин билан ғижиллашганини ҳасрат қилишса ҳам, гўё мен билмайдиган, менга насиб этмайдиган ажаб саргузаштларни нақл қилишаётгандай, ғалати ахволга тушаман, атрофимдаги одамларнинг ҳаммаси янги, дунёга эндини келиб, барча нарсадан ҳайрат топишаётгандай, ўзим эса эскириб қолгандай, тобора эскириб бораётгандай бўлавераман, ҳаммасига ҳавасим келади.

Нега — билмайман.

Ниманидир йўқотгандайман, нимадир етишмайди менга, лекин нима шу—билолмайман, бир ёқларга кетгим келади, бу истак ҳозир қилаётган ишим, жуда тўкин-сочин бўлмаса-да, ҳар тугул, бошқалардан ҳеч ками йўқ турмушимга нисбатан ғалати туюлади, яна нима керак экан менга, деб жуда кўп ўйлайман, ўйимни тополмайман ичимда нимадир секин-секин, жуда секин, билинтирмай нураб бораётгандай, дарров бу нурашни тўхтатишим керакдай, юрагимнинг аввалги шаҳди пасайиб, гавдамдаги куч аста сизиб тўкилаётгандай, ўзим эса ҳамма нарсага кечикиб яшаётгандай, чора излаб қоламан, тезроқ-тезроқ, дейман, шошиламан, улгурмайман, ортга қайтаётгандай бўлавераман.

Мени олиб кетгани сарҳад ортидан етмиш-саксон йиллик йўлга чиққан оқ от энди соат сайин, дақиқа сайин жадаллаётгандай, тобора

тезроқ йўл тортиб келаётгандай бўлиб, ўзимни омонат билиб қоламан, дунёни, оиласми, ишхонамни, одамларни, теварак-атрофимни ўзимсиз тасаввур қилиб кўнглим бузилади...

Бундан кў-ўп йиллар олдин Баҳри Муҳитдаги балиқ овловчи кемаларга одам чақирилаётгани, хоҳловчиларнинг шу ўзимизнинг шаҳардаги фалон кўча, фалонинчи уйдаги идорага бориб ёзишилари мумкинлиги хақида эълон ўқидим. Қани эди, мен ҳам узоқроқ жойларга бориб келсам, деб юрган кезларим эди, эълонни ўқиб қанот боғладим: жуда осон экан — бир мавсум, уч-тўрт ойга, ўша идорага хужжат топширсам, идора менга йўлланма берар чипта тўғрилар экан, ҳайт, Баҳри Муҳит, қайдасан, деб кетаверар эканман! Жуда боргим келди, бормоқчи бўлдим, тумшуғи билан тўлқинларни ханжардек тилиб сузаётган баланд кемани, кеманинг устида оёқларимни кериб, кўм-кўк лопиллаётган сувларни ол шафақ рангига бўяб ботаётган күёшни томоша қилишимни қўз олдимга келтириб, тинчим тамом бузилди. Нима бу — ит ётиш, мирза туриш, ижарама-ижара сарсонлик, шу ҳам яшашми, кетаман, бориб дунёни кўраман, сайру саёҳат қиламан, баҳонада уч-тўрт минг ишлайман, келиб эскироқ ховличами ё бир хонали кооператив уими оламан, деб ўйла-дим. Бир бош, бир қулоғим, ташлаб кетишга кўзим қиймайдиган севгилим йўқ, бор бисотим битта кўрпа билан ўттиз ҷоғли

китоб, ихтиёrim бирорда эмас, қишлоқдаги онам бўлса, уч-тўрт ой бу ерда бўлмаслигимни билмайди ҳам, иши кўпайганидан келолмаяпти, деб юраверади — Баҳри Муҳитга кетиш ниятим аввалига шундай жўяли кўринди. Лекин у бўлиб, бу бўлиб, ишхонамиздан икки қадам наридаги ўша идорага ўтмадим, эртага, эртага билан кўклам ўтди, ёз ҳам келди, шайланиб юравердим, кейин ким-қайдан қанақадир сабаблар чиқди, кетсам, буёқдаги нарсалардан куруқ қоладигандек бўлавердим, Баҳри Муҳити қочиб кетмас, келаси йили ҳам одам чақирав, жуда шунақа зўр жой бўлса, ўн минг чақирим узоқдан одам сўрайдими, ҳеч кимнинг кўзи учиб турмагандир-да, аввал диссертацияни тутатиб, уёқ-буёғимни йигиштириб олай, кейин кўнгилхотиржам, bemalol бораман, деган ўйлар чиқди, бу гаплар кетиш хомхаёлидан ҳам пишиқроқ кўринди.

Мана, ёқлар ҳам, уйланар ҳам эканман, уйли-жойлиман, хотиржам, бемалол бўлишим керак эди, аммо қўнглим нотинч, йил ўтган сайин ўртанаман, қаёкларгadir кетгим келади, гўё хазинага кириб, ҳеч нарса олмай, олгиси келмаганидан эмас, қадрига етолмаганидан қуп-қуруқ чиқаётган одамдай, турмушимни қайтадан бошлагим, қайта бошдан ёшариб, боролмай қолган жойларимга боргим келади, режалар тузаман, аммо ниятимнинг ўзи ҳам ишончсиз чиқади, қўнгил шуни қўмсаяпти, деб, хе йўқ, бе йўқ, мақсад-бемаксад бирон ёқда жўнаб қолишни калламга сифдиролмайман, аммо истакни ҳам ўлдиrolмайман, узок-узок юртларни кезиб қайтган одамлар гурунг бериб қолса, кўксимда юрак эмас, бир чангат увада булкиллаётгандай, бўшашиб қоламан.

Гўё кимлардир — менга жуда ишонган одамлар узок йўлга умид билан кўзатиб қўйишган-у, энди мен уларнинг ишончларини ўлдириб, йўлнинг ярмида капа қуриб олиб, нарёғига юргим келмаётганидан, мендан, умуман инсон зотидан умидлари қайтиб, норози қараб туришгандай...

Офият—ҳиндшунос, ўқиётганида ўн ой Ҳиндистонда амалиёт ўтаган, ҳар замон-ҳар замон ўша вактлари килган томошаларини гапиради, менга Ҳиндистон фақат томошадан иборат бўлиб туюлади, аёл боши билан шундай ажойиб нарсаларни кўрган-а, деб хотинимга ҳасадим келади, хотираларини сўзлаётганида ўзимнинг қашшоқ, қизиқарсиз одамлигимдан қўнглим чўқади.

Одамнинг табиати шундай: агар ҳамсуҳбатингиз қандайдир мухим, қизиқарли бир нарсани хикоя қилса, сизнинг ҳам шундай қизиқ гапларни айтгингиз, латифасига латифа билан жавоб қайтаргингиз келади, ундан қолишмасликни истайсиз, бордию шундай гапларингиз бўлмаса, ҳамсуҳбатингиздан катта қарз олиб, бу қарзни қайтаролмасликдан эзилиб ўтирган одамнинг аҳволига тушасиз. Мен Офиятнинг Ҳиндистонни эслашларига teng нимани ҳам гапираман, ха, зўр, жуда ажойиб яшайди бу ҳиндулар, сигирни худо билишади, жонзотга озор беришмайди, ўқиганман, тарихи жуда қадим дейман, ичимдан зил кетаман, унга бағрим торлик қилаётгандек, ўзимни унга номуносиб билиб, шундоқ ажойиб аёлни

алдаб хотин қилиб юргандек бўламан.

Калькуттани айланиб юришганда, тўсатдан шов-в этиб жала қуибди-да, бир пасда ҳамма ёқни сув босиб, кўчалар тизза бўйи бурқираб оқа кетибди. Муссон дегани шунака — бир ёғишда дарё-дарё сувларни тўкиб ташлар экан. “Бир вакти кўчага қарасам!.. Одамларнинг ҳовлисидан ифлосгача ювиб чиқибди. Шундай уялдим! Йиғламай дейман, кўчага кўзим тушиб яна йиғлайман. Бир дўконнинг олдида туриб қолдик, на уёққа юриб бўлади, на буеққа. Мен билан бирга... юрган киши оқ шимини тиззасигача шимариб, мени кўтариб олди. Баттар йиғлайман, у киши бўлса, зарари йўқ, Офият, ювса кетади, сув ҳамма нарсани тоза қилади, деб ғулдирайди. Шу киши ёнимда бўлмаса-ку, э-э, ўлсин шу ёмғири ҳам, деб қўл силтардим. Қиз бола, ёнингда эркак одам туриб, атрофинг тўла ифлослик бўлса, жуда уялар экан...”

Институтдаги ёшлар Наманганга — Нишоналининг тўйига борган эдик, қайтаяпмиз, вагон тикилинч, ётишга жой йўқ, сиқилишиб ўтирибмиз. Офият иккимиздан бошқа ҳамма уйқуда, дунё ухляяпти, фақат иккаламиз бир-биримизни кўриб ўтириш, дилдорлик қилиш учун ўйғокмиз. Ширин мудроқда кўзим кетиб, ўзимни Калькутта кўчасида, ёмғир ёғаётган илиқ кечада, Офиятни кўтариб кетаётгандек ҳис қиласман, унинг соchlаридан келаётган жуда ингичка бир хиндий мушк иси бошимни айлантиради, кўкракларим кенгайиб, мушакларим таранглашади, тобора кучли бўлиб бораман, Офият бошини елкамга кўйиб, тўхтаб-тўхтаб чуқур-чуқур нафас олганча ўша ёмғирили Калькуттани ҳикоя қилади, ҳар замон-ҳар замон деразага лопиллаб урилиб ўтган чироқлар ёруғида кўзларидаги ёш ярқ этади, таъсирланиб ўтираман: аёл киши одамни ўзига яқин олмаса, хусусан хотирасини, айниқса уялган ҳолатларини, яна кечаси йиғлаб гапирмайди. Офият шу куи—боши менинг елкамда, гапириб-гапириб ухлаб қолди, салдан кейин мен билан кўп марта шундай ўтириб, ўрганиш бўлиб кетгандай, иккаламиз ўртамиизда одатга айлангандай, уйқусида, кўзини очмай, табиий ихтиёри билан қўлимни елкасидан ўтказди-да, қўлтиғимга кирди, бошини кўкрагимга ўнғай кўйди, уйқум учди: ҳозир Офият ўша Калькутта кўчасини, ўзи

күтариб олган ўша одамни туш кўрмаяптими, уйку билан мени ўша одам деб ўйлаб, қўйнимга кирмаяптими?

Калькутта фақат хотирами? Ким эди ўша одам Офият учун?

Биламан, бир чегара бор, Офиятнинг мен билан танишгунга қадар, балки танишганимиздан кейин ҳам, мен билмайдиган, эхтимол билишим иккаламиз учун ҳам яхшиликка олиб келмайдиган бошқа бир дунёда яшаганини, ўша дунёning сарҳадлари тўйимизда адокқа етганини, ўзига яраша чиройли бир қизнинг ҳали танимаган, дарагини ҳам эшифтмаган, дунёда бор-йўқлиги номаълум, учратишини фақат тақдир-тасодиф белгилайдиган бир йигиттга ўзини атаб, яккаш уни кутиб, ўзига гард юқтиромай яшashi мумкин эмаслигини, табиийки, унинг кимдир аниқ йигитлар билан гаплашгани, сўзлашгани, ўртада дўстликми, қадрдонликми, эхтимолки, севгими бўлганини тахмин қиласман. Ҳиндистон хақида гапираётib, у ерга бордик, бу ерии кўрдик, овқатни қизил қалампир билан

қовуришар экан, зўрга едик, деган пайтларида ҳамиша ёнида “бирга юрган киши” бўлганини, гапириб бераётган воқеалари кемтик, чалалигини, ўша кишига тегишли жойларини ташлаб ўтаётганини, хотираларига халал бериб турганимни кўнглим сезади—унинг қизлик ҳаётидан хотиралари сарҳад ошиб, менинг кўнглимга ҳам шу тарзда мубҳам сезимлар, асосли-асоссиз раشكлар солади, бир вақтлар ҳали тақдирини билмаган, ўзига суюнчик, умрлик йўлдош ахтарган, бошчисиз, эгасиз, кўзига яхши кўринган йигитдан умидини излаб юрган қиз нарсанинг аҳволига юрагим ачишади, баъзан-баъзан чой устидами, гаплашиб ўтиргандами, радиодан ашула тинглагандами, йўл қараб қолган пайтлари Офиятнинг айни шу тобда узок-узоқларга кетиб, ўша дунёда ҳали менга турмушга чиқмай, мени ўйламай, менсиз эркин, озод яшаётганини кўзларидан кўриб тураман...

Одамнинг умри тасодифлардан тўқилган. Мен адабиётга қизиқмаслигим, адабиётни деб вилоят марказига ўқишга келмаслигим, келганим тақдирда ҳам, имтиҳонлардан йиқилиб ё мандатдан ўтолмай, қишлоққа қайтишим, бошқа бир касбнинг бошини тутиб, ҳозир бошқа жойда кун кўриб юришим ҳам мумкин эди. Лекин, ҳарчанд уринмай, ҳозирги юриш-туришимдан бошқача,

ўзимнинг шу кунда бошқа жойда ўзга бир иш билан машғул бўлишимни тасаввур қилолмайман. Шундай ўйласам, хаёлимда ўзим эмас, буткул ўзга, юз-кўзи, қадди-басти менга ўхшашиб, аммо тамомила бегона одам гавдаланади, ҳаётим худди шу тарзда ўзгариб кетганда, мен йўқолиб, ўрнимни етти ёт одам эгаллаши мумкиндай. Ҳолбуки, биламан, ўқишга киролмасам, дунё тугаб қолмасди, ўлмасдим, ўлмаган қул -кўраверардим, аммо ўзим бошқа, хотиним бошқа, демакки, болаларим бошқа... қандайдир ақлга сифмайди, босинқирашга ўхшайди: Офият билан эмас, ҳозир етти ухлаб тушимга ҳам кирмаган аёл билан бир ёстиққа бош қўйсам, уйимда Комрон, Малика, Ботир эмас, бошқа болаларим ада-ада, деб турса, улар ҳам қуйиб қўйгандек менга тортса, бу болаларимга эса бегона бирор оталик қилиб юрса... Мен Офият билан топишмасам, шу болаларим дунёга келармиди?

Чархи кажрафторнинг ройиши сал ўзгариши билан шундай булуви ҳеч гап эмас эди-ку!

Ўйлайман, жуда оддий, қўникиш бўлиб қолган нарсалардан ажабланаман.

Ўша, енгил автомобилни кўрганда, “Луккавой” келди, обкетиб қолади”, деб гувва қочган болакайларнинг тўдасидан қандай ажралиб чиқиб, бугунда доцент Маҳди Ашрапов бўлиб қолдим? Маҳди тракторчи, ё сувчи, ё, боринг-чи, газета-журнал ўқишини севганим учун почта мудири, қишлоқ муҳбири Маҳди Ашрапов бўлиб қолишим ҳам мумкин эди-ку!

Бир ўринга ўн олти киши талашиб турганда уч-та “учу” битта “беш” билан институттага қандай илашиб қолдим? Киришимдан кирмасим тайин эмас эдими?

Институтни битирганимдан кейин саккиз йил ўтиб факультетга борганимда Бердиёров домла яқинда кандидатликни ёқлаганим, “ўзидан ҳам ўзиб”, пойттахтдаги “мўътабар даргоҳда” дарс бергаётганимдан азбаройи қувониб, ўша — ўн икки йил олдин “беш”ни қандай қўйганини айтиб берди, мен буни омаддан деб юрардим, фавқулодда ҳодиса — шунгача эсида экан: “Қанча болалар йиқилиб кетди! Буйруқ шундай: йиқитасан, мунчадан мунчасини!

“Беш” қаёқда—қатағон! Фақат алоҳида рўйхатдагиларга, шунда ҳам ректор кўрсатма берганларга! Сиз жавоб беряпсиз, мана, бунақа: кўлларингизни силкиб, бошингизни орқага ташлаб. Мен эса бошим қотиб ўтирибман: бу болани йикитиш ўёқда турсин, унга “тўрт” қўйиш ҳам ноинсофлик. Эсингиздами, айни шеър ўқиётган вактингиз Абдураҳмон кириб қолди, ўзининг одамидан яна биттасини пишиқлаб қўймоқчи эди...”

Кечагидек кўз олдимда: жавобларимни қовоқ ууб, вазмин тинглаётган Бердиёров ўша Хўжаев кирганда бирдан ўзгариб, ошкора, ҳатто бир озириб ҳайратлана бошлади, бошини сарак-сарак қилиб, худди новвотчойдан роҳатланаётгандек, “оҳ-оҳ”, деди, айтиб бўлганимдан сўнг, иккинчи — тилга оид савонни, қовун туширишимдан чўчиб, гапиртирмади. “Бўлди, ука, раҳмат, кетаверинг”, деди. Имтиҳон тугаб, баҳоларни эшиттиришгунча, бўларим бўлди: “Раҳмат, кетаверинг”, деган бўлса, всё, жўра, келаси йил келасан, депти”, деб ақл ўргатганлар ҳам анча топилди...

“Абдураҳмон кириб қолмаганда, таваккал қиломасдим...”

Мени мандатдан Бердиёров қўйган ана шу “беш” олиб ўтди. Мандатга думаламай бир юзу қирқ етти бола етиб келган эдик. Аввалига комсомол ташкилотининг секретари Тўғизбоев бештабештадан эллик болани тез-тез чақириб олди, шу билан эллик ўриннинг ҳаммаси тўлди, эшик ёпилди, кирганлар қайтиб чиқмади, тўқсон еттитамиз бир-биrimизга мўлтираб, гўё ичкаридаги мандат комиссиясига тепадан: “Ташқаридағи бечораларни ҳам олинглар, ноумид кетишмасин！”, деган ваҳий тушадигандай, умидимизни узолмай, бўйнимизни чўзиб тўрт-беш соат мустар туриб қолдик Бир вақти эшик очилиб, Тўғизбоев эмас, қабул комиссиясининг масъул котиби Абдураҳмон Хўжаев чиқди: жувва эшикка ёпирилдик. Юрагим ховлиқиб кетди: шу оқшом туш кўрган эдим, тушимда ётоқхонада бирга турадиган амударёлик Рамон икковимиз бизнинг қишлоқда янги қурилган водопровод минорасига тирмашиб чиқибмиз, мен чиқсан жойимда тойиниб кетиб, зўрға панжарасидан тутиб қолибман, кунбўйи шу тушимга ишониб турибман, кеча Рамон биофакка мандатдан ўтди, бугун мен, бир тойиниб бўлса ҳам, ўтишим

керак, энди Хўжаев мени чақириш учун ўзи чиққан, ҳозир мана, мана, мени чақиради, “Ашрапов Маҳди！”, дейди!..

Хўжаев эса эрталабдан бери қайта-қайта оти чиққан Солиҳова Назира деган қизни сўради, унга яқин турганлардан, зора менга ҳам эътибор қилиб қолса, деган умидда “Солиҳова Назира! Солиҳова келмадими!” деб тўрт-беши баравар кичкирди, бир оқ қўйлакли қиз одамларни ёриб кела бошлади.

Хўжаев уни яқин олиб койиди: “Назирахон, қайда юрибсиз? Эрталабдан бери чақирамиз...”

Эшик яна ёпилди, яна бўйнимизни чўзиб туравердик.

Оёқларим қалтираб, бориб девор тагига тўшалган газетага ўтиридим, ичимдан фақат их-их деган йигига ўхшаган бир товуш келиб, томоғимга тикилади, мажол йўқ, соат тўртдан ошяпти, кечадан бери туз тотмаганман...

Бир вақти яна эшик очилди, бормадим, қаттиқ ишонган нарсанг бўлмай қолиши мумкин дедим, ўтирган жойимда қарадим, Хўжаевнинг оғзи очилиб-юмилди, “Аш-а-а... аҳд” дегани қулоғимга келди, бирданига, ичкари кириб кетганлар ва ташқари-да турганларга “мухлис”лик қилаётганлар билан хисоблагандা, икки юз ҷоғли одамнинг тепасида “Ашрапов Маҳди!” деган исми шариф акс-садо берди, менга келиб урилиб, сакратиб юборди. “Хў-ўв! Мен—Ашрапов Маҳди! Ашрапов—менман!” деб бақирганча, ўзимни тўдага урдим, юрагим қинидан чиқиб кетай дейди, тезроқ эшикка етмасам, Ашрапов—мен, деб Хўжаевни алдаб, ўрнимга бошқа бола кириб кетадигандай...

Кейин, ўқиб юрган пайтларимда Хўжаев айтиб берди: ректор ўтолмаганларнинг рўйхатига қараб туриб, Ашрапов Маҳдига Бердиёров кўйиган “беш”га қўлини нуқибди-да, Хўжаевдан: “Бу абитетиентга “беш” қандай тушганини биласизми?”— деб сурабди. Хўжаевнинг фавқулодда хотираси бор эди: имтиҳондан йиқилгану ўтганларнинг ҳаммасини биларди, мени ё Бердиёровнинг одами, ё ректорга тайин-ланган, бекорга сўрамаяпти деб ўйлаб, адабиёт оғзакидан қандай жавоб берганимни мақтаб кетибди. Шунда ректор: “Ундоқ бўлса, шу абитетиентни қўшимча қилиб олайлик. Ташлаб

кетадигани бор, ҳайдаладигани бор. Ўқийдигани ҳам кирсин! Қақириңг!” дебди.

Рус тилини бор-йўғи ўнинчи синфда ўқиганмиз, ошхонага кирганда “ктў ўчират”дан бошқасини билмайман, яна кўзойнакли одамлардан чўчиброк тураман, мени кўп одамнинг ўртасидан олиб ўтиб, тўрда ўтирган бир кўзойнакли, жуда салобатли одамга рўпара қилишди, у киши менга русчалаб бир нарса деди, нима деяптилар, деб унинг ёнидаги одамга жавдирадим. “Яхши ўқийсанми кирсанг, деб сўраяптилар”, деди униси. “Ха, харашо будиш, будиш”, дедим, кимлардир кулди, ректорнинг қоши чимирилди; у менга: “Ну, как, будем хорошо учится?” деган экан...

Ўзимда йўқ дингирлаб кетаётиб, йўлда ҳамма ҳужжатларимни тушириб қўйибман — буниси тушимда водопровод минорасидан тойинганим бўлди. Эртаси куни топилишига ишониб, факультетнинг эшигига бошқа шунаقا эълонлар ёнига мен ҳам бир парча қофоз ёпиштиридим: “Шу-шу абитуриентнинг ҳужжатлари... Суюнчисига ўн сўм!” Мандатдан ўтиб олган баҳтиёрлар билан танишиб, ўтган кечаси кўрган тушимнинг қандай тўғри чиққанини гапириб ўтирган эдим, бир муғул башара, дароз бола бир қўлидаги қип-қизил комсомол билетига, бир менга қараганча, яқинлашиб келаверди, дарров билдим — ҳужжатларим шунда, чўнтағимни кавлаб,

охирги пулимни, етмаган уч сўмига “уйга бориб келганимдан кейин бермасам, худо урсин” деган чин ваъдамни тайёрлаб турдим.

“Ашрапов Маҳди сиз эмасми?” деди.

“Фирт ўзиман-да!” дедим.

“Жўра, чўнтак масаласи сал... бор-йўғи етти сўм қопти...”

“Э-э, қўй-э, жўра,— деди у бола қизариб,— бирга ўқиймиз энди, уят бўлади...”

Мен ҳам уялдим, ўнғайсизликни йўқотиш учун унга ҳам тушимни айтиб бердим: “Буни қаранг, ишониб ўтирувдим, ҳужжатларим топилгани — панжарадан ушлаб қолганим-да”, дедим. Оти Тангир экан, мен ҳам сенлашга ўтдим, жуда оққўнгил бола экан.

Кириш имтиҳонларини топшириш, мандат деган азоблар жуда жонимиздан ўтиб кетган экан, иккаламиз ҳам келаси йили ёзда уйга

кетмай, ўқишига кирадиганларнинг аҳволини томоша қиласиз, бир роҳатланайлик дедик, аммо кейин бу қуруқ гап бўлиб қолаверди...

Яна ўйлайман: ўшанда имтиҳонда Бердиёровга тўғри келмасам, мен билмайдиган савол тушганда, ё Хўжаев жавобни айтиб бўлганимдан кейин кирганда, ё ректор узун рўйхатдан баллари меникидан юқори болалардан бирига диққат қилганда нима бўлар эди? Бор эди-ку шунақалари, улардан бештаси кейин “эркин тингловчи” сифатида “резерв”да ўқишидиди! Янаги йил келмасдим — аскарликка олиб кетарди. Ҳарбийдан қайтиб, яна шу факультетга, борди-ю, кирганимда ҳам, кейин воқеалар ро-йиши мени буткул ўзга ўзандан оқизиб кетар, ҳозир башқа жойга, булак шароитга олиб бориб куйгач булур эди.

Жуда оддий хақиқатлардан танг қоламан. Баҳри Мухитга кетиб юборганимда Офият деган кизга боғланмасдим, у билан Нишоналининг туйига бориб, яқиндан танишмасдим. Институтимизга янги келган эди, уни ҳам тўйга етакладик, тўйда, одамлар худди шу ўйинда бир-биrimизга яқинлашишимизни олдиндан билишгандай, иккаламизни ўртага тортишди. Ўйнаётганимизда биқинимда бир нарса шир-р этди-ю, Офият секин кулоғимга шивирлади: “Кўлингизни тепага кўтармай, аста бориб ўтиринг”. Уялиб атрофга алангладим, ҳеч ким сезмабди, аста даврадан қочдим. Офият ортимдан чиқди. Биқинни пайпаслаб кўрсам, кўйлак қўлтиқдан пастроқда бир қаричча жўнабди. У пайтлари кўйлакни торайтириб, сириб кияр эдик, яна бу Наманганнинг тўйида дастурхонга одамнинг жонидан бўлак ҳамма нарса қўйилар экан, ошхоналарнинг овқатидан ичи шилиниб юрган бўйдоқ... Офият ўн минутлардан кейин игна-ип топиб олдимга келди. “Юринг, бирон жойда тикиб берай”, деди. Ўзим баковулхонага кириб, тўйнинг “ускулат мудури” билан ҳазил-хузул қилиб, тикиб чиқдим, Офият узоқданоқ мени кўриб, гўё менинг уятда қолмаганим иккаламизнинг ҳам шаъ-нимизга тегишилдай, мамнун жилмайди,— яқинда танишганинг қиз бола, тумонатнинг ўртасида сени кўриб кувониб, факат сенга атаб жилмайиб

ўтирса, жуда чиройли кўринар экан, тилим бойланиб қолди, бирдан хаёлимга шу қизга ўйланаман-ов, деган ўйинқароқ, довдир ўй

келиб, юрагим ҳаприқиб кетди, Офият бирдан меники бўлди, тўғри бориб ёнига ўтиридим. Ҳеч бир вақт қиз боланинг олдида бунча очилиб ўтиргмаган эдим, ҳеч бир қиз менинг гапларимни бунчалар берилиб тингламаган эди, „ўз гапимдан ўзим таъсирланиб, ҳар бир сўзимни дона-доналаб, дутор чертаётгандай сўйлайман, айтишимни куйга соламан, Офиятнинг юзида ҳам менинг кўнглимда дарёдай солланиб қуиилаётган туйғуларнинг акс садоси ўйнайди, гоҳ мен — созчи, у соз бўлиб, гоҳ у — созчи, мен созга айланиб, суҳбатимиз ҳеч тўхтамади, шу тўхтамаганича, баъзан баравж, баъзан паст, ҳозиргача келяпти, кейин — тўйимиздан сўнг Офият айтиб берди, ўша Намангандга, кўйлагимни тикиб олиб, уни ахтариб аланг-жаланг келаётганимда, аввал совуқроқ туюлган, энди эса тўсатдан хушчақчақ бўлиб олган ғалати йигитга нисбатан нимадир илиқлик уйғонган экан. “Йў-ўқ, севги эмас, дарров-а, жуда ўзингизни яхши кўрасиз-да, бошқача, худди кў-ўп вақтдан бери таниш, ҳамма гапни ҳам айтса бўладиган якин одамдек кўриниб кетдингиз...”

Ўша тобда, айни Офият билан топишган дамларимда Баҳри Мұхитда балиқ овлаб юришим керак эди!

Ғалати туюлади: ҳаётимдаги ўнлаб, юзлаб воқеаларнинг тасодифий боғланишлари, уланишлари, узилишларидан бугунги туриш-турмушим бунёдга келган. Агар бу силсиланинг бирон ҳалқаси узилса ё бошқа қатордаги ҳалқага уланиб кетса, мен ҳозир қаерда бўлар эдим?

Еттинчи синфдалигимда шундок ажалнинг домига тушаётиб, умрим бор экан, яшашим хақ экан, қутулиб қолганман.

Ҳаво булат, эрта кўкламнинг одамни кўчада ҳам мудратадиган дилтанг бир куни, аниқ эсимда йўқ, бузоқ ахтариб юрган эдим шекилли, колхознинг ташландиқ сушилкасига кириб қолдим. Сушилканинг ичи ис-қурум босган, нимкоронги эди, Ҳар хил темир-терсак, симтўрлар, думалаб ётган вентиляторлар орасидан анқайиб ўтаётиб, девордаги электр-тақсимлагичга кўзим тушди. Бармоқдай-бармоқдай келадиган, чиройли қайрилган учта сариқ симга қизиқиб қолдим, қорайган деворда, худди сал олдин бирор ҳафсола билан артиб-тозалаб қуйгандай, сирли товланади. Секин, худди

сехрлангандай, ихтиёrsиз, шуурсиз, аллақандай заиф бир қувонч билан иккаласини ҳам ушлайман деб, икки қўлимни ҳам чўздим, эсласам, ҳалиям қалтираб кетаман — мени ажал тортаётган эди, шу сонияда, энди симларни чанглайман деганимда, нечундир уларнинг ёнгинасида турган кора дастакка диққатим чалғиди, чап қўлим шундоқ симга тегай-тегай деб, ўнг қўлим билан не хаёлда дастакни босиб юбордим, бирданига қандайдир осмоний бир гувлаш бошланиб, юрагим ёрилиб кетаёзди—симларда ток бор экан! Уч фазали, юқори кучланишили ток! Физикани, электр токининг нималигини, ушлаган одамни чиппа ёпиштириб қўйишини, еттинчи синфда ўқийман, жуда яхши билар эдим, эсим тескари бўлиб кетди, оёқларим бўшашиб, бир темирнинг устига ўтириб қолдим, гувиллашдан эмас,

ҳозиргина шу симларни ушлаганда тил тортмай ўлишимни, косовдай қорайиб осилиб қолишимни англаб қолганимдан—мен бу тилладай товланган симларда ток йўқ, эс билганимдан бери ишлатилмай ётган ярим вайрона сушилка аллақачонлар токдан узиб ташланган, деб ўйлаган эдим.

"Мен бир марта ўлганман, бўлди, энди ўлмайман, - дейди рассом оғайним Исрофил. - Қариндош-уруғлар тўпланиб, хув-хув йифи-сиғи ҳам қилишган, нимамга ҳам қуишишарди, туғилганимдан бери инг-инг қилиб ўнгланмай ётган бир парча гўштман. Мени ёстиққа қўйиб қизил баҳмалга ўрашди, кимдир минғирлаб жаноза ўқиди, мозоратга олиб боришиди. Гўрга қўямиз, деб қизил баҳмални очишлари билан бақириб йиглаб юбордим. Баҳмални ҳамсоямиз Ароқул ака очаётган экан, қўрқанидан шайтонлаб қолди. Яқин-яқингача мени кўрса: "Ҳа, жиян, сал бўлмаса, мени ўлдириб қўярдинг", деб юради.

"Бўлмаган гап, ўлмагансан, аслида летаргик уйқуга тушиб қолиб, мозоратда уйғониб кетгансан", дейман.

Исрофил мени уриб енгади: "Баҳмал қип-қизил эди, деяпман-ку! Худди қизил халтада ётгандай, қўзимнинг олди ҳам қип-қизил эди".

"Баҳмалнинг орасидан қип-қизил бўлиб офтоб ҳам қўриниб турганмиди?"

"Бунақа нарсаларни тушунмайсан. Биринчидан, қизил рангнинг бўлакча хосияти бор, одамни тетиклантиради, тунчироқлар шу учун

қизил, эҳтиросни қўзгайди, менга ҳам қувват бериб тирилтирган, иккинчидан, сенга аниқ эслайман, деяпман: баҳмални Ароқул aka очганда кўзимга урилган оқ рангдан — кафандан йиғладим. Агар шу баҳмал билан кўмишганда, ҳозир Истрофил деган жўранг бўлмасди, ким қайси тўнкалар билан қатиқ ялашиб юрадинг...”

“Баҳмалнинг қанақалигини кейин эшигтсансан, рассом одам—дарров қолганини кўз олдингга келтиргансан. Кейин ўзинг ҳам ишониб қолгансан...”

“Сен фақат кўз олдингда ғўдайиб турган нарсаларни кўрасан, фақат очик-ойдин нарсаларни тушунасан. Сал чуқурроғига дарров бемаъни мантиқ ёпиширасан”.

“Ўзинг-чи?”

“Ўзимми?— дейди Истрофил жиддий тортиб.— Мен — генийман.”

“Ол-а,— дейман узиб олгудай,— генийлик кўчада дарбадар қопти-да, одам қуригандай сендан бошпана топса?...”

Истрофилнинг ростакамига жаҳли чиқади: “Саёз дарёга ўхшаб шағиллайсан-у, кўнглинг кўр—тумшуғингнинг олдида турган генийни кўрмайсан...”

Истрофил чизган сувратларда мен ўша — ўзим боришим керак бўлган узоқларни кўраман: ранглари бу ерники эмас, одамлари ўзгача, кўринишлари бошқача, ҳаммасида одамни қандайдир секин жўширадиган, кўнгилни кўпиртирадиган нимадир, англаш қийин, англаш учун мияни зўриқтириш, хаёл чегараларини бузишга тўғри келадиган кенгликлар бор. Мен унинг ўша қизил баҳмални, ўз жанозасини аниқ эсимда, деб нақл қилишига ишонмайман, қизил рангнинг бўлакча хосиятлари ҳақидаги гапларида ошириб юбораётганини сезиб турман, аммо уч ойлик чақалоқ пайтида, уни ўлди деб ўйлаб, маъракасини ўтказиб, кўммоқчи бўлиб, мозоратга олиб боришгани рост, айни кўмишга чоғланишганда, мурғак чақалоқнинг кўнглида ихтиёrsиз бир куч—яшаш истаги жунбушга келиб, йиғлаганига ишонаман. Истрофил ўша чақалоқдан катта бўлган, ўша куч уни рассом қилиб тарбиялаган. Истрофилнинг ўзига куйиб берса, мен у дунёни бир кўрганман, яхши биламан, учиб юргандай эдим, энди туйғуларимнинг чуқурлиги ҳам шундан, дейди. Балки, балки... У

чиндан ҳам генийдир, ҳали очилмаган, ё унинг генийлигини тушуниш, түмшүғимнинг олдида турган даҳони кўриш учун туйғуларим саёзлик қилас... ҳарҳолда, Исрофилнинг ўшандагур оғзидан бақириб йиғлаб ҳаётга қайтгани билан бугун чизган манзаралари ўртасида боғланиш бор...

Ўшандагим нима куч мени симларни чанглаб қолишдан асради? Балки бу яшагиси келаётган, аниқроғи, ҳали яшашини сезиб турган ёш, норасида танимнинг хато ўлимдан табиий четланиши бўлгандир, балки ўлишни истамаган тирик ҳужайраларнинг ибтидоий сезгисидир, аниқ эслолмайман, ҳарҳолда, қўлларимни ўша сирли товланган симларга чўзаётганимда ақлим ухлаётган, мудрок-паришон ҳолатда эдим, худди бирор мени бошқаргандай, ҳали яшашимни, мактабни битириб, институтга киришимни, пойтахтга келиб, шу ерда оила қуришимни, уч фарзандга ота бўлишимни — бу дунёда ҳали томир ёишишимни бирдан эслаб, симларни эмас, дастакни ушлаб, босиб кўр, деб буюргандай туюлади, бу буйруқни ҳозир, шуларни ўйлаётиб, болалигимга бергандай бўламан...

Агар ўшандагим симларга текканда, атиги бир сония — бутун умрим ўша сопияга жо, ўша сониядан иборат, улиб кетганимда ҳозир ўзим, мендан тўраган уч болам ва менга боғлик талай-талай ишлар бўлмас, ўрним бўм-бўш, ҳувиллаб тўрган бўлур эди, Ҳарҳолда, улмай қолганим оддий тасодиф эмас, тасодиф десам ҳам, яна шунака ўнлаб, юзлаб бир-би-рига чирмашиб кетган тасодифларнинг бир узвий ҳалқаси бўлган, бу ҳалқалар занжири ажалнинг шундок ҷовути остидан ўтиб, менинг ҳозирги тириклигимга уланган, ўша ерда узилиб қолиши белгиланмаган эди, болалигимнинг менгача чўзилиб келиб, умр берса, келажагимгача ҳам уланиб яшаетганини сезиб турман.

Бахри Мухитга бораман, деб, кетмай, бу орада Офият билан топишишим ҳам шундай тасодиф, ўша занжирнинг энди фақат менга, менинг умримгагина эмас, Офиятнинг ҳаётига ҳам, болаларимнинг дунёга келишига, яшашига, вояга етишига боғлик ҳалқаси, йўл юришини яхши кўришим, доим

тинчимни бузиб, тинчгина яшашимга қўймаётган истак эса...

Билолмайман, ишқилиб, тупроқдан ташқарида юрган ҳар бир одамнинг ичида, вужудида ўзи ҳам англаб етмайдиган бир устиворлик бор, шу куч унинг ҳаётидаги тартибсиз тасодифларни бир шодага тизади, одам эса фақат шу тартибда яшашни истамайди шекилли, баъзан ҳатто қўлидан келмайдиган нарсаларни амалга оширишга, шу тасодифлар тизгинида қолиб кетмасликка интилади: агар одам бундан сўнг қандай яшаши, қандай турмуш кечиришини аниқ-равшан, беш қўлдай аён билса, қизиги қолмас, ҳафсаласи ўлар, гўё дунёга тескари келгандай, келажагидаги ҳаётни аллақачон яшаб қўйгандай бўлиб қолар эди — одамга у билмаган нарсалар керак, уларни билиб, яна билмаганларини ахтариб кетиши керак, чунки одам дунёга билиш учун келган, билиб кетиши керак...

Офият биз ҳам одамларга ўхшаб, ёз ойлари уёқ-буёқларга кетайлик дейди, янаги йил, янаги йил, деб келаман, вақт йўқ шунга, ҳафтами—ўн кунми қишлоққа борамиз, мана—ҳаво, ана—кенглик, тўйиб хордиқ чиқаринглар, дейман, ўзим икки-уч кунда келди-кетди, бориш-келиш, ўтиришлардан, ош билан шишадан беза бошлайман. Офият, бир хотин рўзгор қилиб юрса, буниси яна уч бола билан келиб бир дунё ташвиш орттирса, қараб туролмас экан, келинга қўшилиб пишириқ-сишириқдан чиқолмай қолади, дам олиш ўрнига ҳориб-чарчаб шаҳарга қайтамиз, мени йил бўйи чала ётган ишлар кутади, Офиятни эса қозон-товоқ, идиш-оёқ деганлар қучоқ очиб қаршилайди.

"Яхши ҳамки, ўқиётганда Ҳиндистонни кўриб қолганман", дейди у.

"Ҳиндистондай мамлакатни кўриб келиш бутун умрга етиб-ортмайдими?" дейман.

Бошқа нима ҳам дей?

Болалар каттарсин, ҳаммаси бўлади, дейми?

Илгарилари Исрофил бирга юр, деб тоққами, сув-омборгами судраб қўймасди. Фақат бир марта унга эргашиб бордим. Биринчи куни — тузук, чўмилдим, офтобда тобланиб ётдим, яна чўмилдим, тушдан кейин шишиб ухладим, Исрофил тинмай ишлади, иккинчи куни ундан хафа бўлдим: на гаплашади, на уёқ-буёққа юради, худди

шундай бехавотир ишлаши учун мени қўриқчиликка олиб келгандай, китоб ўқий десам, яна мудроқ, босади, ухласам, караҳт уйғонаман.

“Фирт уй қаламуши экансан, ўзинг ҳам,—деди Исрофил, учинчи куни эрталаб йўл халтамни елкалаганимдан кейин.— Сени озодликка зўрга тортиб чиқсан, яна кавагингга урасан...”

“Худо мени одамлар орасида яшагин деб яратган”, дедим...

Исрофилдан йилдан-йилга узоқлашиб кетяпман, йўқ, мен тўхтаб турибман, Исрофил кетиб боряпти, худди болалигимдек: ўзи билан ўйсиз,

ташвишсиз эркинлигимни, тоза хаёлларим, қизғин умидларимни ҳам олиб, мени ташлаб кетяпти...

Дўст ёнингда туриб ҳам сендан узоқлашиб бораверар, оила бузилганда ўртадаги болалар, ота уларни ҳар қанча яхши кўрмасин, хотинга ўтадигандек, дўст ҳам узоқлашганда умрингдан энг тотли дамларини ўзига олиб, ўрнига юракни ачиштирадиган оғриқ хотираларни ташлаб кетаверар экан.

Исрофил меникига тез-тез келиб туради, мен ҳам шундай— уникига боришни қанда қилмайман, факат... бир мажбурий юмуш бажараётгандай, ха-ху гаплашиб ўтирамиз.

“Э-Э...”

“Расулни айтаман...”

“Нимасини...”

“Яхши эмас...”

“Унга айтдим...”

“Ўзи билади...”

“Бирорвнинг турмуши...”

“Лапашанг...”

“Бир ёқлик...”

“Кулгиси қистайди...”

“Шу ахволига...”

“Деганда қандоқ...”

‘ ‘Минғир л ай ди- ей...”

Четдан қараган одам булар ўзбек тилидаги сўзларнинг талаффузини ўрганибди-ю, ҳали жумла тузишни билишмас экан, бир

гапни охиригача айтишолмайди, деб ўйлаши мумкин.

Гүё айтмоқчи бўлган нарсамизни бармоғимиз учida навбатма-навбат ушлаб қўриб, э-э, буни биламиз-ку, деб яна ташлаб юбораётгандай. Аслида бу қуюқ, сухбатнинг мазмуни шундай: Расул бир эрсиз аёл билан юради, бирга ишлайди, хотини билиб қолиб, идорага келибди, ўша мегажинни юлибди, ғалва, томоша, директо, , партком, яна бир-иккитаси йиғилиб, Расулни ўртага олишибди. “Хўш нима қилмоқчисан?” дейишса, Расул: “Билмасам, ўзларинг биласизлар”, дебди, директорнинг жон-пони чиқиб кетибди: “Ўйнаш тутган сенми ё бизларми? Мазасини сен тот-да, нима қилишингни бизлар билайликми? Ё бунисини ташла, ё унисини”, дебди. Расул иккаламизга ҳам унча яқин эмас, аммо отам замонида қурилиш ташкилотининг ётоқхонасида бирга яшаганимиз, бу аҳволига ачинамиз, ёрдам бергимиз келади—шуни муҳокама қиляпмиз, фикр билдирияпмиз, фақат бир-

биримизнинг нима демоқчилигимизни жуда яхши билганимиз учун, очиқ айтишга эхтиёж ҳам қолмаган: гапларимиз икковимизга ҳам ёд бўлиб кетган.

Шунга қарамай, мен ҳали ҳам Истрофилни соғиниб бораман, Истрофил ҳам мендан бурунги — ўша Маҳдини излаб келади.

Мусоғир жойда ҳамюртларни бир-бирига, уларнинг фазилатларидан кўра, кўпроқ туғилган юрт меҳри яқинлаштиради, ўз элида ёвлашганлари ҳам бегона элда топишиб, ҳатто дўстлашиб кетадилар.

Истрофил билан мен икки хил одам бўлиб чиқдик, аммо узоқ,— тунлари ухламай лақиллаб ётганимиз, ҳеч адo бўлмайдиган гурунгларимизни қўшиб ҳисобласа,— жуда узоқ вақт бир кўнгил мулкида елкадош яшаганимиз хотираси тамом айрилишга изн бермайди. Ҳар қанча узоклашмайлик, бошқаттан яшамаймиз — ўша дўстликни четлаб ҳам ўтолмаймиз, юракдан чиқариб ҳам ташлолмаймиз.

“Ҳеч тушунолмайман сени,— дейди Истрофил, энди хотирага айланган дўстлик баъзан-баъзан кўнглимизни илитиб, яна аввалгидаи ташна гаплашган вақтларимизда.— ўзингни минг хил нарсаларга

боғлаб қўйгансан, худди учиб кетишдан қўрқадигандай. Қанақадир одамлар, қанақадир муносабатлар...”

Исрофилнинг гаплари мени чарчатади, унга ҳам-касларим қанақадир одамлар эмаслигини, ўртамиздаги муносабатлар жуда жиддий ва ниҳоятда заруратлигини тушунтиrolмайман.

“Анави... ким эди, бўйнини қисиб юрадиган курсдошинг, Абдиқуловми? Ачинаман шу одамга: умрини тўрт-бешта одамни йиққитиш учун сарфлаб юрса! Ўзинг ўйлаб кўр: факультетингда ҳар ким ўз ишини билиб бажарса, Абдиқуловнинг бу уриниши бемаъни бўлиб қолмайдими? Кичкина бир дунёда кичкина одамларнинг бир-бирини кавлаб бехуда яшashi кулгили эмасми? Сен эса шуниям фожия қиласан. Ахир, дунёга фақат шу мақсадда келмагансан-ку!..”

Унинг гапларини эшишиб ўйлайман: одамларнинг ичиди, уларга ёнма-ён туриб, яна қанақасига тамомила эркин, мустакил яшаш мумкин?

Мен тумонатнинг ичидан югуриб ўтолмайман, албатта бировга қоқиласман ё бирови этагимдан ушлайди...

Исрофил шунинг уддасидан чиқади—у одамларнинг устида учиб яшайди.

Ҳеч бир асари жанжал-ғурбатсиз, асаббозликсиз ўтмайди. “Нега ёмон кўришини ўзлари ҳам билмайдиган” муҳолифлари жуда кўп, хатто “ҳаммўйқалам” дўстлари билан гаплашяптими, тезлашяптими, билиш қийин, томоги бўғилиб қолгудай баҳслашади, одамга хос жами ҳис-ҳаяжондан бебахра эмас, аммо бу туйғуларнинг ҳаммаси уни асосий иши — “буёқчилик”дан чалғитаётган мажбуриятга ўхшайди, ғурбатнинг қоқ ўртасида, бўғилиб-куйиниб, яна буларнинг биронтасини ўзига олмай, гўё пайкамагандай, кўнгли доим озодлиги, эркинлигича қолаверади. “Олишса -

шундоқ - индамай олишсин, олишмаса—индамай қайтаришсин. Нима қилишади мулоҳазаларини тикиштириб. Мен дунёни шундай кўраман, нарсаларни шундай ҳис қиласман. Хоҳласам ҳам ўзгартиrolмайман. Булар эса менга, йўқ, бу йиғлашинг ёмон эмас, лекин, мана, бунақа, бизга ўхшаб йиғласанг, янада чиройли чиқади, дейишади! Бир шунақа шеър бор, а? Кулги хунук бўлса бордир, аммо

йиғи чиройли бўлолмайди, ҳатто қувонч йигиси ҳам — бу қувончга етгунча тортган азобларни билдиради. Мен эса чизган нарсамда ҳеч йиғламайман, шу тўнкаларнинг дардини чизаман, улар эса ўзларини кўрмай...”

Бу қандай куч?

Менда шу йўқ.

“Сенга ўхшаганларнинг ҳаётини мен уч ойдаёқ тўла яшаб, ҳаётдан карзимни узганман—энди эркин қушман, истаган томонга учишим, ҳоҳлаган нарсамни чизишим мумкин”, дейди у ҳазиллашиб.

Менга чин туюлади: у чиндан ҳам олдин яшаган, бир, балки бир неча вужудда таносух бўлиб, одам зотининг турмушини обдон синааб кўрган, Истрофилнинг жисми охир бўлгач, бошқа одам суратига кўчади, балки унинг рассомлиги шундандир, ўзини суратларда ҳам қолдирар,— кейин қиёфасини эслаб юриш учун...

Бир кун эрталаб Истрофилнинг ҳай-ҳайлашидан уйғониб кетдим. Деразадан қарасам, у учта шогирди билан юқ машинасидан катта бир картинани туширяпти. Нақ девордай келади, қаерга осаман, деб шошиб қолдим.

Тушгунимча Истрофил картинани машинага суятиб, қўлини белига кўйиб, томоша қилиб турибди. Кўзлари киртайиб кетган.

Картинага тикилиб туриб, бирдан кичрайиб қолгандай бўлдим: ундан бир тоғ силжиб чиқаётган эди, мисоли шундай—сеанс пайтида кинотеатр экранида кўринган тоғ бирдан расмона тоққа айланиб, экранни ёриб, томошабинларга қараб ҳаракатлана бошлаган, залга думалаб тушаётган зил харсанглари экранга туташ супанинг тахталарини бурдалаб, олдинги ўриндиқларга етай деб қолган, залда ҳеч ким йўқ, аммо ваҳимага тўла эди, хира ёнаётган қизил чироқ шуъласида ўриндиқлар қаторлари қўркувдан қотиб қолгандай кўринарди.

Болалигимда кўрганим бир кино эсимга тушки: бригада шийпонининг оҳакланган деворида туйкусдан паровоз кўриниб, тақатуқ, тақа-туқ қилиб ўқирганча, тўғри устимизга ҳайдади, худди тагида қоладигандай, ўзимизни орқага ташладик, биз тугул катталар ҳам сўкиниб қуишиди: “Ва-ассийниғар! Нақ босаман дейди-я!”

Исрофил чизган манзарага зехн солған одамни шунақа ваҳм босар эди.

Исрофил шундай тушунтиради:

"Чўлда кечаси ёлғиз кетиб боряпсан, бўри йўқ, шоғол йўқ, хаммаси қирилиб битган, сенинг арзанда жонингга ҳеч нарса қасд қилмайди, лекин қўрқасан, нимадан — билмайсан. Очиқ майдонда турибсан, бирдан ер қимиirlайди, сени қора ваҳм босади, тепангдан қулаб тушадиган уй-пуй йўқ, аммо юрагинг ёрилиб кетай дейди. Бу қўрқув ақлингдан ташқарида. Инсоннинг атрофини унга куринмайдиган аллақандай кучлар ғуж қуршаб туради, балки бу куч кўп эмас, битта — табиат, балки табиатда яширган бир кудратдир? Аниқ айтольмайман. Ярим тунда уйингдан чиқиб, теварак-атрофга, осмонга қара — шу кучни сезасан, қандайдир улуғ, муazzам бир кудрат товушсиз ғувиллаб тургандек бўлади, қулоғинг билан эмас, кўнглинг, туйғуларинг билан эшитасан, бирдан уйингга киргинг, паналаб олгинг келади. Бир хил пайтлари, айниқса, тоғда кечаси қўрпанинг ичидаги ҳам титраб ётаман, танимга шу куч қириб қалтиратадаётгандай бўлади, қанақадир қувонч билан қўрқаман. Агар шу қўрқувни енгсам, танамдаги титроқни тўхтатсам, табиатга қўшилиб кетадигандай бўлавераман, худди жуда улкан деворнинг тагида туриб, уни пайпаслаётгандай бўлавераман, аммо юмуқ кўзларимни очолмаётгандай бир ахволга тушаман. Ўзинг ҳам бир вақтлар шунақа деган эдинг. Сенинг гапларинг эмас, кўп туйғуларинг ҳам менга ўтиб қолган шекилли, қозоннинг қорасига ўхшаб... Майли, бу ҳазил... Лекин мени ҳам сен тушунасан. Манави, чоркунжак экран — бизнинг табиат тўғрисидаги тор тушунчамиз, табиат эса бу тасаввурга сифмайди, унинг чегараларини бузиб-янчиб ўтиб, шуурига ёпирилади..."

Исрофил картинасини фақат менга бир кўрсатиш учун олиб келган экан, менга ёққани, тўғрироғи, қўрқитганидан роса қувонганини зўрға босиб яна машинага ортириди.

Одам боласининг вояга етиши қийин кечар экан. Кейин айтилади: "У-у, қаранг, кечагина бола эдик!" деб.

Умр йигит ёшидан кейин тезлик олади. Ўспирин бола бунақа

гапларни хаёлига ҳам келтирмайди, ўспиринликнинг умри жуда узун.

Институтда ўқиган йилларим жуда узоқ кечгандай, ҳар бир куни мислсиз-чегарасиз чўзилиб кетгандай туюлади.

Ўша пайтлари Ҳақбердини ўлгудай ёмон кўрар эдим — каравотнинг қоқ белида иркит қора чопонига ўраниб, чордана қуриб оларди-да, бурнини,— кечирасиз-у, ростдан ҳам шунаقا қилган бўлса, қандоқ бошқача айтай,— қанқиллатиб тортгани-тортган эди. Ижирғаниб, тишимни тишимга босиб зўрга ўтираман. Гапирсам, баттар бўғиламан,— бурнингга куйдирги чиқкур,—ёқмаса, эшитманг, дейди! Кошки, хона каттароқ бўлса, товуқхонадай бир каталак— йўталганга ҳам зириллади.

Ҳатто ҳозир ҳам Ҳақберди билан кафедрада ёлғиз қолсан, кенг ёруғ бино торайиб, ўтирган хонамиз икки елкамдан сикаётгандай, гапни қисқа қилиб, чиқиб кетаман...

У пайтлари Ҳақбердининг ўрнида одам эмас, бир олақарға кўнқайиб олиб, “қағ-қағ” деяётганга ўхшар, худди шу тобда шифтдан гупиллаб қор уриб берадигандай жунжикиб кетар эдим. Ўзи йўқ пайлари ҳатто кўрпаси устидаги алчайиб ётган чопонидан ҳам шу ахмоқона, бемаъни-бетарбия товуш келадигандай, ҳозир енгини силкиб “қағ-ёғ” этадигандай, ёстигининг тагига тиқардим, шунда ҳам кўнглим тинчимай, кўрпасига бостирадим, кўрпа тагида ҳам тинч ётмай, эгаси келса, биргалашиб мени хунибийрон қилишга режа тузәётгандай туюлаверарди.

Ёмон кўришда Ҳақберди мендан ҳам ошиб тушарди, куйиб-ёниб, нафаси тикилиб ёмон кўрарди мени. Яхши ҳамки, одамнинг нафрати фақат ўзини қовуради, агар Ҳақберди лаппакбаликка ўхшаб ўзидан электрқувват чиқарса, у билан қўл олиб кўришганимдами, хайрлашганимдами пақкос ўлдириб қўярди. Кимнинг меросини бўлишолмаганимиз — билмайман. Тиккама-тикка келиб, бақиришган кезларимизда нега мен уни, ё у мени тушириб қолмаганимиз, ҳайронман. Ҳақбердининг жанжални ҳеч қачон муштлашишгача олиб бормаслигини, борди-ю, шундай бўлса, чап бериб кетишини энди биламан. Кейин, у пайтлари, жари-ўнгиридан тортиб сим-сиёҳ, фақат юлдузлари бодраб турадиган кечаларигача бехавотир, ўзимизники

бўлган қишлоғимизни янги тарқ этиб, нотаниш одамлари, безорилари кўп шаҳарга эндиғина келганимиз учунми, ҳаммамиз ҳам ўзимизни ҳимоясиз билиб, мусоғирчиликда бир-биrimizни қўллашимиз керак деб ўйлаб, бир курсда ўқишимиз, битта каталакда ижарада туришимизни ҳамма нарсадан, ўзимиздан ҳам баланд қўйиб, ҳатто фалончиларнинг ижарасида уриш чиқибди, тўрдаги каравотни талашиб, Холмурод Шобердини урибди, қаранг, биз қандай ахил яшаймиз, деб мақтанар ҳам эдик. Ишқилиб, бир мусоғирнинг ўзи билан бирга турадиган мусоғир билан чиқишолмаслиги, шерикларидан ажраб, бошқа ижарага кўчиши, ҳамхужраларидан пулининекиши, гали келганда, ошхонада навбатдан қочиши, ўз бошича, ҳеч кимга қўшилмай овқатланиб юриши ҳам жуда хунук хисобланар, узундан-узоқ ғийбат, сўкишларга сабаб бўлар, шунақалар чиқиб қолса, кўп ўтмай давралардан четлатилиб, шумшук қўриниб юришар эди.

Бири биридан баттар уйларда, уйидан ҳам баттар хўжайниларницида яшасак ҳам, стол теварагини гир қуршаган уч ёки тўрт каравотга қанча одам сигиб ўтиришига, керосинкадаги кастрюль қанча гуруч кўтаришига қараб, яқин-яқин ижарагирлар жамланиб, ўтиришлар қилиб туромиз — одам саккиз-тўққизтадан, баъзан ўн бештагача келади.

Ота-онамизнинг иссиққина оғушини эндиғина тарқ этиб, хали кўпчилик жамулжам яшашини унуполмаганимиз, аксинча соғинишимиздан шунаقا гап-гаштакларга бир ҳайит, байрамдай қараймиз, унисидан-бунисигача интиқ бўлиб юрамиз, тўпланиб улгурмаёқ бир-биrimизга гал бермай, ҳафта бўйи йиғилган гапларимизни ҳовлиқиб, кувонч билан тўкиб соламиз, (зарурати қисталанг бўлиб зўрга ўтирган Тангир чидай олмай, бирдан ташқарига отиласди —“Жон жўралар, айтмай туриңлар, ғув-в этиб

бориб келаман”. “Э-э шу вақти... Гапнинг белига тепдингиз-да, лекин!”— унинг келишини жим кутамиз, келиши билан яна бошлаймиз), оғизларимиз чарчаб, бошларимиз оғриб кетгунча, кечаси уй эгаси келиб шовқин солиб ҳайдамагунча валақлашамиз, эртаси куни ҳам кеча “гапхона қандай қизиганини” маза қилиб эслашамиз.

“Замонамиз қаҳрамони”ни янги ўкиб, Печоринга ўхшамоқчи бўлиб юрган кезларим, ўтиришнинг бошларида ўзимни жуда-жуда зериккан, бепарво, совуқ тутишга тиришаман, гап қизиган пайтлари ичимдан потраб чиққан кулгуни зўрға босиб, лабларимни қимтиб оламан, аммо сал ўтмай, печоринчилик тамом ёдимдан кўтарилади, энг зўр ҳангомани ўзим айтаётгандай, ҳамманинг диққатини қаратишга тиришиб, томоққа зўр бераётганимни билмай қоламан.

Кечаси кўп гапирганимдан калла караҳт, оғзим куруқшаб, деразадан юксак орзуларим туманида хира йилтираётган юлдузларга термилиб, “нақадар зерикарли, нақадар зерикарли-я...”, деб ўйланиб ётаман...

Якшанба кунлари эрталабдан ўзимни зерикишга мажбурлайман, бугун ўтиришга қатнашмайман, деб аҳдлар қиласман, аммо вақт пешиндан оғиши билан кўкрагимда тўполон кўтариб, томофимни қитиқлаётган, лабларимни кечқурун айтар гапларимга шайллантираётган туйғуларга бас келолмай қоламан...

У пайтлари мустақилликдан кўра, ҳаммага ўхашашга, ҳамма қатори фикрлашга интилиб, ўзимизни тўдага урар, янги ҳаётга, янги нарсаларга ташна бўлсак ҳам, янгилик изламай, йўлга чиқмай, ғуж яшашни яхши кўрар, дунёни бир-биримизсиз фикр қилолмас, шу чағир-чуғурнинг ичида Ҳақберди икковимиз ҳам ярми қизил, ярми кўкка бўялган коптоқдай, чирмалиб, келажакка думалаб келаётган эдик.

Мана, Ҳақберди, Тангир, Ҳасанбой, Сувон, кўк бўёғи олапес тўртта каравот, лиқиллоқ-омонат стол; бурчакда милтираётган керосинка, устида битта мусулмони ғиш—уйни шу билан иситамиз, Ҳақберди ўша қора чопонда, олақарғадек кўнқайиб, бурун нағмасини бошлаган; Сувон — қори — кўрпадан фақат конспект ушлаган қўли чиқиб турибди, ҳар замонда кўзи шифтга бақраяди, кейин юмилади— пишир-пишир қилиб ҳозир ўқиганини ёдлайди; Ҳасанбой столга мук тушиб, доимгидай илжайиб, китобга чизиб ўқийди — чизмаса, калласига кирмайди; Тангирбой — худонинг эрка талабаси, ётиб уйқуни уряпти, гоҳо Ҳақбердининг бузуқ карнайидан уйғониб кетадида, “Э-э-э” деб яна бошини кўрпага буркайди, оёғи очилиб қолади,

оёғининг бармоқлари узун-узун, қийшиқ...

Ташқари совуқ, кеча қор ёқсан, изғирин. қамалиб ўтирибмиз. Дафтарга термиламан, Ҳакбердининг бурни бошимга қамчи тушгандай таъсир қиласи. Тушлик қилиб олгандан бериёқ икки марта айтишиб олдик, ҳозир дунёдаги бор ёмонликни ичига жамлаб, ҳаммасини менга тилаб ўтирибди. Менинг кайфиятим ҳам униқидан қолишмайди. Ўзимча ҳар ҳил воқеаларни тўқиб, ундан ўч оламан. Мана, у битта жонон қиз билан ёнма-ён кетаётганда, қиз эсидан чиқиб, бурнини тортиб юборади, қиз унга: “Қо-оч-э ислиқи!”, деб

карайди, Ҳакберди мулзам бўлиб қолади. Лекин жонон қизни унинг ёнида юргизишдан қизғанаман. Ҳакберди домлаларнинг олдида... Падари қусур, кўпчиликнинг ичида сира бунақа қилмайдида! Ҳаммасига менинг иккита имтиҳондан ҳам “беш” олиб, бу куйканакнинг зўрға “тўрт”га илингани сабаб... Ҳакберди Жамиланинг кўлини ушлаётиб... ўзиям Жамиланинг кўллари картошканнинг ўсимтасига ўхшайди. Ўл-а, бу кунингдан, дейман. Курсимизда, отаси занжими ё онаси кўмирхонада туғиб қўйганми, Жамила деган қопкора, пастаккина бир қиз бор. Қиз зотига қирон келгандай, Ҳакберди шуни яхши кўради, шуни гапирса, оғзи сув очади-еї, аммо яқинига ҳам йўлай олмай, бир чақирим узоқдан ҳуркиб қарайди, яна “Эҳ-х,— деб жўмрагини чўзади, чўччайган лабининг устидаги сарриш туклари тиккайди,— шу қиздан бир муччи олиш насиб қиласмикан бандасига! Вой-эй!” Эртагаёқ шунинг кўзи олдида атайлаб, бандасининг насибасини намойишга кўрсатмасамми, деб ўйлайман, аммо Жамиланинг оғзини ўпаётганимда “Вий-й”, деб чийиллашини кўз олдимга келтириб, ҳафсалам ўлади. Овозининг ёқимсизлигини!.. Шунинг нимасига учган. Ўл-а, илиқишимай!..

Шу пайт кимдир деразани тиқирлатиб чертади. Ҳасанбой ялт этиб менга қарайди, Ҳакберди эса ҳозиргина кўнглимда кечган ўйларни билиб тургандай, узиб олади: “Одам эмас шулар, ичида курти бор-эй! қаҳратонда пишириб қўйибдимикан?!?” Сержўра боламан, бири келиб, бири кетиб туради, Тангирнинг чопонини елкамга ташлаб, кўчага чиқаман, дарвозанинг тирқишиданоқ Шоди аканинг катак пальтосини таниб, қувонаман. Шоди ака бир саломлашиб ўтишга тўхтагандай,

киришга тайсаллаб туради, уни куч билан ичкари тортамаи.

Ҳасанбой мулойим илжаяди, Сувон — ўқишидан қутулганига хурсанд — кўрпасини тепиб отиб, сакраб туриб, Шоди акани кучоқлаб силкий кетади, Шоди ака: “Ў-ў, жиннимисиз!” дегандан кейин уни қўйиб, Тангирни кўрпа устидан гупиллатиб солади, бу ҳам етмагандай, тепасига ўзини ташлаб юборади, Тангир уни кўрпага кўшиб икки оёқлаб тепади, у кети билан столга урилади, Ҳасанбой чаққонлик билан чойнакни ушлаб қолади, Ҳакбердибай керишиб, қўноғидан тушади...

Сал ўтмай, стол устида нон, қанд пайдо бўлади, Тангир товукка дон сочгандай, майиз ташлайди. Керосинка устида чойнак жиғиллайди.

Гапимиз унча қовушмай, эртадан кейин бўладиган имтиҳон, домланинг қандай олиши хақида эзмаланиб ўтирамиз, Ҳакберди менинг бунисидан ҳам “беш” олишимни ерга уради: “Иккита “беш”дан кейин ким ҳам “тўрт” қўярди? Давомат учун “аълочи” чиқариш керак”. Чой дамланиб, баданга иссиқ ўтгандан кейин, гап қизларга кўчади. Биз билан олти ой ҳам ўқимай, оти ёмонга чиқсан, илинган билан юриб-юриб лип этиб эрга тегиб кетган Султонни ғийбат қиласиз, Ҳасанбой танглайнин чўқиллатади, Сувон ишшаяди, Тангир: “Бир йиғлаб кетганинг ўрнига кирганда шу ҳам”, деб сўкинади Ҳакберди кўзлари ўйнаб: “Шаҳарнинг қок ўртасига олиб чиқиб,

одамларнинг кўзича, панкиллатиб отиб ташласанг бунакаларни!”, дейди, ўзини танимасак ҳам, Султонга чув тушган ўша йигитга жўр бўлиб ачинамиз, Шоди ака ерга қараб, босилишимизни кутади... Бирдан Шоди аканинг олдида бефаросатлик қилганимизни англаб, гапни адабиётга буриб юборамиз. Ҳасанбой Шоди акадан: “Ит—вафо” деган қисса ёзаётган эмишсиз, ростми?”, деб сўрайди. Шоди ака юзига сирли тус бериб: “Эски китобларни бир қарашим керак”, дейди. Ҳакберди чимирилади. Ҳасанбой Шоди акадан агар қиссаси босилса, неча пул олишини сўрайди-ю, Сувон гуруллайди: буларнинг қишлоғи Тошкентга бир шоир етиштириб берган экан, шунинг Сувонга айтишича, “бети тўла” китобнинг ҳар сўзига уч тийиндан

эмис! Тангир ажабланади: “Шунча камми?” Сувон ҳисоблаб беради, Тангир баттар ажабланади: “ўх-ў! Шунча кўпми? ўзимиз ҳам кунига икки-уч юз сўмлик гап гапирав эканмиз-да, а? Шу гапларни ёзсан? Ҳасанбой Сувондан “Шеърга-чи?” деб сўрайди-ку! Сувон биз билмайдиган гапларни билишидан тоза шишиди: “Газетада босилса, қаторига қирқ-эллик тийин, китобдагисига етмиш тийиндан!” Бирдан Ҳақбердининг кўзлари ўйнаб қолади, мактабда шеър ёзганини айтади, битта, дуторга бағишланганини ўқиб беради:

Эшитиб хонишлиарингни мен
Тушунолмай бўламан ҳайрон:
Бир жуфт оддий торингдан чиққан
Куйинг бунча дилрабо, жонон?..

Ҳасанбой “Ў, уккағарнинг боласи!” деб юборади, мендан бошқа ҳаммаси лоп этиб ичимиизда тирик шоир пайдо бўлганига кувониб кетади, мен ўртанаман, Ҳақбердининг лаблари сўлжаяди, энди “Ям-яшил” деган шеърини ўқиди, бунисида яйлов ҳам, осмон ҳам, елиб бораётган чавандоз, ҳатто унинг арғумоғи ҳам ям-яшил бўлиб, Ҳақбердивойнинг туйғулари ҳам “мовий-яшил маъвода” учяпти экан.

Тангир жўшиб, Ҳақбердининг елкасига қоқади: “Шундай талантни ичингизда бижгитиб юрибсизми!” Тангирнинг бу тарзда оғиб кетиши менга сал ботади, биз билан яшаб турган бир писмиқ, бурнини шунаقا хунук тортадиган бир қитмир тўсатдан шоир чиқиб қолса, одамга алам қиласр экан. Яна оғзидан чиқаётган гапларни каранг: “арғумоқ”, “сарбаланд”, “яшил уммон”, “тотли дамлар”, “сарсари еллар”, “маъвода”. “Маъвода”сини мутлақо билмас эканман, Ҳасанбой сўраган эди, Ҳақберди: “Масканда дегани” деб тушунтирувди, ичимда роса мулзам бўлдим: мен “мабодо” сўзи шеърда шунаقا —“маъвода” ёзилади, деб ўйлаган эканман, худо бир асраб қопти: Ҳасанбой сўрамаса, “Шуни “мабодо” тўғри деб ёзса бўлмайдими, китобий жимжима ҳақиқий поэзияга ёт”, деб санчиб олмоқчи эдим.

Тўсатдан Сувонбой қарсиллатиб ғазал ўқиб ташласа бўладими! Ёпирай, кесакдан ҳам ўт чиқиб қолди-ку, деб анграйиб бошловдик, йўқ, ҳартугул Чархийникини ёддан айтибиди.

Шуниси маълум бўлдики, мендан бошқалари ёзув-чизувга аралашган экан: Ҳасанбой мухбир, хабарлари район газетасида босилган, Тангир ҳикоя ҳам, шеър ҳам ёзган кўп қиррали ижодкор, Сувон мактаб кечаларида шеър ўқиган. Йунилган таёқдай қуп-қуруғи ўзим...

Бирдан гапимиз бир сакраб бу йилги қорга, сўнг шундай қорда кўй боқадиган чўпонларга, айни шу пайтлари қўйга қирон келтирадиган бўриларга ўтиб кетади. Отаси чўпон, ўзи чўлиқ бўлиб кўрган Тангир гапириб яйрайди, менга “сарт” деб тегишиади, шу пайтгача тирик бўрини қўрмаганимга кулиб, мен “сарт”ни чўлда “эшшакдай-эшшакдай” бўрилар борлигига ишонтиришга уринади, унга Ҳақберди қўшилиб,— у ҳам даштлик,— мени лақиллатишга чоғланади, уларнинг ёлғонини эшитмаганга оламан, бунақа тортишувлар кўп бўлиб, охирида ҳамиша ўзим ютганим учун, киприк қоқмай уйдирма тўқишига ўтаман: “сувда сузадиган, ҳавода учадиган, филларни ютиб юборадиган бегемотларни” телевизорда қўрсатишганини айтиб, Шоди акага имо қиласман, Шоди ака босиқлик билан “бўлиши мумкин”, деб қўяди, Тангир содда бола — лақقا тушади, кизиқади, лекин илгари ҳам кўп марта шундай ангда қолганидан, ўзини ишонмаган қўрсатади. “Кўй-э, роса опқочасан-да”, дейди-ю, давомини эшитишига шошилиб туради, Ҳақберди истехзо билан: “Қайси эшиттиришда, қачон кўрсатди, числоси, числоси?”, деб ўсмоқчилайди. Сувон бунақа гапларга кўп ҳам ақли етмаганидан: “Шундай денг, э-э, шундайми...”, деб ишшайиб ўтиради. Ҳасанбой ёлғон гапираётганимни билиб турса ҳам, индамайди. “Гурунг зўр бўляпти-да”, деб илжаяди — бечора, бизникида сифинди, бир жой топган экан, жуда нобоп, совуқ, йиғма каравотини елкалаб ялиниб келди, сиқилишиб жой бердик, энди биронтасига сал мундайроқ гапирсам: “Кўтар кўрпангни! Қури!”, деб юборишимиздан чўчийди, жилла курса кўкламгача, кунлар исигунча, ё биронтамиз ётоқ-потоқча ўтмагунча, илжайиб чидайди. Ҳасанбой келганидан бери Ҳақберди мени сикиб чиқариш пайида, ҳатто деразадан совуқ урадиган каравотини унга бериб, ўзи менинг жойимга ўтишини ҳам ваъда қилган, аммо Тангир мен тараф, Сувонга эса бари бир...

Одамнинг ҳаёти тез ўзгарап, олдинга ё орқага кетар, ўзи ҳам ё яхшиланар, ё паст тушар, аммо феъли бирдай тураверар экан, мен буни Ҳақбердида кўрдим, ҳали ҳам ўша-ўша, фақат биқиниб олган...

Хозирлари дарсимда санама-растадай тизилишиб ўтирган қизларга, дадил-дадил йигитчаларга қараб турсам, гўё булар ўсиб кетгандай, ўзим эса уни ҳануз ўша биринчи курсдаги содда ўспирин, болалигим ҳозиргача этагимга ёпишиб юргандай туюлади...

Битта мен эмас, ҳарбийни битириб келган ва ўқишига уч-тўрт марта думалаб илинган каттароқ йигитларни айтмасам, қолганимизнинг қизлар, севги ҳақидаги тасаввурларимиз беш-олтита китоб билан “Сангам”га ўхшаган фильмлардан узокқа боромас, курсдош қизлар билан ҳатто кечалари бирга сайрга чиққанда ҳам, кўнглимизда минг турли эҳтирослар жўш урса ҳам, буни бирон сўз, бирон ҳаракат билан билдиришга юрак

бетламас эди. У пайтлари қизлар—маъбуд, бўса—илоҳий! Севадиган қизимизни ўзимиздан жуда устун қўйиб, кейин ёнига йўлашга чора тополмай юрар эдик. Тангир Гулчехрани ким қанақа баландда тасаввур қилганиданми, икки йил ўпкасини қўлтиқлаб чопиб, охири, учинчи курсда уни “қўлга киргизганида” ҳафсаласи пир бўлиб, шундай деган эди: “Кўлини қайириб, бошини бурганига кўймай, мана, мундай қилиб ўпсам... Жўра! Шўртак бир гўшт! Лаъл лаблар дейишади яна! Бетимга тарс этказиб соп қолди. Э-э, бор-э, дедим... Фирт ёввойи-ей” Кейин у ҳафта сайин ўпишишдан тотли-тотли там топа бошлади-ю, ҳар учрашувдан кейин Гулчехрани “ташлаб”, мен билан: “Энди олдига борсам, одам дема мени! Кўлни ташла: битта конъяқдан!” Кейинги учрашувдан бўғриқиб келади: “Конъяқ олиб келардим-у, пул йўқ, жўра”, деб ғўлдурайди. Битирад йилимиз, қишида Гулчехраларнинг хонасида устларидан кулфлаб ўтиришган экан, Тангир ҳадеб ёпиша-верганми, Гулчехра жаҳли чиқиб: “Канага ўхшаб сўраверасиз, шундан бошқа нарсаниям биласизми?” дебди. Тангир эси тескари бўлиб, менга келди: “Мен уни яхши қиз деб бошимга кўтариб юрсам... гапини қара!” Бирон ой—то яна Гулчехра билан топишгунча, фифонидан тутун чиқиб юрди. Гулчехра ҳатто жўрага ҳам айтиб бўлмайдиган нималаргадир ўргатиб

олдими, Тангир вазмин тортиб қолди, ўрталаридағи гап-сўзларнинг тафсилотларини мен билан ўртоқлашмай қўйди; “Гулчехрасиз яшолмайман”, деб юрган ошиқ, дипломни ола жуфтакни ростлади.

Лекин бу савдоларга ҳали бор.

Ҳозирча Ҳасанбой шундай орзу қиласди: “Агар ўзим яхши кўрган хотинни ололсам, уйдан чиқмайман, устимиздан қулфлаб оламан”.

Сувон ўзини баланд тутиб, масхараомуз: “Хий-я, хўрор!” дейди.

Тангир эса босиқлик билан: “Насиб қилгани бордир-да”, деб қўяди.

Камина эса, ўзимга биронтасининг мундайроқ қарашига ишонмасам ҳам, қайси билан юрсам, деб бош қотираман...

Курсимизда чиндан ҳам яхши қизлар кўп бўлган экан, аммо ўзимизга ишонолмай, эпини топиб гапиролмаганимиздан, “Э-ҳа, битиргунимизча булар қариб қолади”, деб пуф сассиқ қилиб юрганмиз. Очиғини айтганда, қизлар ҳам бизни писандга илишмайди, кўпроқ юкори курсдаги кийинишни кийиб қўядиган йигитларга қўз сузишади. Бирда-ярими билан дўстлашганимиз шу дўстлик билан севги ўртасидаги тўсиқдан ҳатлаб ўтолмай хуноб. Гапирмай деса, бу юриши мужмал, гапириб кўрай деса, бундан ҳам маҳрум бўлишдан кўрқади.

Флотдан қайтган Мавлон ака “популярний” деган сўзни курсимизга ёйиб, ўзимизча тилимизга мослаб олдик, маъноси шундай: қизларни гапга солиб, кулдиришни биладиганимиз — “популяр йигит”, оти тез-тез тилимизда айланадиган қиз — “популярка”. Сувон ҳисобда йўқ, қизлар унга, у қизларга қарамайди, чунки унаштирилган, ўша томонлардаги ғалати одат бўйича, “қайлиққа бориб” юради, Тангир “сал популяр”, Ҳақберди шўртумшук “нўл

популяр”, мен эса “анча популярман, аммо Ҳақберди: “Маҳдига ўхшаб қуруқдан-куруқ хотинларнинг холаси, қизларнинг дугонаси бўлгунча...” деб рангимни чиқармайди, падари қусур, тили ёмон, аммо тўғри сасиди.

Кейин, ўзимиз сезмаган ҳолда, аста-секин улғайиб, ўзимизни тутишни, кийинишни, қизларга муомалани ўргандик, бизга устунлик

қилиб турған юқори курслар битириб кетиб, қизларимиз эътиборида фақат ўзимиз қолдик, ҳатто баъзиларимизга улар тутилган буюмдай, охори тўқилгандай кўриниб қуи курслардаги “свежий” қизлардан битта-битта топиб олдик, “муччи-пуччи” деган қишлоқи гапларни гапирмай қўйдик.

Лекин ҳали бу гапларга икки-уч қовун пишиғи бор.

Хозирча Сувонни ўртага олиб, минг алдов билан “қайлиққа” борганда нималар бўлғаннни айттиришга уринамиз. Бу хумпар ҳам қайси жўраси билан боргани, янгасини қандай чақиргани, қайлиғи кутаётган уйга ўтаётганда қанақа кучук қувлаганини ошириб-шишириб ҳикоя қиласи-ю, бизга энг қизиқ жойига келганда: “Бағини айтиб бўмайди”, деб ишшайиб ўтираверади, илло авраймиз, ёрилмайди.

Лекин Шоди ака келган куни ундан уялиб, бунақа мавзуга ўтмаймиз, сухбат маданийрок кечади.

Ҳар хил таъсирланаётган битта кўнгил бўлиб ўтирибмиз.

Фақат Шоди ака гўё ичидан оғир бир сир-синоатни чиқариб ололмаётгандай, тўлгана-тўлгана гўяндалик қиласи,

“Ў-ўв, жўралар, сизларга сабр, менга тўзим, сизларга умр, менга ёш берсин, даврамиз тўлиб юрсин, муродларингдан айрмасин, жўралар-ов, бошладим, бошладик, ҳа, эшитганинг умрига барака!

Хў-ўй, юрган бир бола эдик, энамизнинг оппоғи, отамизнинг оппоғи, темирқанот полапон, кўзлаб учдик, катта шаҳарнинг тор хужрасига келиб тушдик, биримиз биримизнинг нафасимизни исказ туривмиз, кенг дунёни, кенг дунёдаги кенгкўнгил одамларни, кенгкўнгил одамлар орасида одамнинг кўнгли кенгайиб юришини, ўзимиз ҳам шу кенгликларга бораётганимизни билмай, жўралар-ов, димиқиб ётибмиз, ў-ўв, ўша кунларга чиқишни ўйламагандা, димиққанимизни қайдан билардик—ҳа-ё, насиб!

Жўралар-ов, қулоқ беринглар, хў-ўй, бу дунёнинг бир чинини сўйлаяпман, бир ёлғонини, ёлғоним — чин, чиним — ёлғон,— эшитган қулоққа бовли, қулоқ берганлар айтсин — қайсини сўйладим?..

Жаброилдан сўрабдилар, нега яхшиларни оласан, деб, Жаброил

уларни Боги Эрамга бошлабди, асоликка бир оғоч танлаб беринг деб, сўраганлар бир тик ўсган ниҳолга болта урибдилар, Жаброил айтибди, ҳамма яхшисини олади, деб,—жўралар-ов,—сўраганнинг жавоби ўзида экан...

Хў-ўв, дўстнинг тўйига борманг—ўзи есин, кулганида борманг — ўзи кулсин, баҳтини берманг — ўзи топсин, осмонга чиқса, тортманг — ўзи тушади, йиқилса, қараманг—ўзи туради, ярасини силаманг — ўзи битади,

жўралар-ов, ёлғизни йўқловсиз қўйманг, ёлғизлик — тузалмас дард, дўстнинг дардини олинг — ўзингиз тузаласиз, одамзод дунёга бир-бирини йўқлаб келади, йўқламаса келарми-ей, келган одам келганини хабар қилиб йиғлайди, кетган одам кетганини йиғлаганлардан хабар билиб ётади, келганиню кетганини мустар қўйманг, иккови ҳам ўзингиз — келган эдингиз, кетаб боряпсиз-эй, ў-ў, одамзоднинг йўли узун, ўнқири кўп, чўнқири бор, якка юрманг, жуфтдан келдингиз, жуфт топинг, сўрагандан сўрайдилар, берганга берадилар, кетаётгандан келадилар, муродингиз — ўзингиз, ўнгга юриб изланг-а — ўзингизга борасиз, чапга юриб изланг-а — ўзингизга борасиз, оғайнилар, кўнгилни кенг туting, Шу кенг дунёси — ўзингиз.

Ў-ўв, жўралар, кулоқ беринг, ўнгга салом бераман — чапдан алик келади, дунёсиннинг чапи — ўнг, чапга салом бераман — ўнгдан алик келади, дунёсиннинг ўнги — чап, осмонига тиклаб боқдим — турган еримни қўрдим, жўралар, одамни туккан еридан айирмасин, ё насиб, туккан еримиздан олган тупротимиз рост бўлсин, алқисса — яшайдиган жойимиз чаман одамзор экан — тўп гулдан товланиб ўсиб турибмиз...

Ў-ў, жўралар, дунёсида бир меҳмон эдим, Асқартоғнинг этагида мудраб ўтириб эдим, ташвишхонамни дову дастгайи билан елкамга елкалаб, қулоғимга бир товуш келди, етмиш икки томиримга етди, тур, деди, ирғиб турдим, тур деганнинг ўзини қўрмадим, жўралар-ов, эшитганимни айтяпман, эшитганимга эргашиб боряпман...

Йўл бошлайин, жўралар, ҳа-а, йўл тортайлик, Асқар деган тоғларга! Тоққа чиққансизлар-ай, тоғни қўрмагансизлар, кўнглингиз

тоғ бўлмаса, тоғни қайдан кўрасиз-аҳ! Тоғни севмаганлар қолсин шу ерда, тоғни билмаганлар юрсин Асқарга! Ҳе-ей, устига чиққанда ғафлат босмасин, ўнгига қараб кўрсин — тоғу тошни кўради, чапига қараб кўрсин — тоғу тошни кўради, орқага қараб кўрсин — тоғу тошни кўради, олдига қараб кўрсин — тоғу тошни кўради, осмонини бир кўрсин-ей — ўзи турган бўлади, жўралар-ов, баландда туриб ҳам ўзини кўрмаган қанча, пастда юриб ҳам баланддан қараётган қанча, жўралар, дунёсининг усти паст, пасти—уст-ов, одамзоддан баланди йўқ, ўша баландларга ўлмай етайлик, умидимизни етим қўймасин, одамзодга азобидан баланд сабот берар экан...”

Шоди ака атрофига тўртта кўзани қуиб олган морбоздай муқом қилиб сўйлайди, кошлари, кўзлари бир зум ҳаракатдан тўхтамайди, биз—тўрт лақма, чопоннинг ичидан бўйнимизни чўзиб, Шоди ака имо қилган томонларга аланглаймиз, чапга салом берса — чапга бошимизни бурамиз, ўнгдан алик олса, ўша ёқда одам бордек, ўнгга қараймиз, ув тортиб хўй-хўйлаган пайтлари ғалати бир енгил ваҳмда баданларимиз жимиirlаб кетади. Шоди ака биз билмаган, эшиитмаган буткул бошқа бир дунёning ўнгу чапи, ости-устини таърифлайди, бир сир-синоат, телба сезимлар тўлқинига тушиб олган.

Биздан бир курс юкорида Рўзиқул деган курашчи бола ўқирди. Дароз, бадани бўштоб, қорни ҳам анча туртиб чиққан, бурни пастга солинтирилган

бошмалдоққа ўхшар, полвонлик сиёғи йўқ, лекин икки йилдан бери кураги ерга тегмаган эди. “Бу — бир палакат, жинниси бор, курашда шу жинниси келиб, енгиб беради”, дейишарди. Унинг курашига тўп-тўп бўлиб борамиз. “Ана, мана, жинниси келяпти”, деб жон ҳовучлаб ўтирамиз. Тўшакнинг нарёғидан ҳар оёғи йўнилмаган болордай, нақ Аҳраман девнинг ўзи мўйлов бураб чиқиб келади, бу томондан эса ҳалпиллаган иштонини кўтариб қўйиб, зинкайиб Рўзиқул бораверади, бел ушлашади, Аҳраман дев сиқимлаб ўзига тортганда, Рўзиқулнинг чайир оёқлари дир-дир титрайди, бир-икки айланишгандан кейин Аҳраман дев “Хў-ўф!” деб хитоб қиласида-да, Рўзиқулни ердан узади, кўтариб уради, аммо Рўзиқул тўп этиб оёғида ўнг тушади. Яна бел тутишади, Аҳраман дев “хў-ўф!” деб наъра

тортиб, яна Рўзиқулни кўтаради, аммо боягидай кўтариб уролмайди, Рўзиқул оёқлари билан Аҳраманни акашакдай чирмаб, қотиб тураверади, зўр берганидан Аҳраманнинг кўзлари олайиб кетади. Рўзиқул қалтирайди, бирга думалашади, Рўзиқул унинг тагидан мушукдай сирғалиб чиқиб кетади, яна думалашади, кураш ҳаками уларни ажратади. Энди Рўзиқул худди курашни ташлаб кетаётгандай тўшак четига келади, Аҳраманга томон ўгирилиб шум тиржаяди, худди куй бошланишини кутаётган раққосдай кўлларини кериб кўтариб, бармоқларини пастга солинтиради-да, бирдан ингичка, чинкироқ, одамни сескантирадиган ғайритабии овозда “Хий-я!” деб қийқиради елкаларини ўйнатиб, қийпанглаб Аҳраман девга қараб бораверади,— “жинниси келгани”, яъни жунуни қўзигани шу, жунуни қўзиса, унга одам зоти бас келолмас эди,— тўғри келиб Аҳрамаяга чил беради, Аҳраман гуппа учеб тушади, кўзларининг пахтаси чиқиб яна Рўзиқулга ёпишади, Рўзиқул ҳийя-ҳайялаб яна чил беради...

Рузикул талай мусобақаларда қатнашиб ютиб чиқди, шу, эсимда йўқ, Ўзбекистон чемпиони бўлган эдими, бўлмоқчи эдими, яна бир жунуни очилиб қолди — полвонпақирнинг қўли эгри экан, ўғирлик устида кўлга тушиб, кўлга туширганни уриб, ҳайдалиб кетди.

Лекин жунуни борлиги рост, у йиқитган полвонларнинг келбатини кўрган одам бунга шак келтиролмас эди.

Шоди аканинг баданида ҳам Рўзиқулнинг жунунига ўхшаган нимадир бор эди. Алдармиди, рост айтармиди, нега шуларни ёзмайсиз, десак, ёзолмайман, чунки фақат шундай - сизларга ўхшаганларга қараб сўз бошлаган пайтимда келади калламга - бирдан кўнглимга ваҳий тушади, шуларни анавиларга айт деб қулоғимга пи chirlab туради, айтиб бўлганимдан кейин кетади, ҳамма гапни ўзи билан олиб кетади, каллам бўм-бўш бўлиб қолади, дер эди.

Ваҳийнинг қай вақтда келишини ҳам биламан, дер эди, аввал кўкрагим куюшиб, ҳаво етмаётгандай бўлади, демак - яқинлашяпти, шу вақти деразага қарайман, шунда бюиламан - келдими, йўқми, йўли ойдинлашади, гара деразадаги ҳар бир чизиқни, ҳар бир бурчакни, ҳатто анави бурғи билан тешиб, чўп қоқилган жойигача аниқ, дона-дона кўрсам, шу кўрганламимнинг

ҳаммаси бир-бирига уланиб, бирикиб, битта нарсага ўхшаса - бўлди - келди! - каллам тиниқлашади, ичимдан бир нарса кўтарилиб чиқади, кириб улгурган бўлади-да, кейин чиқади, айтмоқчи бўлган гапларимни бирор шивирлаб тургандай кўнглим диркиллаб кетади...

Баъзи пайтлари эса бизни қойил қолдирганидан талтайиб, айтганларимни қофозга туширсан, кучи йўқолади, ҳамма гап - товушимда, буларни ўқиган билан бирор бир нарса англолмайди, ўзим гапириб беришим керак -ҳамма тилсим ўзимда, деб қўяр эди.

Атайлаб шундай қиласмиди ё ўзи ишонармиди, ҳозир ҳам тушунмайман, Шоди ака аниқ-равшан нарсалардан ҳам доим бир сир-сабаб кўрар эди. Ҳатто бошининг оғришини ҳам ота-бобоси, аждодларининг шажарасига олиб бориб тақар эди:узоқ ўтмишда, нодиршоҳми, ундан бошқасими бостириб келганда ўн олтинчими, ўн еттинчими авлод олдинги бобоси жангга чиқиб, бошидан қилич еган экан-у, ўша жароҳатнинг оғриғи Шоди аканинг бошида қўзғалаётган эмиш, чунки ўша бобокалони қилич теккан заҳоти ўлган бўлиб, оғриқ яшамай қолган, ҳар бошланган нарсанинг охир топишига кўра, келиб-келиб энди қўзғалаётган эмиш.

"Ўнинчида ўқиётганимда ўша бобом тушимга кирган. Тушимда катта бир тошойнанинг олдида туриб, четидаги ўйма нақшларни томоша қилаётган эканман. Бирдан ойнанинг ичидан: "Шодибек, ўзингни бир кўриб қўймайсанми?", деган мулойим товуш эшитилди. Бундай қарасам, ойнада, не кўз билан кўрайки, салла-совут-қалқонда ўзим турибман, бошим яланг, салла йўқолиб қолди, пешанамнинг манави ерида бир энли, қип-қизил қони шўрғалаб турган жароҳат - қиличининг изи! Бақириб юбордим. Уйгониб кетибман. Нариги уйдан энам чопиб келди. Сув ичирди. Пешанам зирқираб оғриётган эди. Шу-шу, миям санчадиган бўлиб қолди. Аслида, ойнада ўзим эмас, ўша - неча юз йил бурунги бобом, айни шу бошидан қилич еб ўлаётган чоғида кўринган экан. Бунинг ҳеч ажабланадиган жойи йўқ. Оламдаги ҳамма нарса наслдан наслга ўтади, такрорланади, суюк суради. Мен отамга ўхшайман, отам - бобомга, бобом ҳам отасига, шу тахлит давом қилса, кетаверса, табиатнинг ўша қадимда яшаб ўлиб кетган бобокалонимизни менда такрорлаган бўлиши ҳеч гап эмас,

кўнглим ёмолн нарсани сезади, мениям ўша оғриқ олиб кетади-ёв...”

“Сизлар кўп нарсани тушунмайсизлар. Мана, ҳадеб Султонни сўқасизлар. Лекин унинг нимага шу аҳволга тушганининг тубини ўйлаб кўрмагансизлар. Аслида, Султонда гуноҳ йўқ. Ҳамма иллат - аждодида: ё онаси, ё бувиси, улар ҳам тоза чикса, ё она томонидан, ё ота томонидан уруғида қайси бир асрда яшаган бирхотин бузук бўлган, оқибатини ўйламай бузуқлик қилиб қўйган. Энди ўша бузуқлик кейинги авлоднинг қонига ўтиб қолганда, тинч юриб-юриб, охири, Султоннинг баданида уйғонган. Султон пгўрлик буни билмайди, эркаклар билан ётиш ўзимга ёқади, деб ўйлайди, аслида, уни шу иллат чақиради, шунинг қўлидабир ўйинчоқ, уни енгиш мумкинлигини хаёлига ҳам келтиrolмайди, сехрланган. Энди бари бир,

унинг биронта боласими, неварасими, баданига эрк берса, бўшлиқ қилса, бузук бўлиб қолади. Битта матал бор: карвон кечувдан ўтаётганда битта тия сувнинг ўртасида тўхтаб қопти, тякаш ҳарчанд урса ҳам жойидан қимирламабди, шунда карвонбоши — кўпни кўрган кекса тякаш экан,— ёш тякашга урма, пешоб қилсин, бўлмаса, юрмайди, бунинг онасининг онасида шунаقا одат бор эди: ақлсиз ҳайвон, доим шу кечувда сувнинг ўртасида тўхтаб пешоб қиласди, боласи бунақа қилмаган эди, неварасига ўтибди, уруғида бор экан-да, дебди. Энди, жўралар, тякарвоннинг йўли юз йилда ҳам битта бўлиб тураверади, одамзоднинг юрар йўли кўп, яхши эркакка тушса, Султондан ҳам яхши хотин чиқиши мумкин, аммо иллат қолади...”

“Мана, яшаяпмиз, ўқиб ётибмиз, мустакил бўламиз, деб ўлибириламиз, феъли-хўйимизни фақат ўзимизники деб биламиз, лекин мундай танамизга ўйлаб кўрсақ, бир хислатимиз отамиздан, бир хисла-тимиз бобомиздан, уларга ҳам ўзидан олдинги отабоболаримиздан ўтиб келган. Бир хил зўр одамлар бўлади, гавда кетворган, важоҳат қоплондай, отаси ҳам, бобоси ҳам полвон ўтган, аммо ўзи шу соҳт-сумбат билан ўлгудай қўрқоқ. Нимага шундай? Сабаби жуда оддий — ота-бобосидан бурунги аждодларидан би, онта одам қўрқоқ бўлган, қўрқоқлик буларнинг ғуурига кириб қолган-да, келиб-келиб шу одамнинг қонида уйғонган, гавдасига қарамаган.

Энди, сизлар ҳаммаси олдинда бўлган бўлса, қайтарила варар экан, деб ўйламанглар. Одамзодга ирода, чидам, манави калла нима учун берилган—тўғри яшасин деб! Демак, жўралар, одам тоза яшаши, иллатга бўй бермай, ёмон ишлардан ўзини тортиб юриши керак. Бир хил одамлар зимдан гунохга ботади, ими-жимида юрибман, ҳеч ким билмайди, деб ўйлади — бекор гап. Ўзи билади-ку! Унинг гуноҳи кейин боласидами, неварасидами, чевара расидами, лоп этиб юзага чиқиб қолади. Одамнинг билган нарсаси кўнгилга ўрганиш бўлади, кўнгилга ўрганиш бўлган, битта одамнинг одатига айланган иллат унинг қонига ҳам ўтади, кейин сувак суради. Тирик одам ўз авлодининг қонини тоза тутишни ўйламаса, дунёсининг дунёлиги қоладими...”

Шоди аканинг шундай лақки донишмандлиги бор эди: “Э-э, жўралар, гўрмиз, билмаймиз, ҳали бошимизга кўп савдо тушади, яхшимизнинг ёмон ёмонимизнинг яхши бўлиб кетиши бор...”, деб юрарди.

“Кўраман ҳали”, деб қўярди, гўё бизга хаёт эмас, унинг ўзи кўрсатиб қўядигандай...

Шоди ака жуда ёмон ўқирди, имтиҳонлардан ҳар йиқилиб чиққанида, елкасини деворга бериб: “Э-э, бу илмларинг бизга тўғри келмайди-и”, дея синик илжайиб тураверарди.

Ёлғончи эди, гуё бормаган жойи, кўрмаган юрти йўқ, хаёлига келган уйдирмани, орқа-олдига қарамай, чиппа-чин қилиб гапириб ташларди. Унга ишонсақ, бурноғи йили биргина августнинг ўзида колхозда ҳисобчилик қилиб, бир қизни яхши кўрган, уни олиб кочаётганда қўлга тушиб, ўлимичи калтак еган, геологларга қўшилиб, Помирнинг аввал Сангизамин, кейин

Сангисмон деган тоғларида қон қидирган, Булунғур вино заводидан бир цистерна “Олмазор”ни қўриқлаб бораётиб, Арис деган бекатда улфатлар орттирган-да, қирқ кунча ичib ётаверган, цистерна яримлай деганда, милициянинг қўлига тушиб, ўн беш кунча қамалган, шу кўйи Қозоғистон даштларида ўримда ишлаб қолиб, қайтаётганида топган уч минг сўмини қартага ютқизиб қўйган, институтга имтиҳон топшириб, “соққасини чўзолмагани учун”, мандатдан йиқилган бўлиб

чиқар әди. Ҳаммаси шу биргина августнинг ўзида! “Москвада ишлаб юрганимда, аҳмок, биринчи хотиннинг гапига лаққа учиб, Таллиндан уй сотиб олибман, уч ойдан кейин ҳавосининг намлигига чидаш бермай, уйни хотинга ташлаб, ҳайё-хуйт, буёкқа жўнаб келавердим”, деган гапларни айтиш унга чўт эмас әди. “Алдаяпсиз”, десак, “Ишонмасанглар, Таллиндаги ратушада Айво Пурккала, иккита “к” билан ёзилади, шунақа жўрам экскурсовод бўлиб ишлайди, хат орқали сўранглар. Э-э, у билан неча марта қисқичбақа ушлагани чиққанмиз. Пивога жуда зўр кетади-да”, деб гапни бошқа ёққа бурарди. Ишонмасак ҳам кўнглимизда шубҳа туғилади, уй сотиб олмаган бўлса ҳам, саёҳатга боргандир, йўқса, ратуша деган нарсаларни қайдан билади, пиво ичганини гапиряпти-ку, деб ўйлаймиз. “Шоди ака, рости ни айтинг, неча марта ўйлангансиз ўзи?”, деб сўраймиз. (Қизикда — қайсисига қандай ўйланганларини айтиб беради.) Шоди ака бошини орқага ташлаб, кўзларини юмиб олади-да, ҳисоблаб чиқади: “Бу хотиним Туйғун—олтинчи, йўқ, еттинчи, йўғ-а, биттаси билан ўн қунгина яшадим, ҳисоб эмас, тўғри олтинчиси экан”. Куламиз: лақиллатаётганини билиб турамиз, аммо олти-етти марта ўйланмаган бўлса ҳам, шунчаси билан юрган чиқар номма-ном, адаштирмай айтяпти-ку, деб ҳавасимиз келади.

“Маъдивой,— отимни ўзича шунақа ўқимишли қилиб айтарди,— буларингизни қўйинг—оддий одамлар, мени алдайди деб ўйлашади,— деган әди бир марта.— Сиз бошқа, менга ўхшайсиз. Иккаламиз бу тўданинг ичидагимлик авгурлармиз. Рим авгурларини биласизми? Иккитаси кўча тўла оломоннинг ичидаги учрашиб қолса, мана бундай қилиб, кўз уриштириб, имо қилишар экан. Шу имода, каранг, булардан қанчалар баландмиз, деган маъно, оддий одамлар уч кечакундуз ётиб муҳокама қиласиган гапларнинг мазмуни бўлар экан. Баъзан-баъзан буларга қўшилиб, менга ишонмай қоласиз. Унақа қилманг, мен рости ни айтаман, ёлғон гапирмайман. Одам бир марта гина яшайди, шу умри ҳам жуда қисқа. Қайта туғилишнинг иложи йўқ. Шундай экан, берилган умрни бир марта эмас, такрор-такрор, қайта-қайта армонсиз яшаб олиш керак. Мен шундайман: колхозда ҳам ишлаганман, Помирга ҳам, Павлодарга ҳам борганман,

институтга уриниб кўришни ҳам эсдан чиқармаганман, ҳаммасини қилганман, шу бир ойнинг ичида, бошқа қай вақтда қиласман, у вақтларнинг ўз ишлари бор, нега буларингиз ишонмайди, ичимга кириб чиқишимаган-ку, хайронман, факат кўрсатганингни кўради одам бунақа булмаслиги керакда...”

“Яшаш зерикарли-да,—дер эди у яна.—Шу юриш-туришимга ўзимдан ҳам бир нарсалар қўшиб турмасам, бўғилиб кетаман...”

Шоди аканинг ўша бормаган Помирида кўрган бир одам-ёввойи чолдан эшитган ҳикояси бўларди, чолнинг бошидан ўтганми шундай воқеа ё Шоди аканинг ўзи тўқиганми, бирон эртак китобдан ўқиганми, ишқилиб, биз учун жуда қизиқ, кўзларимиз ёниб, юрагимиз гумуриб эшитар, айтимчимиз кетгандан кейин, айни имтиҳонлар қисталанг пайти шунча вақтимизни лак-луқ гап билан олганига хуноб бўлиб, орқасидан сўкар эдик...

Шоди ака гўё ўша геологларга эргашиб, кон қидириб чиққанда, Сангиосмон деган кимсасиз жойда шу чолни учратибди. Бир чолки, ҳар елкасига иккита Сувон бемалол сифиб ўтирас, ҳар билаги бизларга ўхшаган йигитнинг сонидай келар, бўй-басти, ҳай, билмадик, бу эшикларга сифмас экан. Кўзи ёмон, тикилса одамни тешиб юборар эмиш. Юзида кўндалангига тўртта чуқур-чуқур чандик бор экан.

Шоди ака ҳамма гапни шу чандикдан келтириб чиқарган, бир айтганда, ўн беш кун, бир айтганда, бир ой, яна бирида кирқ кун деганда чолнинг кўнглини топиб, нега одам оёғи тегмаган жойларда ёлғиз яшаётгани, бошига қандай кулфат тушиб буёқларга келиб қолганини сўраган, чол ҳам азбаройи Шоди акамизни яхши кўриб, кўнглига яқин олганидан, олис-олис, баланд-баланд чўққиларга қараб чуқур ух тортган-да, саргузаштини айтиб берган...

Чол йигитлигига осмондаги бургутнинг кўзидан, учеб бораётган пашшанинг қанотидан бехато урадиган, отган ўқи тегмаса, қайта отишни ор биладиган довқур овчи бўлган экан. Бошқа қишлоқ, бошқа уруғдан бир соҳибжамол малак билан аҳд-паймон қилиб, қизнинг отаси, қариндошлари қаршилигини қандай енгишни билмай, боши қотиб юрган кезлар. Энди бизлар билмаймиз, балки Ҳасанбой хабардор чиқар, ўёқда бир уруғ бир уруғга қиз бермайди, удуми жуда

қаттиқ—удумнинг бузилиши қон тўқишига олиб келар эмиш...

Худди шу кунлари тоғда бир айик пайдо бўлиб, атроф қишлоқларга дориб, кунда-кунора бир сигирними, хўқизними гумдон қилиб кетаверибди. Кўп овчилар айиқнинг пайига тушибди, аммо изнинг ўзи йўқ, томдай-томдай буқаларни олдига солиб, мўнгратиб ҳайдаб кетаётганини кўрган одамлар бор, аммо айиқнинг на ўзи, на макони бор, қаёқдан келиб, қаёқка кетганини ҳеч ким билолмас экан.

(Шоди ака бу айиқнинг сирини тоғлик соддалар билмаган, мен биламан, деган маънода қошларини учиради, ҳикояси ваҳималироқ чиқади.)

Бу орада овчи йигит ҳам милтиғига тўнғизўқдан жойлаб, айиқни ҳеч ким отолмайди, лекин, мана, биз отамиз-да, деб тоғу тошни кезади, бирон белги, из тополмагандан кейин, ҳеч қанақа айик йўқ, одамларнинг кўзига кўринган, ваҳқма гап, деган хулосага келади-да, айиқни кўрганлардан суриштириш баҳонасида севгилисининг қишлоғига бориб, у билан гапни бир жойга қўяди, униси эртаси куни тунда тутунчасини култиклаб, уйларнинг оркасидаги чорборда кутадиган, буниси келиб олиб қочадиган бўлади, шунақа ваҳимали дамларда бу ишимизни ҳеч ким билмай қолади, деб ўйлади овчи.

Шартлашилган куни овчи кеч кириши билан йўлга тушади. Тоғ оқшомлари ёмон қоронғи, овчига бунақа қоронғилар чўт эмас, соҳибжамолнинг висолига етишни ўйлаб, тошдан-тошга сакраб, йўлбарсдай йўл танобини тортиб бораверади. Икки томони тиккалаб кетган чуқур даранинг тор бўйнига келганда, худди кўқрагидан бирор итаргандай юролмай, таққа тўхтаб қолади, сабабига ўзи ҳайрон, коронғига синчиклаб тиқилса, беш қадамча олдинда бир қорувли одам қотиб турган эмиш! Кўркув нималигини шу пайтгача билмаган овчини бирдан вахм босибди, гўё кўрқадиган нарсанинг ўзи йўқ эмиш-у, аммо юраги потирлаб кетаверармиш. Зўрға тили калимага келиб: “Ҳўй, ту ки, инсми, жинсми? Жавоб гў? Бўлмаса отиб ташлайман!”, дебди. Жавоб ўрнига ҳалиги одамдан бир ғулдираш эшитилибди. Овчининг юраги тубга тортиб, сочининг ҳар туки бигиздай тиккайиб, каллапўшини кўтариб юборибди: қараса, олдидаги қора ҳеч қанақа одам-подам эмас, катта, баҳайбат,

гумбаздай ҳурпайған айиқ! Оёғида тикка туриб олганидан одам бўлиб кўринган экан. Энди қизифин эшитайлик: овчи ҳадаҳа елкасига қўл юборса, милтиғи йўқ! Уйдан чиқаётганда мойлаб, ўқлаб, тахт қилиб елкага олган милтиғи йўқ! Овчи тахтадай қотибди, ҳа, ўлдим энди, шунча жондорни бежон қилдим, ўзимнинг жоним ҳам жондорнинг қўлида экан, деб калима қайтарибди. Лекин айиқ унга ташланмабди, шу турганича худди бир нарсани тушунтирмоқчидай ғуруллайверибди. Овчи сал-пал эс-хушини тўплаб, аста-аста орқага тисланибди, айиқ ҳам бу ишинг тузук дегандай, ғур-ғур қилиб турибди. Овчи сал узоқлашгандан кейин, орқасига қайрилиб қочибди. Энди яна қизифин эшитайлик: қочиб бораётса, думбасига тўп-тўп қилиб қаттиқ бир нарса урилармиш, қўлини орқасига юбориб, ушлаб кўрса - қўндоқ! Милтиқ елкасида экан! Овчини қора тер босибди, бир ҳарсангтошнинг устида ўтириб, белидаги белбоғини ечибди-да, терини артибди (шу жойи эсингизда турсин), боя эсим тескари бўлиб, елкамдаги милтиқни тополмабман-да, деб жаҳли чиқибди, милтиқни қайта ўқлаб, орқага қайтибди. Милтиқни маҳкам чангллаб, ҳалиям йўлда турган бўлса, падарлаънатини варанглатнб отиб ташлайман, деб пусиб-қапишиб бораверибди.

(Шоди аканинг юзида, ҳа, нодон-а, бунақа айиқни отиб бўладими, деган сирли-норози ифода ўйнайди.)

Бир вақти шундай қўлоғининг тагидан бояги ғуриллаш чиқиб, ҳатто айиқнинг иссиқ нафаси бетига урилибди: шундоқ ёнгинасида турганмиш! Милтиқ эса бу томонга қараган, то ўнглаб, тепкини босгунча, айиқ унинг ўзини таппа босиши мумкин. Аииқ яна боягидай ғуриллаб, кет-кет, дегандай товуш қиласмиш. Овчи яна орқага қайтибди, яна тошнинг устида ўтириб ўйлабди. Йўлга тушса, яна шу ҳол: қархисида айиқ турибди! Шунда овчининг қони қайнаб, айиққа: “Ҳўй, хирси гўрсўхта! Чи ба ту роҳи ман банд куни? Даф шуд-э, падарашибба лаънат!”, дебди. Падарашибба лаънат, деганда айиқнинг жаҳли чиқибди, овчининг бошидан ошириб, бир тошни отибди, тош тепадаги ҳарсангларга урилиб майда-майда бўлиб тушибди. Овчининг қайфи учиб кетибди, лекин билибдики, айиқ унга даф қилмоқчи эмас, бўлмаса, тошни тўғри мўлжаллаб отарди. Хуноб бўлиб, аҳволини

айиққа тушунтиromoқчи бўлибди: “Хўй, менга қара, жўра! Мен севганимни олиб келишга боряпман. Нега йўлимни тўсасан? Сениям жуфтинг бордир, яхши кўрсанг керак, мениям тушун-да, ахир!” Айиқ эса жавоб ўрнига яна ғур-ғур қилармиш, қайт-қайт, дегандай бўлармиш. Жаҳли чиққан овчи милтиғини хавога тўғрилаб, устма-уст бўшатиб, айиқни қўрқитмоқчи бўлибди, аммо ҳарчанд тепкини босармиш, тепки чиқ-чиқ қилармиш-у, милтиқ отилмасмиш...

(Шоди ака нодон овчининг устндан муғомбирлик билан кулади: худди айиқ ўзиники, ҳамма гапни унга ўзи ўргатгандай.)

То шунаقا олдинга юр, орқага қайт, айиқ билан гаплашиш, унга ялиниш билан тонг ҳам отибди, атроф ёришибди, бирдан айиқ ғойиб бўлиб қолибди, аммо энди фойдаси йўқ — кун ёйилганда қизнинг қишлоғига борищдан ҳеч қандай маъни чиқмайди. Овчи аламидан милтиқни осмонга қаратиб тепкини босса, гумбурлаб отилибди. Куйингганидан нима қилишини билмай, ўтирган жойида милтиқни гумбурлатаверибди. Бир вақт кўрса, ўқ тугаган. Йиғлагудай бўлиб, қишлоғига қайтибди. Шу куни ёқ озиқ-овқат билан ўқ-дорини ғамлаб, қандай бўлса ҳам севгани билан топишишга тўсқинлик қилган бу ғаламис жондорнинг суробини тўғрилаш учун йўлга отланибди. Овчи одамга овидан енгилишдан ҳам кўра шармандалик йўқ, то уни терисини шилмагунча, қайтмайман, деб сўз берибди ўзига.

Кечаси айиқ билан тўқнашган жойига келиб, бу ерда айиқнинг биронта изини, белгисини тополмабди, ҳалиги айиқ отган тошнинг бўлаклари ҳам, теккан жойи ҳам йўқ, айиқ турган жойларда эса биронта ҳам тош-пош силжимаган, биронта ўт-майса эзилмаган. Овчи одам, айиқ тугул каклик йўрғалаган жойдан ҳам белги топади, жуда ҳайрон бўлибди, аммо йигит сўзидан, арслон изидан қайтмайди, ахтариб кетаверибди. Олти кун тентираабди, еттинчи куни пешинда ниҳоят из топибди: бир эмас, иккита,— бири айиқники, бири молники, шу издан дараклаб бориб, айиқни ҳам кўрибди, ўша кечаси учратганига қараганда, чоғроқ экан, энди ҳўқизни ёриб, жигарини ейман, деб тумшуғини қоринга тиққан пайти экан, нафси кутурганидан овчининг писиб борганини сезмабди, овчи унинг кулоғини мўлжалга олиб, бир ўқни жўнатибди. Айиқ бир ўқирибдию

чаппа қулабди. Худди шу вақти чўққининг орқасидан жуда ҳам ёмон, даҳшатли бир ўкирик ҳам эшитилиб, овчининг эси тескари бўлиб кетибди. Бир тошнинг панасига ўтиб, тепага қараса, чўққидан лапанглаганча бир айик, бир айик тушиб келяпти! Бу дунёning айиги эмас, манов ўлиб ётган айикқа тўртта келади! Ўша айик! Жуфтининг ёнига тушиб, исказ кўриб, чунонам ўкирибдики, ёру кўк титраб, тоғу тош ларзага келибди. Овчи милтиғини чанглаб, тура қочганини билади, қандай қишлоғига етиб келгани, қандай ётиб қолгани, қанча кун алаҳлаганини билмайди!

Энди бундан ҳам қизифини эшитайлик.

Ўша айик отилган, тоғдан бошқа баҳайбат айик тушиб, жуфтининг тепасида зор-гирён ўкирган куни овчининг соҳибжамол малаги ҳам бирдан қаттиқ оғриб, шу оғриши билан етти кеча-кундуз ана кетди, мана кетди бўлиб ётади. Тоғда табиб зоти борки, ҳаммаси келади, муолижа оти борки, ҳаммасини қўллашади, лекин бефойда — қиз ёниб тагига етган шамдай сўниб бораверади. Еттинчи куни, қиз тилдан қолиб, имо билан рози-rizолик тилашаётган пайтда, қариндош-уруглари тўпланиб, ыйи-сиги бошламоқчи бўлиб турган бир вақтда, тоғ томондан сочи ҳам, соқол мўйлаби ҳам қизғиш-сарик, баданини ҳам шунаقا жун босган, яланғоч, фақат овратини белбоғ билан яширган бир далли-девона лапанглаб тушиб тўғри касал ётган уйга кириб боради.

Қўлларидаги тирноқлари ўсиб қайрилиб кетган, оёқларидаги тирноқлари юрса, ерни тимдалаб, қатир-кутур товуш берар экан.

(Бу девонанинг қанақа девоналигини сезиб, жўр бўлиб: “Хий-й!” деб юборамиз, Шоди ака баттар жўшади.)

Девонанинг йўлини ҳеч ким тўсмайди, унинг важоҳатида одамни ўзига бўйсундирадиган, мен айтгандай қиласан, деган бир куч бор эди. Тўғри жон таслим қилаётган қизнинг бош учига ўтириб, ўзича ғулдираб, нималарнидир ўқийди, қиз кўзини очади, онасига қараб: “Сув беринг, чанқаб кетяпман”, дейди, кейин бирдан девонанинг белидаги белбоққа кўзи тушиб, ўйланиб қолади. Девона унга қараб бир нарсаларни ғулдирайди, бечора соқов экан, ҳеч ким уни тушунмайди. Девона қизнинг отасига қараб яна ғулдирайди, кейин

кўлидан ушлаб ташқарига тортиб чиқади, бир қиз ётган уйга, бир овчининг қишлоғи томонга ишора қилиб, ўзининг калласини унинг бошига яқинлаштиради, тўпланганлар уни ўйин туш-япти, деб ўйлаб кулишади, девона эса ерга ётиб, кўзларини олайтириб, ўлаётган қизнинг ахволини муқаллид қиласди, ўрнидан туриб, бир таёкни олади-да, милтиқ отаётган бўлади, тушунишмайди, кейин девона бир одамни ерга ётқизиб, бир одамга таёқ ушлатиб, кейин икковини қучоклаштиради, яна ўша овчининг қишлоғи томонга ишора қиласди, агар шундай бўлмаса, деган маънода бош чайқаб, ўзи узала чўзиладида, ўлган қизнинг ахволини кўрсатади. Нихоят қизнинг отаси тушунади. “Э-э, далли-девона, англадим нима демоқчилигингни, кўп ғулдирайверма, айтганингдай қиласми. Бўлди! Қизимнинг умри шунга боғлиқ эканми сен хоҳлагандай бўлади”, дейди-да, овчиникига бир отлиқни жўнатади...

Тушундингиз!

Девонанинг айтгани бўлибди: отаси кириб, “касалингнинг давоси шу эканми, она қизим, мен розиман, ўша йигитникига одам юбордим”, деганиданоқ соҳибжамол малакнинг рангига қон югуриб, ўрнидан туриб кетади. Буёқда эса хушхабарни эшитган йигит ҳам, алаҳлаши тўхтаб, иситмаси тушиб, бир кунда соғайиб кетади.

Ҳафта-үн кун ичида тўй ҳам бўлибди, тўйга соқов девона ҳам келиб ўтирибди, олдига овқат қўйишган экан, беш панжасини уриб, чапиллатиб,

тўкиб-сошиб ебди, чанқаган экан, куёв-келинга никоҳ ўқилаётган супага отилиб чикиб, овчи энди ичаман деган косани ундан тортиб олиб, никоҳ сувини ичиб юборибди. Овчининг ранги окариб, девонанинг белидаги белбоқقا тикилиб қолибди, девона эса унга қараб иржайгандай бўлибди. Ҳеч нарсадан бехабар одамлар эса девонани кула-кула нари ҳайдаб, хурсандчиликни давом эттираверишибди. Энди, тўй, расм-русумни биласизлар, куёв юзини бекитиб, то қизни уйига олиб кетишмагунча, сал паналаб юриши керак, шундай бир пайтда юрган бир девона, устига-устак соқовни қисти-бастига олиб, белбоғни қайдан олдинг, деб кувлаб юриш ноёнғай, овчини ғам босиб, хурсандчилик татимай ўтираверибди...

Девона эса худди ўзининг тўйидай ўйинга тушибди, бўкириб-гулдираб ашула айтган бўлиб, ҳамманинг ичагини узибди. Фагат унинг юзи овчига жуда қаҳрли, қасослидай қўринибди, кулишининг ҳам ириллашдан фарқи йўқ экан...

Келинни ҳам олиб келишибди, соч силатар, юз кўрсатар, бет очар деган расм-русумлар утиб, ҳамма тарқаб, эрталабига қизнинг оқ кўйлагини текширадиган янгалар ҳам қиқир-қиқир қилиб, ниҳоят уйқуга кетишгандан кейин, йигит соҳибжамол келинчагининг қўйнига киради, аммо, эй, эшитгандан нари, йигит одамнинг бошига бундай кулфат тушмасин!.. Ўзиям овчи шу девонани кўргандан бери, юрса, ер тортиб бораётгандай, мадорсиз, ичига чироқ ёқса ҳам ёришмай турган экан, бу ҳам устига-устак бўлиб, кўнглига ёмон хавотир оралабди: баҳти бойланган экан! Келин унга таскин бериб, кўнглини кўтармоқчи бўлиб, бир-икки оғиз сўз қотибди. Овчи шундан кейин ўша куни уни олиб қочиб келишга бораётгандা, йўлда айиққа дуч келиб ўтолмагани, кейин изига тушиб, унинг ўзини эмас, жуфтини отиб ўлдирганини айтиб берган экан, келинчак “воҳ!” деб қичқириб юборибди. Энди яна орқага қайтамиз: ху, овчи билан соҳибжамол аҳдлашаётган пайтда, уларнинг гапини қизнинг янгаси бодомнинг орқасига панараб, ҳаммасини эшитган, кейин оқизмай-томизмай эрига етказган, aka бошқа ака-укаларга, улар ҳам ўз навбатида отага, ота эса қизни уйга қулфлаб, кейин олтов-еттов қариндош бўлиб, милтиқларни шайлаб, келди — отамиз, деб чорбоғда пойлаб ётишган экан.

Буёгини энди ўзингиз тушуниб олаверасиз: нега айиқ овчининг ўйлини тўсган, нега ялиниб-ёлворса ҳам ўtkizмаган...

Шу вақт эшик ичкарига итарилиб, зулфинлари ўйнаб кетибди, кимдир эшик орқасида гуп-гуп юргандай бўлибди. Овчи ўрнидан турмоқчи экан, келинчаги даҳшат ичидаги маҳкам бўйнига ёпишибди. Овчини эса ичидаги бир куч ташқарига тортармнш. Ниҳоят келинчагининг қўлларидан бўйнини куч билан бўшатиб, эшикни очибди, ташқарига қараб икки одим ташлабди. Қараса, коронғида ўша соқов девона иржайиб турибди, овчи сал ўзини босиб: “Кет-э, ғойиб омадани хирс”, деган экан, девона куличини кериб, унинг

юзига шапалоқ тортиб юборибди, шапалоқ зарби шунақа кучли эканки, овчи қичқиришга ҳам улгурмай учеб кетибдию боши билан деворга урилибди...

Шу ётишида қанча ётган — номаълум, кўзини очса, тепаси тўла одам, қий-чув, уйдаги ҳамма нарса ағдар-тўнтар, тўс-тўполон, келинчак эса ҳеч қаерда йўқ, сим-сиёҳ ғойиб бўлган, бирор кўрувдим, демайди...

Ана шунақа, жўралар, сизга ёмонлик қилмаганга ҳаргиз ёмонлик қилманг—ўзингизга қайтади, овчининг келинчаги... Майли, давомини эшитинг.

Овчи ошнамиз энди айиқдан тайин ўчини олиш учун ўттиз тўқиз кун, милтиқнинг қайиши елкасини яғир қилиб, тоғу тошни кезади, кирқинчи куни, Сангиосмондаги менга кўрсатган ғорига етиб келади, бошини сукіб қараса, хотини ҳам, далли девона ҳам шу ерда! Девона хотиннинг тиззасига бошини қўйиб, пиш-пиш ухляяпти, хотин эса унинг қизғиши-сариқ, тикрайган соchlарини силаб ўтирибди. Кийимлари абгор, кўзлари бежо, бу ҳам бир девона! Овчи кўзини чирт юмиб, девонани отиб ташлабди, ёввойилашиб кетган хотин ириллаб унга ташланган экан, иккинчи ўқ билан бунисини ҳам тинчтибди. Девона эса жон бериш арафасида унга ўнгарилиб карабди-да, иржайиб... аслига қайтибди — айиққа, ўша баҳай-бат айиққа айланибди кейин ўлибди. Хотин ўқ теккан заҳотиёқ жон таслим қилган экан.

Овчи айиқни судраб чиқиб, ўша ердан гўр кавлаб қўмибди-да, хотиннинг жасадини елкалаб, тўғри қайнотасиникига кириб борибди, бўлган воқеани бир-бир айтиб берибди, милтиқни унинг қўлига тутқазибди. “Ўз қўлларинг билан мен бебахтни отиб ташланглар, бу дунёда яшагулигим қолмади”, дебди. “Ўша ғорнинг олдида ўзимни ўзим отардим-у, лекин манави, менинг жаддимга қолган бечора жанозасиз кетмасин, дедим. Мана, етказиб келдим, энди мени ўлдирсаларинг, улуғ иш қилган бўласизлар”, дебди.

Энди, жўралар, Помир халқи жуда мард келади, улар бекорга тоғда яшамайди, тоғда яшаган одамнинг кўнгли ҳам тоғ бўлади, дарди ҳам шунга яраша, шафқати ҳам, овчининг гуноҳига қонга — қон,

жонга — жон, дейишмабди, аксинча, “Хунингдан кечдик, ўзи сени худо жазолабди, у дунёингни ҳам, бу дунёингни ҳам кўйдирибди. Бор, кетавер, фақат қўзимизга кўринмайсан, дардимизни эслатмайсан, одамлар орасида яшамайсан”, деб айтибидилар.

Шу гап, жўралар, чолнинг юзидағи тўртта чуқур чандик ўшанда айиқ шапалоқлаганда қолган жароҳатларнинг изи экан, ўзи эса ўшандан буён шу кимсасиз жойларда ёлғиз кун кечирав, худодан рост ажал тилаб юрар экан. Чолни ўз қўзим билан кўриб, бошидан ўтганларни ўз қулоғим билан эшитмаганимда, ўша ғорнинг ичига кириб, қадамлаб ўлчаб чиқмаганимда, сизларга бу гапларни айтиб ўтиргаган бўлар эдим...

Ишонсанглар ҳам, ишонмасанглар ҳам—ихтиёр ўзларингда, чолни ўтган йили кўрган эдим, бақувват эди, ҳали ўлмаган бўлса, ўша кимсасиз жойла, да ёлғиз ғамини елкалаб юргандир. Айтиб бўладими, дунё асли ўзи кенг-у, лекин бандасининг юрар йўллари тор, бир тасодиф билан Помирга чиқиб Сангиосмон деган жойига бориб қолсанглар, шу ерларда Амиршо

деган овчи ўтганми, унинг келинчагини айиқ олиб қочиб кетганми, деб сўранглар. Ҳа-я, сал бўлмаса унтибман: шўрлик келинчакнинг отини Моҳирў деган эди овчи, Моҳира эмас, Моҳирў— помир-ча от...

“...Майли, Ҳақберди, сиз ишонманг,— дейди Тангир ўйланқираб.— Лекин қайси эртак бўлган? Ҳаммаси ҳам тўқилган-да.”

“Шу яшшимизнинг ўи ҳам тўқилган,— деб ту-шунтиромокчи бўлади Шоди ака.”.

“Жа-а, гап сотишни яхши кўрамиз-да,—деб киноя қиласи Ҳақберди.”

“Хотинни отган, одамлардан айрилган, бола-чакаси йўқ, ҳамма нарсадан маҳрум, нимага яшаб юради бу овчингиз?— дейди Сувон қизишиб.— Бир ўқ билан ўзини ҳам...”

“Э-э, сиз қизиқ экансиз,— деб чўчинқираб жилмаяди Ҳасанбой.— Гуноҳга ботади-я!”

“Нимага яшайди? Яшайди-да!— деб чимирилади Ҳақберди.— Жон ширин, ҳамма ўлимдан кўрқади.”

"Э-э, шунақа яшагандан кўра...—деб қўл силтайди Сувон."

"Яхшими, ёмонми, турмуш оғирми, енгилми, бари бир, одам умрини тўла яшши керак,— дейди Шоди ака."

"Авваласи шунча ёмонлик қилмаслик керак,— дейди Тангир салмоқлаб.— Қилгандан кейин қочмаслик керак — номардлик бўлади..."

"Шунақа яшаш мардлик бўладими?— дейди Сувон яна кизишиб.— Расвоси чиққандан кейин, ўлимни ҳам бўйнига олиши керак!"

"Майли, шундай дейлик, лекин овчининг қилмишларига бериладиган жазо кимнинг бўйнида қолади?—дейди Шоди ака.— Ахир, жазони ҳам кимдир тортиши шарт-ку."

"Тўғри,— дейди Тангир юzlари ёришиб.— Овчи ўзини ўлдирса, эртакда ҳам маъни қолмайди."

"Э-э, буларнинг ҳаммаси гап,— дейди Ҳақберди.— ҳаётга тўғри келмайди. Агар одам эртак бўйича яшаса..."

...Шоди ака кетишини ҳам, қолишини ҳам билмай, мунғайиб ўтиради. Чўпчакни муҳокама қилишдан чарчаймиз, гапхона совийди, яна индинги имтихоннинг ғами тушади, Ҳақберди конспектини қўлига олади, Сувон яна кўрпасига киради. Тангир деразага тикилиб, гўё катта иарсаларни ўйлаб, ўйлаганларидан кўнгли қолгандай, "Ҳа-е, шу-да", деб қўяди, Ҳасанбой бу гапдан дик этиб туриб, дастурхонн чаққон йигиштиради, ҳужрамиздаги яккаю ягона курсини Шоди ака эгаллагани учун, бир зум тек қотади, кейин Тангирнинг ёнига омонат кўниб, ер остидан ҳаммамизга бир-бир қараб чиқади.

Пучайиб ўтирамиз, бир-биримиз билан сабрсиз кўз уриштирамиз: кетмайдими энди...

Шоди аканинг оиласи тўғрисида шивир-шивир гап кўп эди, биз учун бу гаплар сирли ва аянчли туюларди. Шоди аканинг ўзи: "Бир мундай ўтай ҳам демайсизлар. Туйғун, курсдош укаларингизни олиб келмайсизми, деб кўп сўрайди", деб қанчалар айтган бўлса ҳам, ҳеч бормаганмиз, негадир ўша Туйғунойнинг кўзига Шоди аканинг курсдош укалари сифатида кўринишдан ор қилар эдик.

Шоди ака Туйғунойга у бошқа бир йигитдан ҳомиладор пайтида

йўланган. Туйғуной биздан икки курс юқорида, музфакда ўқийди, ўзларининг факультетини битираётган Нозир деган бир йигит билан илакишиб, бўйида бўлиб қолган, у хонасаллот ҳам айшини суреб юриб-юриб, Туйғуной ҳомиласи борлигини айтгандан кейин, давлат имтиҳонларидан кутулган пайти экан, уйида ойдай хотини, гулдай боласи борлигини айтиб, диплом олишга ҳам қарамай Туркистонига жуфтакни ростлабди. Туйғуной ёзги таътилда уйга боришга юзи чидамай, акаларидан кўркиб, ўзини бир нима қилишга журъати етмай, икки қўли—бир тепа, қисматини карғаб, шўр-шўр кўзёшларини оқизиб юрган кезларда қишлоғидан синфдоши Шоди ака хужжатларини кўлтиқлаб, институтга келиб қолади-да, дардини ёришга кимса тополмай юрган қиз, унга сардафтарини очади. Шоди ака нодон ёшларни топиштиришга ғайрат билан киришади, Туйғунойдан адрес олиб, Туркистонга устма-уст, бири биридан таҳдидли телеграммалар жўнатади, Нозирбойдан садо келмагач, номард қочоқнинг нега жимлигини текшириш, оиласи чиндан борйўқлигини билиш, ёлғон чиқса, биратўла шошқалок ошиқ-маъшуқларнинг бошини қўшиб қўйиш учун, Туйғунойни етаклаб сафарга отланади, шу билан то Нозирбойни топиб, оиласи борлигини кўриб, Туйғунойга таскин бериб кайтиб келишгунча, биринчи имтиҳон ҳам ўтиб кетган булади.

Энди, бирор кимга осилишни билмай юриб, шартта Шоди акани тутган, деб Туйғунойни сўқади, бирор сарқит ялашдан номус килмаган Шоди акани, ўрталарида Туркистондан қайтишларида нима бўлган, нима қўйган, ўзларига аён, ишқилиб, келганларидан кейин, у пайтлари Туйғунойнинг ҳомиладорлиги учча билинмаган чиқар, ўзи суксурдай нарса, Шоди ака уни севиб қолганми, балки бир инсонни хор-зорликда юришига кўнгли чидамагандир, ўзига турмушга чиқишини таклиф қиласи. ЗАГСдан ўтиб, оила қуришганини қишлоқдагиларига билдиришга икковининг ҳам юраги дов бермай, бирга яшаб юраверишади, лекин, тешик қулоқ, бунақа гап ерда ётадими, оғизма-оғиз ўтиб, Туйғунойнинг акаларига етиб боради, ота — колхоз раиси, бир ака — райондаги жами “молия”ларнинг каттаси, бири — прокурор ёрдамчиси, бири — ПМКнинг бошлиғи,

уруғларидан чиққан шармандаларнинг иккаласини ҳам бир гўрга тикиш учун қора булутдай бостириб келишади. Аммо, келиб кўришса, яна бир неваралик, жиянлик бўлай, деб туришибди, тўрвақоқди тилла қиз гаражнинг пиёниста қоровули Турдимат нонемаснинг туршакдай боласи билан кўмиroxнадай бир каталакда

ялашиб-юлқашиб ўтиришибди, уят — ўлимдан ёмон, Шоди акани бир-икки шапалоқлаган, ўлдирворамиз, уруфинг билан қуритворамиз, деб удағайлаган бўлишади, начора, замон шунақа, бу кўргулик битта уларнинг бошига тушаётгани йўқ, ёпиғлиқ қозонни очиб ўтирамай, унча ҳам гурилламаган, мунча ҳам писилламаган тўй ўтказишади, тўйдан кейин, жигаримиз ким-кимларнинг эшигига дарбадар яшамасин, деб номуслари келадими, чоғрок ҳовли олиб беришади. Ҳаммаси ёnlаридан, кўплашиб. Шоди ака шунча хўрлик кўриб ҳам — булар, кимсан — Бўрибоевлар — Бўрибоев раис, Бўрибоев “молия”, Бўрибоев “прокурор”, Шоди аканинг отаси эса, оиласида етти жон, топгани ўзига етмайди, - “Хой инсонлар, Туйғунойларингнинг асл сардафтари мундоқ эди, очмай ёпнб турибман-ку”, демайди, бунақа дейдиган одам ҳам эмас, уриш сўкишларга бошини ҳам қилиб, шундоқ номдор оиланинг қизини йўлдан урган, улуғларга канадай ёпишиб олган устомон қуёв бўлиб юраверади. Курилишда ишлади, топганини рўзгорига ташийди, Туйғуной ўша зинодан бўлган боласини туккандан кейин, бирор сўрамаса ҳам: “Нозир деган олифта Туйғуннинг бошини айлантиришга уринган экан, шовурини эшитибоқ етиб келдим-да, шартта йўлини тўсадим. Аиримлар ҳар хил bemаза гапларни тарқатиб юрибди эмиш, агар кимлигини билсам, нақ онасини кўзига кўрсатаман”, деб ҳаммага айтиб чиқади. Тинчгина оила куриб юрган одамга ким ҳам: “Боланг сеники эмас-ку”, деб бетлаб гапиради дейсиз, ўзи билмаса, бошқа гап эди...

Лекин, энди, аёл киши бирорга ўзининг шармисорлиги очмасин, очса ҳам, шу одамни ҳадеб кўравермасин экан, Шоди ака эса унинг сардафтаридағи шамолда шилдираётган қора варақдай ёнида юрса, бу ҳақда гапирмаса, юзига солмаса, жилла курса, хўжакўрсинга ҳам ҳам айбо, хотиннинг кўзини кўяртириб, биқинини моматалоқ қилиб турмасап, эркаклик хурмати кетар эканми, Туйғуной Шоди акани

ёмон кўриб қолади, ажралай деса, у ёқда бадном кечмиши, бу ёқда икки-уч йиллик ўқиши, ўртада бошқадан тўраган бўлса-да, кун-кундан келажагини талаб қилаётган фарзанд, тепасида “ўзинг пиширган шўриш-шўрани ўзинг ичасан”. Деб зуғумлаб турган ота, акалар, кимдан тиф еганини билмаган урғочи йўлбарсдай, аламини Шоди акадан олади.

Шу гапларнинг ҳаммасини Ҳақберди айтиб берган. Ичимиизда минг хил миш-мишнинг тагидаги гапнинг асл мағзини фақат шу чақади, қолганимиз ким ишонтириб айтса, шунинг оғзига термилишдан бошқасига ақлимиз етмайди...

Шоди ака уйида ториқиб кетган пайтлари кўнгил ёзгани бизниги келади, ҳангомамизнинг эзилиб, суви чиқиб, фақат пўчоғи қолганини сезиб турса ҳам, яна нималаргadir илҳак бўлиб ...тираверади, менга оғир тушади... Ҳақберди тешиб юборгудай қарайверади

Шоди ака бундан тўрт йил бурун ўлибди. Ҳақбердининг шу пайтгача у билан борди-кељдиси бор экан, жанозасига етиб борибди, қариндошларидан

бир-иккитаси: “Бечорага Туйғуной кун кў...сатмади, куйдириб ўлдирди”, деган гап қилибди, майли, ўтган ишга салавот

Безиён, кўнглида кири йўқ одам эди раҳматли!

Билмайман, нега шундай, бўлмаса, учинчи курслардан бошлаб, ётоқхонага ўтганимдан кейин, Шоди ака, Ҳақберди, Сувон, Ҳасанбойлардан тамом йироқлаб кетдим, дарсларда қуруққина саломлашиб қўйишимни ҳисобга олмаганда, уларнинг бор-йўқлигини пайқамай ҳам қолдим. Яхши ўқиб, ҳар хил тўғарак, клуб, конференцияларда кариллаб юрганимдан, ўзимга ўхшаган “ilm ихлюсмандлари”, “бўлажак” шоиру ёзувчилар билан дўстлашиб, икки йил ижарада яшаганим, Шоди аканинг валақлашларини оғзимни очиб эшигтан кезларимни улар билан бирга эслашишга ҳам номус қиласиган бўлдим, ҳали ҳам уларнинг ижарасига бориб, базми-жамшидларига қатнашишни канда қилмаган Тангирга ҳам ажабланиб юрдим, аммо ҳозир талабалигимни ўйласам, хотирамга ўша керосин хиди сасиб турган каталак хужралар келади, тўрт йил нуқул Шоди

аканинг уйдирмаларини тинглаб ўқигандай бўламан, шунча курсдош, таниш-билишнинг орасидан фақат Шоди ака, Ҳақберди, Тангир, Сувон, Ҳасанбойнинг қиёфаси тузукроқ жонланади, кейинги йилларим қанақадир ола-ғовур аудиториялар, полидаги линолеуми ейилиб кўчган, лахтак-лахтак кўлмакдай йилтираётган узун-узун долонлардан иборат туюлади, ҳатто ўзим билан бирга юрган қизларни ҳам тузукроқ эслолмайман, гўё улар билан фақат қоронфида ўпишиб, кундузлари уларнинг юзларини сира кўрмагандай...

Ҳақберди Шоди аканинг ўлганини айтганда, - умр ўтган сайин, одамнинг кўнгли бунақа нарсалардан қотиб борар экан, - унча таъсир қилмади. “Э-э, бечора, яхши одам эди, нимадан ўлибди⁷”, деб сўрадим. Ҳақберди унинг миясидан рак бўлмиб ўлганини айтгандан сўнг, “Э-э, пгўрлик, э-э, пгўрлик”. Деб туриб, туйқусдан даҳшатга тушдим: доим боши оғриб юриши, бобокалонининг бошидан қилич еб ўлгани тўғрисидаги гапларини элаб, юрагим тубга тортиб кетди, худди калламда тубсиз бир кудукнинг оғзи очилиб, шу кудукқа ўзим йиқилиб бораётгандай, ваҳима босди: “...оғриқ”, “уйғонмаган, аждодларининг қонида юриб-юриб, Шоди аканинг бошида турган оғриқ... кўнглим сезиб туриди, мени ҳам шу оғриқ олиб кетади...” Авлодлар қони... шу оғриқ билан бадар кетиб, Шоди аканинг авлоди томирида оқаяжак қон тозаландимикан... оғриқ энди касаллик бўлиб қайталамай дими?..

Шоди аканинг умри мен тасаввур қилолмайдиган, содда ақлим етмайдиган қандайдир би— мангу ҳаракатга —одам авлодининг давом қилишидай улуғ бир дарёга асрлардан буён оқиб келаётган насл дарёсининг оқимини тозалаш учун қурбонликка келтирилган эди, назаримда, Шоди ака бу дарёда узоқ оққандай, ҳали-ҳануз оқиб бораётгандай туюлди, оқимда бўйини чўзиб, бир вақтлар уқтиromoқчи бўлган абадий тилсимотни тушунмасдан, писандга илмай, ташлаб келганим учун таънали боқиб

тургандай, ҳали ҳам бўлса, ўша сир синоатни тинглаб кўриш учун димиқ хужраларга қайтишимни илҳақ кутаётгандай кўриниб кетди. Мен бу оқимга тушиб кўришим керак эди, лекин ҳозир ҳам тушишга кўрқяпман, қайтиб чиқолмаслигимдан, қайтиб чиқсанм ҳам бутун

турмушим, ҳаётим, оилам бузилиб кетишидан қўрқаяпман, аввал тушиб қўришим, аввал-бошдан бошқача яшашим керак эди, энди кеч, англамай ўтиб кетдим, билмай ўтиб кетибман, энди билолмайман, билганим тақдирда ҳам бу тириклигим ўша тилсимотнинг олдида сариқ чақага ҳам арзимай колади, йўқолиб кетаман.

Афт-ангорим ўзгариб кетди шекилли. Ҳақберди юпанч берди:

"Қайнағалари Ленинградга обориб операция қилдиришмоқчи экан, яхши қўришарди, ҳарҳолда, бола-чақасига армон бўлиб қолмасин, дейишган-да, ўзи кўнмабди, қолган беш-тўрт кунимни болаларим олдида ўтказай, дийдорларига тўяй, дебди. Куни қисқа экан бечоранинг, шу қисқа умрида ҳам мундай кун кўриб яшамади-я. Пешона экан-да. Томир қолдирди-ку, - иккита ўғилчаси бор, тоғалари одам қиласди", деди, қизини қўшмади. Шоди ака шу қизалоққа бўлакча меҳр қўйган эди, ўзи-ку - тирик етим, норасида нарса, яна етим бўладими, деб Туйғунойдан ажралмаган эди.

Индамадим, гапиролмадим: шунча йил Шоди ака билан ошначилик қилиб, ҳатто унинг касали маълум бўлиб, э-та - индин узилай деб турганда қўришга ҳам бориб, ҳеч нарса билмаган эшиитмагандай, тонг оқаргунча ундан-бундан бамайлихотир гапхона курган, уни мутлақо тушунмаган, ёлғиз расми, қуруқ сурати, сирти-пўчоғи билан гаплашиб юрган Ҳақбердига буларни қандай ҳам айтайн?

Сўраб қолиш керак эди!

Ўзи билармиди?

Бари бир Шоди акани ўйласам, ичимда қанақадир ёпишқоқ бир ачиниш пайдо бўлади, ҳарчанд уринмай, шўрликни ўзимга яқин ололмайман, раҳмим келади, кўнглида кири йўқ, безиён, тўзимли, яхши одам эди, дейман-у, яхши кўраман, деб баралла айттолмайман, нимадир халал беради...

Анча йиллар олдин, Исрофил билан қурилиш ташкилотининг ётоқхонасида бирга яшаган кезларимда, унга Шоди ака тўғрисида гапирган эдим. У пайтлари Шоди ака тирик, мактабда илмий бўлим мудири бўлиб ишлар эди. Исрофил гапимни нари-бери юриб, ичига бир оғриқ қамалиб қолгандай, безовта эшилди.

"Сен бу одамни мутлақо тушунмабсан,-деди у Шоди акани илгаридан биладигандай. - Ҳаёлингда ўзинг бўяб, чиройли қилиб олган бошқа одамни-образни гапиряпсан. Аслида, Шоди аканг ҳеч қанақа фидойи ҳам эмас, таҳқирланмаган ҳам. Таҳқир нималигини билмагандан кейин, қандай таҳқирланади. Эзилган у эмас, хотини! Тасаввур қил: ҳар куни, балки ҳар соатда ўзининг айбини ёпган олижаноб эрни кўриб туриш қандай азоб! Шоди аканг эса одамларнинг раҳмини келтиришдан ҳам озиқ олади, қаранглар,

кўринглар, жўралар, мен қанақа ғариб одамман, деб бемалол яшайверади. Жуда ғалати худбинлик..."

Ўшанда Истрофил кўзимга йўлида учраган ҳамма нарсани босиб-суриб ўтиб кетаётган бир темир вужудга ўхшаб кўринди—Шоди аканинг гўяндалигини, чўпчакларини айтмадим, қизгандим.

Бир марта, Офият Комронга юкли бўлган пайтлар, унга ўзимнинг талабалик йилларимдан қизик-қизик ҳангомалар айтиб, кулишиб ўтириб, курсимиизда Шоди ака деган шунақа-шунақа акамиз ўқиганини ҳам сўзлаб бердим, сўзлаётиб ўзим ҳам таъсирандим, аммо гапим охирига етмай, Офиятнинг ранги бўзланди, Шоди аканинг қандай уйланганию қанақа болажон эканлигини таърифлаётган чоғимда сўзимни шарт кесди: "Э-э, бўлди-е!—деди, кўркув билан нафрат қоришган, аллақандай хавотирли тусда.— Одамни бўғиб юбордингиз. Бошқа гап қуриб кетдими?! Кампирларга ўхшаб, эски-туски сандигингизни титкилайвериб..."

Намозшом эди, деразалар дув қорайиб, уйимиз сим-сиёҳ; зулматга чўмгандай бўлди, оғзимдаги — оғзимда, бўғзимдаги — бўғзимда, анграйиб қолдим; йўқ, Офиятнинг ўзини танимаган-билмаган, отини ҳам энди эшитган, бундан кейин кўриш-кўрмаслиги ҳам гумон бегона одамни ёмон кўрганидан эмас, ўзгача, бир янги туйғудан—Офият аниқ бир нарсани ўйлаб, мени, ўзини, кутаётган дунёсини, эндиғина илашиб, аланга олаётган оила ўчоғимизни шу тобда кимқайси тупканинг тагида юрган Шоди акадан, тўғриори, унинг бебахтлигидан жон-жаҳди билан қўриётган, шу тинчгина яашимиз, шу чункиллашиб ўтиришимизни деб, ҳар қанақа Шоди-поди деганларни топтаб ташлашга, бунақаларни хотирамдан ҳам ўчириб

чиқишига тайёр эди.

Шундай туюлдики, ҳатто Офият билан Шоди ака ўртасида иккаласига тааллуқли, менга айтилмайдиган бир синоат бордай, Офият шу сирнинг очилиб, турмушимизга раҳна солишидан кўрқаётганга ўхшади; лоп этиб Шоди аканинг мудом оқ шим кийиб юриши ёдимга тушди, Офиятнинг Калькуттада жала куйиб, кўчалар ифлосга тўлиб оққани, уни ёнидаги бир киши оқ шимини тиззасигача шимириб ўтказиб қўйгани тўғрисида йиғлаб айтганини эсладим, соғ каллага сиғмаса ҳам, Шоди ака билан Калькуттанинг ўша ёмғирли куни, Офиятнинг йиғиси орасида боғланиш сездим: балки... табиат Шоди акага ўхшаган яна биттани яратиб, Офиятга учраштиргандир, у ҳам Шоди ака сингари бебаҳт чиқиб,

Офиятни умуман инсоннинг бебаҳтлигидан зада қилиб, қисмати пгўр одамлар билан фақат учрашиб гаплашишдангина эмас, отини эшитишдан ҳам бездириб қўйгандир, балки Офият ахтарганини — ўз қадри-ғурурини биладиган, ҳаётдан ҳакини юлиб оладиган човут чангали одамни мендан топиб, энди баҳтли яшайман деб турганда, бир бебаҳтнинг пгўриш савдоларини илиқ меҳр билан сўзлашимдан менинг феълимда ҳам шундай мўртлик, бепандлик сезиб, эр-хотинлик тақдиримиздан, яна йиғлаб, кўзёшлари ҳайф кетишидан хавотирга тушаётгандир — бу шубҳа-гумонлар

шу қадар тубсиз, шунчалар мубҳам эдики, нафақат хотинимга айтиб, сўраб қўришга, балки шу берадиган саволларимни бир маънига тизишга ҳам ожиз эдим; деразадан намозшомнинг кора рўёларига караганча, ҳаммасини ичимга ютиб, индамай ўтиравердим...

"Шубҳа-гумон қирқоёққа ўхшайди, минг тикил, қайси оёғини босганини кўролмайсан—ҳаммаси бирдан қимиirlайди"— ким айтган эди шу гапни?

Эслолмайман, кимдир аниқ бирор ўзимга айтган эди, эслолмаяпман.

Қирқоёқ доим бошимда жимиirlаб юргандай, қулоғимга кириб кетишидан қўрқаман, чўчийман.

Хаёлимнинг қай бир тўлқинларида қалқиб юрган Тангир бир куни лоп этиб пайдо бўлади.

Шу уйимизга янги күчиб, ҳали тузукроқ ҳам жойлашиб улгурмаганмиз, олдинги бир хоналик уйимизда нарса қўйишга жой йўқ эди, энди тўртта хонани қандай тўлдиришга бош қотиб, озгина кўр-кутга нималар олишни чўтлаб, дераза олдида чекиб ўтирган эдим, пастда бир мoshранг “Уазик” ғийқ этиб тўхтади, ҳали унинг ичидагиларни кўрмасданоқ, мени йўқлаб келишди-ёв, деган хаёлга бордим, гўё бугун кунбўйи, фақат бугун эмас, кўп кунлар, ойлардан буён дераза олдида шуларнинг йўлига термилиб ўтиргандай бўлдим, беҳуда ўйламаган эканман, аввал шопир йигит тушди, биринчи қаватга кириб чиқди-да, кабинанинг очик эшигидан менга фақат тирсаги билан тиззалири кўринаётган одамга, шу уй, дегандай бош ирғади, униси— барваста, юзлари товоқдай тўла, бўлали бир одам ҳам тушди, тап-туп ер тепиниб, оёғини машина зинасига қўйиб, почаларини қоқди, кейин ўгирилиб қаддини ростлади-да, тепага, тўғ-и менга қаради, нимасидир жуда яқин, жуда-жуда таниш - э, э, “Ирғай”ку Тангир! Қани, мени ҳам танирмикан, деб индамай туравердим. Танимади, салом ўрнига дўғайиб: “Ў-ў, жўра, домла Ашраповнинг уйлари қайси? Отлари Маҳди”, деб сиёsat қилди. Э, э, падари қусур, отимни шунча ҳурматлаганингдан кейин, ўзимга бунча дўқлама-да, дедим ичимда, ўша “отлари Маҳди” - ўзим-ку! Тангир индамаганимга бир сония ажабланиб турди-да, бирданига ёш боладай қийкириб юборди: “Хў-хўй! Ўзингми, сарт!..”

Институтни битирганимдан буён Тангирни тез-тез эслаб, бир шатаймас жўрам бўларди, деб юардим, аммо ўзини кўрсам, бунчалар кувонаман, деб тасаввур ҳам қилмаган эдим, қучоқлашаётгандан кўзимдан илиқ бир нарса тошгинини билмай қолибман, Тангир ҳам таъсирланиб, худди неча йилга дом-дараксиз йўқолиб, бирдан топилган акамдай, мана, келдим, келдим-ку, дегандан нуқул елкага қоқади, кўзлари йилтиллайди, қиз боладай илжаяди...

Тангир “Ха, жўра-е, шу ерда яшайман, де”, деб хоналарга бир-бир бош суқиб ажабланди: “Пулни сандиққа босасанми дейман, ё ҳечам олмайсанми? Ўзимга айтсанг-ку, ҳар йили тўрт-бешини юбориб турардим...” Ботирнинг ҳали қирқи ҳам чиқмаган эди, Тангир иримчи Офиятнинг мен билан

маъноли-маъноли кўз уриштиришига парво қилмай, чақалоқни олиб чиқартирди-да, юзини очиб кўрди, гўё киши билмас, йўргагига битта юз сўмликни қистирди. “Бўйинса, қўрқманг... Отингиз нима? Опят, Опятой. Хотинни ҳам оти ўзингга мосидан топган экансан, Маҳди, тўғри айтиш учун биз қишлоқилар яна тўрт йил ўқишимиз керак. Қўрқманг, Опятой, кўзим йўқ, олтитаси бор, хотин ҳозир еттинчисини қорнига қамаб, ана чиқарай-мана чиқарай деб турибди. Қизталоқнинг зоти қуёнми, тўнимнинг этаги тегиб кетсаям, бўйида ушлаб қолади...” деб Офиятни дув қизартирди.

Шопир йигит оти Исамат экан, бу орада халта-халта бозорлиқларни ташиб кирди.

Тангир кўп ўтирамди, бир-иккита “жуда нозик одамларга ҳақ беринини”, менинг у ерга “тўғри келмаслигимни” айтиб, кўзғалди. Кетаётиб сирли илжайди-да: “Эртага уйда бўлгин. Битта-яrimта одамларим билан келишим мумкин, тағин уялиб юрмай”, деб тайинлади, тушунтириб айтмади.

Эртаси куни, Тангир қўплашиб келар экан, деб кечаги ўзи келтирган бозорлигидан мўл-кўл солиб, шўрва остириб ўтирган эдим, эшик гурсиллади, назаримда, тепишаётгандай бўлди, бу қанақа қўпол ташриф экан, деб бориб очсам, икки гирдиғум йигит катта телевизор кутисини икки томондан ачомлаб: “Домла Ашрапуфнинг уйларими?”, деб туришибди, гўё мен ўша “Ашрапуф”нинг эшигида юрадиган дастёридай. “Кўл толиб кетди, ака, - деди бирови. – Йўлдан қочинг. Ҳали шунча нарсани чиқариш керак”. Уларнинг ортидан сувқоғозга ўралган катта гиламни елкалаган Исамат кўринди. “Домла, шуларни сизнигiga жойлаштирас эканмиз. Тангир Курбоновичнинг ўзлари кечқурун келиб тушунтирас эканлар”, деб шум жилмайди. “Ашрапуф” ўзим эканлигини сезган йигитлар бир кўримсиз менга, бир кўримсиз уйимга ажабланиб аланглашди...

Икки соат ўтар-ўтмас, катта хонамизни бир бойваччанинг ясоғли меҳмонхонасиға айлантиришди, деворни узунасиға қирмизи-корамтири йилтиллаётган “стенка” эгаллади, паркетга учу тўрт, қизғиш гулли қаҳваранг гилам тўшалди, “стенка”га рўбарў, ўтирган одамнинг кетини оғушлаб, тургани қўймайдиган диван-креслола- қўр тўқди,

рангин телевизор дунё бойликларини жилвалантира бошлади ҳаммаси тушунарли эди, Исаматнинг буни қаерга кўйсак, шундай жойлаштиrsак, сизга қандай, деб менга синовчан қараашлари, алланечук ҳавасманд-ҳавасли ўйнаб кўзларидан Тангирнинг бу йигитни яхшигина пишиклаб юборгани шундоқ кўриниб турар, аммо ишонгим келмас, шунча нарсани Тангир нима учун, нима мақсадда менга марҳамат қилганига ақлим етмай, бундай эмаслигига бошқача изоҳ тополмай, хунобим ошар, Исаматни қистовга олиб аниқлашга эса юрагим дов бермас эди.

Бунаقا нарсаларни бошқаларникида кўриб, ўзиникида ҳам шунака нарсалар бўлишини ҳали фақат орзугина қилган Офиятнинг питирлашига мумкин кадар ишонтириб: “Ҳа, Тангир ўзига олган экан, мошин топилмабди,

вақтинча туради. Хонани бекор банд қилмасин, фойдаланиб тураверишсин, депти” деган жавоб бердим...

Кечқурун Исаматнинг ўзи келди. “Тангир Курбоновичнинг зарил ишлари чиқиб қолди, ўзингиз юармишсиз. Илтимос қилдилар”, деди.

Бордим. Тангир хонасида ёлғиз дастурхон тузатиб ўтирган экан, мени гуноҳкорона кулиб қарши олди, икки пиёлани тўлдириб конъяқ кўйди.

“Аитиб ўтирма. Исаматдан сўрадим, зийрак бола, юзингдан ҳам билиниб турибди. Мана, бўйнимни эгиб турибман. Шуни олдиндан сезиб ўзим олиб бормаган эдим. Ашқол-дашқолингни кўтар, деб қолсанг, шармандам чиқмасин деб. Энди, жўра, гап бундай, ҳеч қанақа илтимосим йўқ. Катта ўғлим энди тўққизинчида ўқияпти, сенинг филфагингга киритмайман, одам қилмоқчиман. Укаларни ўқитганман. Уйингга юборган нарсаларим шунчаки... Уй кўриш-га... ҳадя... Қандай тушунтиурсам... шу, жўра, бир вақтлар институтда ўқиб юрганимда, агар куним туғиб, баҳт қараб, ошиғим чикка турса, бойиб кетсам, бойлигимдан кўп эмас, кирқдан бирини Маҳдига бераман, деб кўнглимга туккан эдим. Менга сен у вақтлар пир қатори эдинг. Агар ўзгармаса, бузилмаса, деб шарт ҳам қўйган эдим. Кеча кўрдим — ҳалиям ўша-ӯша, “сарт” Маҳдилигингча турибсан. Шу бошқача ҳеч гап йўқ. Қўлингга тутқазсам, олмас эдинг. Нарса қилдим...”

"Биламан бунақа гапларни: кўпчиликнинг ҳақини ифлос йўллар билан... Кўпчиликнинг ҳақи бўлса, шуни кўпчиликка бериш йўлини топ-чи!"

"Қандай тарқатасан? Қайси ведомость билан? Чўпонлар билан мундай маҳинация қилган эдик, заготконторада мундай келишган эдик, мана, юз минг фойда топдим, шуни теппа-тeng бўлиб олайлик, дейманми?.."

"Кирқдан бири ҳам эмас. Фараз қил, менда юз сўм бор, сен эса муҳтоҗсан, мен сенга бир сўм эмас қирқ тийинми, эллик тийинми бердим, шу билан давлатим камаярмиди? Тангалаб эмас, сўмлаб, катта-катта сўмлаб топаман-ку. Энди солиштири: ўқиб юрган пайтларимиз, Гулчехра билан кинога боришга пулим бўлмаса, уч сўм бер, десам, берармидинг— берардинг, ўзингга танга қолса, бас эди. Қайтарасан, демасдинг. Мен ҳам шундай қиласдим, Бунақа уч сўмлардан қанчаси мендан сенга, сендан менга ўтган. Ҳозир энди юз сўмимдан атиги қирқ-эллик тийин чақасини берсам, ориятинг қўзғайди. Сенга керак-ку. Майли, биз бошқа-бошқа одам бўлиб чиқдик, сен — яхши, мен ёмон чиқдим лекин ўша пайтлари қилган жўрачилигим қолди-ку!.."

"Мен бу пулларни ҳаром хисобламайман, топшири, дейишин, топширмайман. Чунки ҳар куни, ҳар соат-да ўзимнинг йигит умримни, олти боламнинг тақдирини жоди тагига қўйиб топяпман. Сенга эса, Маҳди, қилган совғам ҳаппа-ҳалол, жўра — тоза кўнгил билан беряпман, ўзинг ҳам тоза одамсан..."

"Э-э, ошна, ғалати одамсан, хирмоннинг устида ағанаб ётибман, сени кўриб, кўнглим ийиб кетди-да, бир чангалини хотамтойлик қилдим. Нима бўпти шунга?"

Ўйлаб ўйимнинг тубига етолмайман: "стенка"— уч минг, гилам — бир мингу юз, телевизор — етти юзу эллик олти, жами — "юз сўмдан қирқ-эллик тийин..." Тангирга термиламан, шунча пули бор одамга ўхшамайди, эзиламан, наҳотки дийдори билан қўзимни ёшлатган жон жўрам "қирқ-эллик тийини" билан мени топтаётганини, саховати билан хўрлаётганини билмаётган бўлса, ё давлати ошгани сайин одамнинг фахм-фаросати тумтоқлашиб бораверадими?

Эҳсони билан мени ўлдираётганини бу миллиончи бойнинг ўзига қандай тушунтирасам?

Тангирибой, шунча йил ўзимни тоза сақлаб келдим, энди сен, ҳе йўқ, бе йўқ, ногаҳонда имонимни топтаб кетаверасанми?

Тангирибой, шунча йилдан бери менинг ҳам бўйнимга ўн минглаб пуллар жалаб хотиндек осилди, тегмадим, бўйнимни бўшатолмай, ёнимдагилар бемалол олиб, мени ҳам олсанг-чи, косангни оқартирсангчи, деб қисташганда ҳам бўғилишга чидаш бериб келавердим, энди сен битта ҳотамтойлик билан бардошимни янчиб кетаверасанми?

Тангирибой, шунча йилдан буён хотиним, болаларимнинг кўз ўнгида ҳар қалай иззат-хурматим бор эди, энди сен бу ҳимматинг билан уларга мендан кенгроқ, истаганини бир даста пул билан бемалол муҳайё қиласидан дасти узун одамлар ҳам бўлишини кўрсатиб, мени бир тийин қилиб, яна бир камбағалга қайишдим, деб шод кетаверасанми?

Инсонга энг оғири — бирорнинг бойлиги олдида бўйинини қисиб яшаш эканлигини наҳотки шунча пул топган мияли бошинг билан ўйламасанг, Тангирибой?..

Бошим чатнаб кетадигандай, ўйхонамга гуррос-гуррос бостириб кираётган бу гапларнинг Тангирига заифона ожизлик бўлиб туюлишини, қорни тўқ сахий қорни оч йўқсулнинг текин неъматдан бош тортишини ҳеч қачон тушунмаслигини билиб, очиқ айттолмайман, ерга урилаётган одамлигимни фақат: “Керак эмас эди. Тангири, бекор овора бўлибсан”, деб ғўлдираш билан химоя қиласман, баттар хўрланаман. Тангири тушунмайди, баттар мамнун бўлади. “Қўйсангчи, шунаقا гапларни. Ҳай турибди-да уйингда, ўзинг ҳам бир кун олардинг-да. Одамнинг қадри нарса билан ўлчанмайди-ку. Арзимаган тахта-тухта деб икки жўра аразлашмайлик”, деб жилмаяди...

Одамнинг хотираси карвонсаройга ўхшайди: кўп одам яшайди, ким унга бир қўниб, шу билан ҳамишалик муқим макон қурган, кимлар эса бир тўхтаб ўтганича, қайтиб қорасини кўрсатмаган — одамнинг ўзига боғлиқ эмас.

Сувон, Ҳасанбой синга, и гала-гала курсдошларимни ғира-шира эслайман, тумонатнинг ичида, ҳаммаси бир-бирига ўхшаб, унисининг қиёфаси бунисига аймашиб, аралаш-қуралаш, вағир-вуғур қилиб қаёқларгадир оқиб ўтиб кетишгандай туюлади, жуда кўплари ёдимга тушмайди, оломоннинг ичида шакл-шамойилсиз бир қоралар туртиниб-суртиниб боришаётгандай кўринади...

Ўн йилдан буён талабаларга дарс бераман, кўз ўнгимда тўда-тўда алмашиб туришади, ўн йилдан бери ғала-ғовур қилиб оқаётган дарёning ўртасида қоқилган қозикдай туриб, очилиб-юмилаётган оғзимга бир нафасга тўхтаб қараб, яна гуррос-туррос, икки ёнимдан айланиб ўтиб, йўлида бораётган ёшлар оқимиға термилиб қолавераман...

Шоди акани кўп ўйлайман, гапларини эслайман, аммо ўзи қандай кўриниши эсимдан чиқиб кетган, ёдимга тушгани — ғўра еяётгандай бужмайган юзи, ушоқ гавдаси, доим текис дазмолланган, текислиги учун эгасини нимагадир ҳакир кўрсатадиган оқ шими холос, шулар ҳам Истрофилнинг бошлабоқ ёқтиромай ташлаб юборган қоралама — эскизларига ўхшайди; Ҳасанбой ҳозир ҳам кўз ўнгимда фақат илжайиб юргандай, фақат илжайиши, юзи эсимда йўқ, Сувон ҳали ҳам бурнини карракдай кериб, анграйиб тургандай, Тангирдан хотирамда фақат дароз бўйи, завқдан қисилган кўзларию мўғултахлит бети қолган.

Хотирам карвонсаройдан кўра, бир вақтлар яқинларим бошпана топиб, вақтинча яшаган, кейин ҳаммаси юрт-юртига қўчиб, кўчаётгандан ирим қилиб ул-бул кераксиз нарсаларини ташлаб кетишган ғариб мусофирихонага ўхшаб кетади, баъзан уни яна ўша одамлар билан обод, гавжум қилишга уринаман, лекин илгари кўрганларим энди кўз олдимда бошқача ростланади...

Тангир билан ўқиш тугагандан сўнг қайси йўлни танлаш тўғрисида кўп тортишар эдик. Мен-ку, энди билсан, ақл-хушимни танигандан буён, худди сопқондан отилган тошдай, шу туриш-турмушимга отилиб келаётган эканман. Тангирни ҳам тил кафедрасига олиб қолишмоқчи эди, у эса шаҳарда яшашни салкам одамзотнинг баҳтсизлиги хисобларди. “Сенинг йўлинг бошқа,

ичингда ҳамма нарсага чидайдиган, қийинчилик дегани писанд қилмайдиган бир нарса бор, қишлоғингга борсанг ҳам, сиғмасанг керак. Мен эса ойликдан ойликкача мустар яшай олмайман, ошқозон касал бўлиб қоламан. Отамнинг ёнига қайтаман. Икки ставка дарс олиб... Аввал отамнинг ўқишига киришимга берган уч мингини ишлашим шарт. Акам яқинда уйланди. Отамнинг бошида борганимдан кейин мени уйлаш ҳам турибди. Яна бир укам келаси йили ўнинчини битиради, ўқишига кираман, дейди. Унга ҳам... Битта отам шуларнинг ҳаммасига қайдан еткизади!..”

Тангирнинг қамалганини эшитгунга қадар, у билап баҳслашиб юрдим.

“Бир куни деразадан қараб ўтирган эдим, пастьда бир мoshранг “Уазик” тўхтаб...

аввал шопири тушиб...

бўлали, юзлари ойтовоқдай тўла Тангир... тўғри менга қараб... “Домла Ашраповнинг уйлари...” “Хў-хўй, сарт Маҳди...” хоналарга бир-бир бош суқиб... “Сира олмайсанми?..” битта юз сўмлик... “тўнимнинг шамолига ҳам...” эшикни гурсиллатиб тепишади... тўртбеш минглик ашёлар...

кечкурун, бойлигига, менга қилган яхшилигига маст Тангир...

бойлигу одамгарчилик, пул, тўгрилик, олишу олмаслик тўғрисида ечими йўқ баҳслар...”

Яна:

“...бир куни деразадан қараб ўтирсам...” Яна... Яна...

Худди ҳаммаси рост, бўлаётгандай...

Баҳсимизнинг якунида ҳамиша мен Йўлчига ўхшаб ўлсам ҳам, маънавий галаба қозонаман — Тангир ҳижолатга тушади, гуноҳкорона-мамнун — яхшиликка жазо йўқлигини билиб илжаяди...

Мен пулининг сассигига чидолмаётган Тангир билан эмас, унинг ичидағи ўша, “хўб тоза одамсан-да”, деб менга ихлос қўйган, нима десам, ишонган, оққўнгил — танти Тангир билан баҳслашаётган бўламан, негадир энг охирида унинг ҳадясини энди нима қилишга ақлим етмай қолаверади, гоҳ магазинга топшириб, пулини эгасига қайтараман, гоҳ қарз, ҳозир Тангир арзимаган пулга муҳтоҷ эмас,

кейин узаман, деб қўнглимни тинчитаман...

Мен тоза қолдимми?

Кейин билсам, совхоз директорларининг тагида битта мошин бўйлмас, мош...анг "Уазик"ларини далага, оппоқ "Волга"ларини шаҳарларга минишар экан

Кейин билсам, янги замоннинг бойлари айш-ишратга чамадон-чамадон пулларни сочишар экан-у, ҳатто дўсту ёронларига ҳам бир сўмни бехисоб беришмас экан...

Кейин билсам, Тангир директорлигининг бошларида совхозни кўтариб, ободончиликка зўр берган, аммо машъял бўлишга кўнмай, бошқа колхоз-совхозлар шитоб билан илгарилаётган йўлдан юрмай, ўзини четга олган, фақат етиштирганини топшириб, кейинги икки йил ҳатто планни ҳам бажаролмай, раҳбарларга ёмон кўриниб қолган, тўғри амалидан туширилишга одамлар ўртасидаги обрўси монелик қилиб, устидан материал тўпланаётган экан...

Кейин билсам, зора кўпчиликка едирсан, одамларнинг ҳақига хиёнат қилмасам, эгам менга ҳам зуриёд берар деб, рўзгорига ҳаром аралаштиромай, топган буд-шудини ўн олти йил ичida уч марта алмаштирган хотинларини шаҳарма шаҳар, табибма-табиб олиб юриб қаратишга кеткизар экан...

Кейин билсам, Тангир ўз ёғига ўзи қоврилиб икки жаҳонга сифмай юрган кезлари, кўйиб юборган биринчи хотини ниҳоят эрга тегиб, Ҳасан-Хусан туқкан, шу билан унинг нуқсини ойдинлаштирган, Тангир вилоят марказидаги мажлисда ҳам ўтиrolмай, уйига қайтса, уни саҳарга қадар кутган бу хотини мoshранг "Уазик"нинг шопири билан Лайли-Мажнун бўлиб ётган экан; Тангир ёмон бақувват эди, "Мунинг баданида ёмон бир қора куч бор", дер эди Шоди ака, шошганидан жойпўшга чалкашиб йиқилган шопирни икки мушт билан шакар томирига урган экан, ўлдириб қўйибди, хотини деразадан ташлаб қочибди...

Шофёрнинг исми Исамат эмас, онаси шошилиб туққанми ё ўзи дунёга келишга ошиққанми, одамнинг тушига ҳам кирмайдиган от — Қистовбой бўлиб, бир томони Тангирга хеш - амакисининг қайниси экан...

Тангир биринчи хотини билан етти йил туриб, бефарзандлиги учун қўйиб юборгандан кейин, Чоржўйнинг қаериладир дарс бериб юрган, ҳали ҳам турмушга чиқолмаган Гулчехрани ахтариб борибди, Гулчехра уни хуш кутиб олиби-ю, аммо синган косани ямаб бўлмайди, деб қайтарибди...

Бу гапларнинг асли қандай бўлганини Тангирларнинг қишлоғидан кирқ чақирим наридаги мактабда ишлаган Ҳақберди топиб келди.

Институт ховлисидағи қайрағочнинг тагида учрашиб колган кунимиз, салом-алиқ, сўрашишдан кейинроқ Ҳақбердининг биринчи айтган гапи шу -Тангирнинг шўриш-савдосини ҳикоя қилиш бўлди, факультетга ишга ўтаётгани, министрликдаги бир ҳамю...ти қўллаб юбораётгани ҳақидаги минг туманли шамаларни кейин билдириди

Ш–нча йилдан буён иккинчи қаватдаги уйимнинг деразаси олдида, пастда ўзини танитишга - мен хаёл қилгандай бузилиб кетмаганини айтишга келиб, қарашимни кутиб м–нгайиб турган Тангирга орқамни ўғирганча, борлиғимни икки одамга гуноҳсиз ва гуноҳкор Мадхига,

саҳоватли ва таъмагир Маҳдиларга бўлаклаб, уларни бир-бири билан уриштириб ўтирган эканман.

Мошранг "Уазик"нинг шопири Тангирнинг учинчи хотини билан зино қилишини сезиб юргандай эдим, йўқ эса, нега уни оти Исаматми, Қистовбойми, бари бир, доим Тангир билан бирга, шум илжайиб юрган ҳолда ўйлар эдим?

Гўё мен Тангирнинг олти боласи бор, хотини еттинчисига юкли деб ўйлаганим учун ҳам у бефарзанд юргандай?..

Мабодо, тақдир мени Тангирнинг ўрнига қўйганда, у қилмаган айни шу гуноҳларни ўзим қиласигандай эдим, йўқса, нега уни ҳар гал кўз олдимга келтирганда, менга қиласиган совғасини ҳам кўрап ва бу совғани қайтариш чорасини тополмай қолар эдим? Кўнглимнинг туб-тубида одамнинг қадри пул билан ўлчанмаслиги ҳақида ўқиган қоп-қоп маърузаларим - Тангирнинг қўзини очиш эвазига тўрт-беш минг сўмлик молни тама қилдим шекилли...

Нега, шунча йилдан буён ичимда тинмай бузуқбошлиқ қилаётган девга қарши курашавериб тинкам қуриётгандай...

Нега шунча йилдан буён деразам тагида мөшранг “Уазик” тўхтамади?

Ҳақбердининг айтишича, аслида ҳам шундай бўлиши керак эди - Тангир хар йили уч-тўрт марта иш юзасидан пойтахтга келиб кетар экан.

Тангир ўзи тўғрисида менинг бу қадар ёмон хаёлларга боришимни билармиди?

У мен ҳақимда - оиласдан тинчиган, турмушда баҳт қараб, ошиғи чикка турган, монографиялари босилиб, доим иши ўнгидан келиб юрган, шунга қараганда, яқинда докторлигини ҳам ёқладиган, ҳозирча доцент Маҳди Ашрапов тўғрисида қандай ўйлар экан?.. “Э-э, биламан, буларга қандай эришаётганини...” демасмикан?

Яна: жазосини ўзи тортишга мардлиги етармикан?

Яна: одамлар ўртасида бош кўтаролмасликдай оғир жазосини хотинига қолдириб кетмадими?

“Билмадим, кимга қандай, лекин Маҳди менга ҳамиша ўрнак, - деди Ҳақберди, туғилган кунимда қадаҳ сўзи айтиб. – Маҳди билан бирга ўқимаганимда, билмадим ҳозир қаерда юрадим. Ўқишида ҳам, турмушда ҳам Маҳдидан орқада қолмасликка тиришдим, энди етдим деганда, у яна илгарилаб кетаверади, аммо мана, уни кувлаб кам бўлмадим: қишлоқда юрсам ҳам ёқлаб олдим...”

Кўпчилик ўтирган эдик: Исрофил, кафедрадагилар - ҳаммаси кандидат, бу бошоғриқдан аллақачонлар қутулиб, энди бамайлихотир катта бошоғриққа тайёрланаётган одамлар тўпланиб қолибди, диссертация ёқлаганини баҳтининг салкам якуни ҳисоблаётган Ҳақбердининг гапларига

ҳали ҳаётнинг аччик-чучугидан бехабар боланинг шодлигига қарагандай, беписанд жилмайишди, Исрофил индамай столни чертиб ўтирди...

Менга эса Ҳақбердининг бу гаплари замирида ўксиниш билан алам ётгандай туюлди.

Аслида ҳам шундай эди.

Ноқулай аҳволга тушдим: наҳотки Ҳақберди бор умрини менга етиб олиш учун сарфлаб, мендан ҳам баландроқ одамлар борлигини,

дунёнинг устиворлигини, кенглигини, бу кенгликда Маҳди Ашрапов деган одамнинг ҳаёти тор бир туйнук эканлигини билмай ўтиб кетаверса...

Агар, дейлик, чархнинг каж рафтори билан Ҳақберди менинг ўрнимга тушса - ўзи орзулагандай, менга етишиб олса, нималар қилган бўлур эди, - билмайман, шундай ўйласам, мен - ишбилармон истеъро бериб, жойимга бир ишга ноудда-ношуд, лекин тинмай гап кавлаб юрадиган одамни тайинлашаётгандай қизғанчда қоламан...

Институтни битиргандан кейин, воқеалар равиши ўзгариб, ўзимнинг Ҳақбердининг ўрнига қишлоққа кетиб, ўша ёқда диссертация ёқлаб, кейин институтга келишимни ва менинг ҳозирги ўрнимда бўладиган Ҳақбердига ҳавас қилиб яшашни сира-сира истамас эдим...

Ҳақбердининг ҳавасида мен доим хатар кўраман...

Биринчи йили Ҳақберди ёмондан нари, яхшидан берироқ дарс бериб юрди, ҳар қалай, талабаларга ўрта мактаб ўқувчиларига дарс ўтаётгандай. "Хўш, Йўлчи қандай образ бўлган экан? Қани, бу шеърни ўқигандан кейин қандай кайфият олдик, ким айтади?" қабилидаги гапларни гапиришдан бир қадар қутулди, ўзи айтгандай, методикасини анча такомиллаштириди, лекин: "Хўш, шундай қилиб, инқилоб ғалаба қозонди, жамиятда янгит одамлар етишди, бу эса ўз навбатида адабиётда янги қаҳрамонларни барпо этди, демак: янги ҳаёт - янги одамлар - янги қаҳрамонлар, буларнинг ҳосиласи -янги адабиёт", деб м аълум тушунчалардан мунчоқ тизишдан нарига ўтмади. Талабалар унга шунақа гаплари учун, бир томони яқинда келганини назарда тутиб, "янги қаҳрамон" деб лақаб тақишибди.

Бу йилига эса Ҳақберди чиндан ҳам, ғалатироқ бўлса-да, қаҳрамонга айланди.

Ҳақберди одамнинг гапини “ҳа, ҳим”, деб маъқуллагандай эшигади-ю, аммо кўзлари доим бир тусда чақнаб тураверади, яхши гапга кулганида ҳам ёмон гапдан маъюс тортганида ҳам, кўзларидаги истеҳзо ўзгармайди — худди қошининг тагидаги иккита тешиқдан бошқа бир одамнинг кўзлари пойлаётган-дай...

Чиндан ҳам, Ҳақбердининг сиртини ичидаги бошқа бирор кийиб

юргандай, унга худди икки кишига: бири—мени қадрлайдиган, менга ишониб-сұянадиган, иккінчisi — ҳар сўзимга ғайирлик қилаётган, ишонмаётган, — бир танада яшаётган қўшалоқ одамларга гапиргандай

орқа-олдимга қараб, йиғиштириниб сўзлайман, назаримда, — негадир бунга ишонаман ҳам,—ўша, тили аччиқ, тийрак талаба Ҳақберди турмушнинг оғирлигидан, феълининг ёмонлигидан такрор-такрор зарба еб, энди, мана, босилиб қуюлган, эҳтиёткор бўлиб қолган бугунги Ҳақбердининг ичига биқиниб олгандай туюлади.

Билмайман, нега шундай, Ҳақберди билан ёлғиз қолсам, ҳар гал унга ваъда қилган жуда зарур нарсамни, эсимдан чиққанидан эмас, беришга қизғанганимдан, атай уйда қолдириб келиб, энди ўтирик баҳоналар билан ўзимни оқлааб ўтиргандай ўнғайсизланаман...

Одам ҳамиша кимдандир қарздор, кимларнингдир олдида бурчли, жуда кўп одамлардан яхши нарсалар олганман, жуда камини қайтарганим, Ҳақбердидан ҳам олган бўлсан керак, аммо қайтаришга унинг ўзи арзимайди, бари бир қайтарганимнинг қадрини билмайди, унга нима керак, деб хисоблайман—худди кўр кампирнинг тиллаларини ўзимники қилиб олгандай...

Агар, айтгани рост бўлиб, у менга эргашган, мендан кўп нарса олган бўлса ҳам шуларнинг орасидаги энг асосий нарсани факат ўзимда олиб қолганман...

Нимашу?..

Бир куни душанбада Карим ака Етмишбоев дағдаға қилиб келиб қолди: "Сингармонизмнинг республикадаги отаси мен бўлсан, мен диссертация ёқлаганда санлар онангнинг қорнида эдинг!", деб Толибовага бақириб кетди, айби нимадалигини унча тушуммаган Юлдузхон кўзёшини қалқон қилиб олди.

Бунгача сал-пал гап ўрмалаб, талабаларнинг домлаларга қанақадир "мусбат-манфий"лар қўйиб, кимларнидир алмаштиришни таклиф қилишгани тўғрисида шовур келиб, асли ўзи нима даҳмаза эканини билмай, ажабсиниб юрган эдик.

Карим аканинг жияни ўзимизда ўқир эди, кечкурун йиғламсираб борибди: амак, энг кўп "манфий" олганингиз учун сизни ҳайдаб,

ўрнингизни Толибовага олиб беришар эмиш — бачаларнинг оғзида шу гап, кетиб қолсангиз мен қандай битираман?..

“Сингармонизмнинг отаси” шусиз ҳам дарслари ошиб-тошиб ётган Юлдузхон унинг ҳам дарсини олса, қандай эплашини ўйлаб ҳам ўтирумай, кечаси билан тўлғаниб чикканча, эрталабига шовқин солиб келавериби.

Юлдузхон: “Наҳотки мен... Наҳотки сиздай кишига...” деб ўпкаси тўлиб гапиролмай турганда, бўрон қўпгандай Сухроб кирди-да, бир дунё миш-мишни тўкиб ташлади: кеча бозорга тушиб, битта шумгина талабамизни учратибди-да, гапга солибди; эмишки, министрликка факультетнинг чириб бораётгани тўғрисида кўп сигналлар тушиб, министрлик бу “бардак”ни тозалашга зимдан киришибди, Абдикулов, яъни биз бечорагина деб юрган

шу Ҳақбердимиз аслида шахсан министрнинг махфий топшириғи билан орамизга ташланган, ичидан пишиб кетган устомон одам экан, шу вақтгача ҳар бир домлани миридан-сиригача ўрганиб, етарли материал тўплабди, анкета сўрови ташкил этиши ҳам шундай материал, тўғрироғи материалларига объектив далил бўлиб, ҳозир министрликда компьютерларга солиниб, кўрсаткичлари ҳисобланадётган эмиш, натижалар жуда ёмон чиқибди, айни шу кунларда қайси домлани қолдириш, қайсисини кеткизиш тўғрисида масала кўрилаётган, биринчи галда, эллик фоиздан кам “мусбат” олганлар, кейин аста-секин олтмиш учу уч фоиздан кам “мусбат” олганлар, ўрнига одам топилишига қараб, жилдирилар эмиш, унгача, турган гап, факультетни ўтиргизиб қўйган раҳбарлар, аввало деканимиз Маҳмудали ака қаттиқ ҳайфсан билан бўшатилиб, ўрнига ўқитувчилар орасида ҳам талабалар ўртасида ҳам обруйи баланд ёш бир доцент қўйилади, бу ҳам Ҳакқердининг кимни кўрсатишига боғлиқ, ҳозирданоқ аниқ бир тахмин бор-у, фақат буни айтиш Сухробга нокулай...

Сухроб ўзидан ҳам анча-мунча гапларни қўшиб-чатиб гапирди, ҳаммамиз кулдик, Карим ака, қарилик курсин, одамнинг эси кирди-чиқди бўлиб қолар экан, деб Юлдузхондан кечирим сўради, сал-пал енгил тортдигу кўнглимиздан гидир кетмади: мана, шундай қўпчилик

вағир-вуғур ўтириб, сув олармиш, том босармиш деган олди-қочдиларнинг авра-астарини ағдариш, чўкиртак қиличини ўйнатиб кўрқитмоққа уринаётган увоққина ёғийни чертиб-черткилаб майна қилиш яхши, ҳатто жуда завқли эди, бироқ ҳар биримиз ўзимизча ўйлаганда, ўша ёғийга карши ёлғиз турганда, бу миш-мишларнинг таги бордай, нимасидир асослидай, кўнглнмизда ноаниқ бир таҳлика уйғонар эди.

Биринчи дарсим тўртинчи курсда эди, одатдагидай ўтди-ю, факат талабалар кўзимга бошқачароқ кўринди, буни олдинги кунлари ҳам пайқагандай эдим, лекин, тўғриси, бирон-бир ўзгаришга, хусусан Ҳақбердининг дахмазасига боғламаган эдим; улар ўзларини менга илгариgidан ҳам яқинроқ тутишаётгандай, гапларимни кувониброк тинглашаётгандай, ҳар ҳолда, уларнинг савол беришларида, кейин гўё чин "аълочи"дан имтиҳон олаётгандай, тез-тез бош иргаб, жавобимни мамнун эшишишларида одатдагидан анча фарқланадиган ўқтамлик, ўзларига ишонч, менга мадад ва ҳатто, домла, бўш келманг, биз бормиз, қараб турмаймиз, деб ҳомийлик қилиш ҳам бордай, менга шундай туюлган бўлса ҳам, Ҳақбердининг охирини ўйламай қилган иши ёмон тус олиб, талабалар билан домлалар ўртасида шу пайтгача чўкиб ётган кўп нарсаларни юзага қалқитиб чиқараётгани сезилиб турар эди.

Дарсдан чиқиб деканатга кирсам, яна одам, ғала-ғовур, Турғун қўлини кўтариб, нимадир демоққа уринади, Карим ака: "Махмудалининг олдида нима деган одам бўлдик? Сизга ишониб кетяпман, Карим ака, деган эди-я!", деб вағиллайди, Марҳамат опамиз бурчакда пиқ-пиқ йиғляяпти, Юлдузхон унга сув тутяпти, Жамшид деворга елкасини бериб, хаёли қочиброк турибди, Сухроб қовоғини ўуб, ўзини ташвишманд тутишга уринади, лабларини

йиғиштиромаганидан, эси оғиб қолгандай кўринади, қолганларнинг юзида ҳам, шамол йўғ-у, дараҳтларнинг учи қимирлаши нимадан, деган ҳайронлик, факат Суннатов босиқ, қўлини чунтагига тиқиб, уёқдан-буёққа юради, ким кирса, эшикка қараб, ёпиб кўйинг, деган амиrona ишора қиласи.

Назаримда, ҳамкаслар ишонгилари келмаётган нарсаларга ишона

бошлашган, бояги беписанд кулгидан асар йўқ, бир-бирлариға синовчан қарашлари, унсиз саволларида одатдан ташқари, ноқулай бир ётсираш пайдо бўлган, хеч ким ўзини қандай тутишни билмас, агар бепарво кўринишга уринса, бор гапни билиб, айтмаётгандай, кулиб юрса, бу гаплардан қувонаётгандай, хафа юрса юраксизлик қилаётгандай, бир мужмал аҳвол вужудга келган эди.

Мишишлар соат сайин болалар эди:

Марҳамат опанинг курси Жамшидга олиб берилиши керак эмиш...

Талабалар, Етмишбоевга сидирғасига “манфий” қўйиб ташлашгани етмагандай, исм-шарифини ҳам ўчириб чиқишиган эмиш...

Суннатовнинг “мусбат-манфий”лари teng...

Юлдузхоннинг “манфий”и кам...

Келдиевага “мусбат-манфий” қўйиб ўтирмаи, “Танноз” деб ёзишган...

Махмудали ака ҳозир Олмаотада — фольклоршунослар кенгашида эмас, балки Москвада, таниш ахтариб чопиб юрган эмиш...

Ашраповнинг “манфий”и умуман йўқ, эмишки, Ҳақберди анкета тарқатаётиб: “Махди Ашраповичдай домлаларнинг қадрига етишларинг керак, у киши ҳам сизлардай талабадан катта бўлган, ҳали яна ўсади”, деб шама қилиби...

Ҳаммасидан ҳам Ҳақбердининг ўзи йўқлиги сирли эди. Ўтган сешанбада бир қорасини кўрсатгандан буён йўқ. Балки, ростдан ҳам касал ётгандир, аммо буёқда шунча гапни қўзғаб, ўзи кўринмаётгани кўп шубҳа-гумонларга сабаб бўлди.

Марҳамат опа тўртинчи курсга мендан кейин кирган экан, лекциясининг ўртасида Эшназар Бобоқулов деган аълочи талабамиз кўл қўтариб ўрнидан турибди. Марҳамат опа ундан: “Ҳа, Эшназаржон, нимани тушунмадингиз?”, деб сўрабди. Ярамаснинг тушунган нарсаларига опамизнинг ақли етмайди.

“Навоий мероси билан бугунги кунда рўзғор тебратиш проблемасига қандай қарайсиз? Бундай қилиш улуғ шоир хотирасини топташ бўлмайдими?”, деб савол берибди. Бечора опамиз ўзини тушунмаганга солиб, Навоий ижодининг буюклиги, классик

шеъриятда “рўзгор” сўзи оддий рўзғордан чуқурроқ ижтимоий маъноларни ташиши, улур шоиrimiz хотин-қизларга оддий рўзғор бекаси деб қарамагани, балки бир пок хотиннинг оёқ изини юзта эркакдан баланд кўйганини гапирибди-ю, бари бир, Эшназарнинг

аччиқ илжайиб тинглаётганига чидай олмай, бир томони, эрининг ноуддалигидан беш болани едириб-ичириш, уйлантириш-чиқариш ўзининг зиммасида қолиб, йигирма бир йил олдин “Навоий ижодида ижобий хотин-қизлар образи” деган мавзуда амал-тақал кандидатлик ёқлаганидан бери илм билан шуғулланолмай, мана, бугун кенжা ўғли қатори болаларга майна бўлиб ўтирганига хўрлиги келиб йифлаб юборибди.

Нима деб таскин беришга ҳам ҳайрон эдик. Ўзимиз-ку, унинг ҳатто қайси қизига қанча кўйлак тикирганигача талабаларга гапириб беришидан кулиб юрар эдик. Бобокуловни деканатга чорлаб, тартибга чақирамизми? Нима деб? Ақли пичоқдай кесадиган бола, “Агар гапим нотўғри бўлса, исботлаб берсинглар”, деса, нима деймиз? Шу йил уни ҳатто паҳтага ҳам юборишолмади, ҳайдаймиз деб ҳам қўрқитишиди, ҳатто стипендиядан ҳам маҳрум қилишолмади — паҳта ихтиёрий, майли, бирон жойда мажбурий, деб ёзилган қоидани кўрсатинг— бораман, чора кўрсангиз, мен ҳам чора излайман, деб оёқ тираб тураверди! Маҳмудали ака, билмадим, нега унинг лақаби “Бойбўрибий” бўлиб кетган, Алпомишнинг отаси бу бийнинг олдида анча лақма бўлиб чиқади, “Ҳали алоҳида гаплашаман сен билан, жуда қашшанг бола экансан”, деди-ю, тағин терим кампаниясидай масъулиятли дамда бу гап каттариб, бир балоси чиқиб юрмасин деб, ўзи

ВККдан “Психически ненормальний” деган справка олдириб, сейфга ташлаб кўйди.

Эртасига Жамшидни учинчи курсдагилар қарсак билан кутиб олишиби — Марҳамат опа кечаги маш-машадан кейин дарсга келмай, ўрнига кирган эди...

Биринчи курсга кирган Келдиева аудиториядан хеч кимни тополмабди. Иккинчи курсдагилар бугун дружиначиликка боришдан бош тортишибди. Суннатов овозини баландлатган экан: “Бизга

бақиришга ҳаққингиз йўқ”, деб қўрслик қилишибди.

Етмишбоевнинг қон босими қўтарилиб, “Тез ёрдам” чақирдик, бақир-чақирдан сал қутулдик — жанжал тинчигунча даволанди.

Мен лекциямни “Кизим сенга айтаман...” қабилида ташвиқот билан ўтказдим, катталарни хурмат қилиш кераклиги, одоб ҳақидаги гапларим билан ўзимни ҳам, талабаларни ҳам зериктирдим, дарс охирида Эшназар: “Домла, кўрқоқлик асли одамнинг табиатида борми ё уни муҳит қўрқоқ қилиб қўядими?”, деган илмоқли савол берди. Ичимдан ичқиринди ўтса ҳам, “Э-э, ука, ботирлар ҳам қўрқа-қўрқа, охири қўрқавериш жонига теккандан кейин ботир бўлган”, деб кулгига бурдим, танаффусда унинг ўзини бурчакка олиб, домлаларга бунақа бетгачопарлик қилиши ноўринлигини ва факультетда юрган гапларда ҳеч қандай асос йўқлигини уқтиридим. “Бир асос чиқарсанчи, домла, қўшилармидингиз, сиз улардан кўра бизга яқинроқсизку?”, деди...

Уришиб бердим.

Бўлмайдиган нарсалар бўлаётгандай, миш-мишларда асос борми-йўқми, бунга қарамай, ҳаммаси ошкор тус олган, таълим-тарбия жараёни издан чиқиб, аудиторияларда кечаги мўмин-қобил талабаларимиз эмас, юзи таниш, ўзи нотаниш ғанимлар тўдалашиб, ҳар бир хатти-ҳаракатимиз, гапларимизни имтиҳон қилаётган, устига-устак, ўзимиз ҳам гурух-гурухларга ажралиб, ёвлашиб бораётган эдик.

Бир ёқда “ёш бир доцент” тўғрисидаги “тахмин” аниқ менга келиб тақалаётган, беш-олти домлаларнинг менга муносабати ҳам “тағин кейин...” тарзида сезиларли ўзгариб бошлаган эди...

Аксига олиб, “Бойбўрибий”, Олмаотада, оқсоқол профессорларимиздан бири, бавосили қўзиб, касалхонада ётибди, бири монографиямни якунлайман, деб уйга қамалиб олган, партком— малака оширишда, Турғун декан ўринбосари бўлгани билан, бировни йўлга солиш ўёқда турсин, ўзининг ҳам қайси йўлдан юришини билолмай боши қотган, хуллас факультетдаги ахволни сўраб-тергаб турадиган биронта бошли йўқ — шундай вазиятда Ҳақбердининг бу ишни охиригача ўйламай қилганига ишонмай қўйдим.

Оти олиб қочаётган чавандозга ўхшаб, ақлимиз шошиб қолди: “мумкин эмас”, “курақда турмайды”, “талабаларнинг ўзи тўқиган”, “тутуриғи йўқ” деган омонат тўсиқлардан босиб-хатлаб ўтиб кетяпмиз, на отимиз жиловга бўйин беради, на устидан сакраб тушишни эплаймиз...

Энг ёмони — миш-миш, олди-қочди, асаббозликни бир четга суреб, воқеаларнинг тубига синчиклаб назар солсак, чуқурлардан, кимга яхши кимга хатарли, мубҳам, мудроқ ҳақиқат ўрмалаб чиқаётганини кўрар эдик.

Кўл қовуштириб тураверсак—бўлмайдиган, ўладиган касал эмасдир, ўзини олиб келайлик, юролмаса, суяб киравмиз, нима ғалва эканини ўз оғзи билан тушунтиrsин, у еган сомсага биз пул тўлаб ўтираверамизми, тагига етайлик, дедим,

Ҳасаннинг машинасида Суннатов, Шамсиев Ҳақбердиникига кетишиди.

Ҳақбердининг келиши кўп миш-мишларни пучакка чиқарди-ю, аммо муносабатларимизни чалкаштириб юборди...

Кейинги гаплар аянч, аччиқ, ғариб ҳақиқат, жинлар базмидай рўё ва бетайин эди...

Эртаси куни ёқ Олмаотадан “Бойбўрибий” етиб келди: Суннатов телефон қилган экан.

Ҳақберди анкеталарни душанба куни тарқатиб, сесанбада эрталабоқ курсбошилар орқали йиғдириб, одамга айтишга ҳам уяладиган жойидан чиққан чипқони газак олиб, юрғизмай қўйгани учун чоршанба куни мукка тушиб ётиб қолган экан, кейин сезишимча, Суннатов у қаратган поликлиникага бориб, рост-ёлғонлигини текшириб ҳам келибди.

Аввалига Ҳақберди ҳеч кимга ҳеч қанақа анкетани кўрсатмайман, буни ўз илмий ишим — методикани социологик жиҳатдан ўрганиш учун қилганман, деб оёқ тираб туриб олди-да, жанжалга баттар мой кўйди.

Кафедрада тўпландик, деканатда ғалва бўлди, Ҳақберди анкеталарни ўзича ўйлаб топгани, ўзи тузиб, тарқатиш-иғишида башқа ҳеч ким қатнашмаганини айтди — юқоридан топшириқ ё

кўрсатма йўқлиги ойдинлашди-да, унинг кўлидаги анкеталарни нима қилиш тўғрисида баҳс кетди; бир қисмимиз Ҳақбердининг илмий изланишларига аралашиб нотўғрилиги, олимлик этикасига тўғри келмаслигини таъкидлаб, тадқиқотига халал бермайлик, дедик, кўпчилик, бирори азбаройи кизикканидан, бирори ўзидан кўрққанидан, анкета ҳаммамиз ҳақимизда бўлгандан кейин, ҳаммамизга тегишли, кўришимиз керак, деб туриб олишди.

Орамиздаги кунда баҳс, кунора ғурбат талабаларга бошқача таъсир қилди — бу тортишувларнинг нима билан тугашини кутиб, тинчланиб қолишди, дарслар ҳам изга тушиб, силлиқроқ ўта бошлади.

Бошқа “бўшармиш”, “кетармиш” деган гаплар босилиб, факат Ҳақбердининг ўзи, кўлидаги анкеталарга муҳрланган сирнинг ўзи қолди, мен, Сухроб, Юлдузхон, яна катта Боқиев билан Тиллабоев уни ёқлаб чиқдик, анкета талабаларнинг хулқига ёмон таъсир ўтказган бўлса, сабаби анкетанинг ўзида эмас, факультетдаги аҳволда, дедик: Суннатов, Шамсиев, Шербоевга ўхшаганлар анкета талабаларга кутқу бериб таълим-тарбия жараёнига зарар етказди, ўқитувчиларни обрўсизлантирди, бу учун Абдикулов жавоб бериши шарт, деган гапга ёпишиб олишди; яна гурух, гуруҳчаларга айрилдик, тепамизда — бунақа пайтлари қарши томонларнинг фикрларини тинглаб, гёё кўнглимини топиб яраштирадиган, шу билан раҳнамога айланадиган ҳамишаги “Бойбўришимиз” — аччик-тизик, айтишиб юравердик.

-урбатимиз ректоратга ҳам икки-уч марта чиқиб тушди.

Аммо Ҳақберди айтганидан қайтмади, “Бойбўрибий”, малака оширишдан бир ҳафтага жавоб олиб келган партком Орзимуродовнинг алдаб-сулдашлари, коллективни хурмат қилишга чақиришлари ҳам, мулойимгина таҳдид-пўписалари ҳам кор қилмади. “Юз ўн етти коракўзнинг менга ишониб билдирган кўнгил ҳақиқатини сизларга топшириб қўймайман. Бунақа талаб қўйишга хуқуқий ваколатларинг ҳам йўқ, аксинча, менга ёрдам беришларинг керак эди”, деб туриб олди.

Охири “Бойбўрибий”нинг ўзи шунақа хуқуқий-қонуний йўлини топди, тўғрироғи, биз тортишиб юрганда, эски туллак, ким билан

учрашса, учрашиб, ўқитувчи қайси вақтда қандай анкета сўрови ўтказиши мумкинлиги тўғрисидаги тартиб-қоидаларни аниқлаб олиб, масалани кўндаланг қўйди: Ҳақбердининг иши ғайриқонуний экан! Ўқитувчининг анкета сўрови ўтказиши олдиндан факультетнинг ҳам, кафедранинг ўқув планида белгиланиши, шундан сўнг ўзининг индивидуал иш планига киритилиб, кафедрада тасдиқланган бўлиши, шунда, мавжуд қоида бўйича, ўқитувчи

бошқа ҳамкаслари хақида эмас, факат ёлғиз ўзи тўғрисида саволлар тузиб, объектив фикр тўплашига рухсат бор экан. Ҳақбердининг бу ишни ўз билгича — на деканат, на кафедра билан “предварительно!” келишиб олмай, индивидуал иш планида кўрсатмай, “негласно!” қилганлиги таълим-тарбия жараёнида “трублейшер нарушение!” бўлиб, масала, албатта, партком йиғилишида кўрилиб, тегишли хulosасини олиши шарт экан; “Бойбўрибий” бунаقا пайтлари керакли сўзларни энасининг маҳрига тушиб, кейин ўзига мерос қолгандаи, шу гапим билан истаган одамингни варанглатиб отиб ташлайман, деб ишлатар, аммо тегиб кетса, хун тўлаб юрмай, деб нишонни сал тепароқдан олар эди.

Ҳақбердининг анкеталарни олиб келишдан бошқа чораси қолмади, лекин ўз навбатида у ҳам шарт қўйди: йиғилишда менинг масалам кўриладиган бўлса, анкета натижаларини ҳам ошкора муҳокама қиласизлар, бу учун аввал комиссия тузасизлар, деди. Орзимуродов—бошлиқ, ўзбек тили кафедрасидан профессор Бегалиев (чакириб келинади), Суннатов, ўзбек адабиёти кафедрасидан мен билан Сухроб комиссия составига кирдик. Суннатовни киритгани учун “Бойбўрибий”нинг ўзи “Мен — “заинтересованный личность!”” холис турай, иш объектив бўлсин”, деди..,

Ҳақбердининг ўзи ёнидан пул тўлаб, ўзининг ҳам, бизнинг ҳам бошимизга орттирган машмашасининг мазмуни шундай эди — декан билан икки профессор — кафедра мудирларидан бошқа, қолган ўқитувчиларнинг исм-шарифлари илмий унвон-даражаларига қараб:

1. доц. ЕТМИШБОЕВ К. Е.
2. доц. ОРЗИМУРОДОВ Б. С.
3. доц. ТОЛИБОВАЮ. С... 15. ффк. БОҚИЕВ Қ. А... 18. к. ўқ.

КЕЛДИЕВАБ. Т... 22. кч.ўқ. БАДАЛОВ Ж. Й...

тартибида бир устунга тиркалиб, қаршидаги “билим савияси”, “дарс савияси”, “муомала маданияти”, “талабчанлиги”, “характери” деган устунларга ҳар бир талаба ўз баҳосини “мусбат” ё “манфий” шаклида белгилаб, энг охирги —“таклифлар” деган устунга, агар ўқитувчини ўз фанини ўтишга нолойиқ, ҳисобласа, бунга муносиб ўқитувчининг шу рўйхатдаги тартиб ракамини ёзди, масалан, “II. доц. САЙДУЛЛАЕВА М. Ҳ.—Қ—Қ 22, яъни Марҳамат опамизнинг “муомала-маданияти”, билан “характери” яхши, аммо бошқа “савия”лари паст, унинг фани—“Ўзбек адабиёти тарихи” курсини “22. кч. ўқ. БАДАЛОВ Ж. Й.”— кичик ўқитувчи Бадалов Жамшид Йўлдошевич ўтгани маъқул, мабодо, талабанинг фикрича, бу фанни ўтадиган ўқитувчи факультетда бўлмаса, “нўл” қўйиб қўйилади

(масалан, “9. доц. ШАМСИЕВ Т. К. ——-Қ Қ Қ 0, демак, доцент Шамсиев

Таваккал Каримжоновичнинг “билим савияси”, “дарс савияси” ёмон, бошқа жиҳатлари яхши, у ўтадиган “Эски ўзбек тили” курсига четдан ўқитувчи чақириш керак.

Анкетани тўлдирган талабанинг исм-шарифи маҳфий қолади.

Анкеталар билан бир ўтиришдаёқ танишиб чиқдик, ўрганиб текширадиган ҳеч нарсаси йўқ, ҳаммаси кундай равшан, Ҳақберди ўз ишини тартиб-режа билан сидқидилдан бажарган, ҳар бир ўқитувчига қанчадан “мусбат”, қанчадан “манфий” тушганини чўтга қоқиб, фоизга чаққан, алмаштириш ҳақидаги таклифларни ҳам вижданан кўрсатиб қўйган эди. Анкеталарнинг ўзида, Ҳақбердининг ҳисоб-китоб қилган қофозларида ҳам англашилмовчилик йўқ— бари тўғри, фақат... биз миш-миш, олди-қочди, бетутуриқ деб юрган гаплар бу қофозларда аник-таниқ, ҳеч бир эътиrozга изн бермайдиган “мусбат”, “манфий”лар, ракамлар билан бераҳм ҳақиқатга айлантириб қуйилган эди:

1. доц. Етмишбоев К. Е. Қ 8%;—92 %; қарши—113
2. доц. Орзимуродов Б. С. Қ 44 %;—56 %; қарши— 59
3. доц. Толибова Ю. С. Қ 93,6%;— 6,4%; қарши — 3
4. доц. Суннатова А. Ш. Қ 45,7%; —54,3%; қарши—60

5. доц. Шамсиев К. Б. Қ 73,2%;—26,8%; қарши—36
6. доц. Ашрапов М. А. Қ 98,1%;— 1,9%; қарши— 0
7. доц. Ражабов Х. Д. Қ 39 %;—61 %; қарши— 73
8. доц. Шербоеа К. Ш. Қ 31,3%; —68,7%; қарши— 72
9. доц. Шакаров Т. Ш. Қ 17,5%;—82,5%; қарши—81
10. доц. Маманова М.М. Қ 49,3%;—50,7%; қарши—66
11. доц. Тиллабоев Б. Т. Қ 48,4%;—51,6%; қарши—59
12. доц. Сайдуллаева М. Х. Қ 22 %;—78 %; қарши — 91
13. ффк. Эгамов С. Э. Қ 92,9 %;— 7,1%; қарши— 10
14. ффк. Бокиев И. И. Қ 38,5%;—61,5%; қарши—68
15. ффк. Бокиев И. М. Қ 63,8%;—36,2%; қарши — 43 16. ффк. Байдуллаева Т.А. Қ 86,3%; —13,7%; қарши— 12 17. ффк. Абдиқулов Х.У. Қ 50,6%;—49,4%; қарши— 56 18. к.үқ. Келдиева Б.Т. Қ 2,8%;— 97,2%; қарши—114 19. к.үқ. Бердиназаров Х. Ф. Қ 72 %;—28 %; қарши — 37 20. к.үқ. Бектошева Ш.М. Қ 32 %;—68 %,- қарши — 67 21. к.үқ. Халимбоева Д.Н. Қ 88,8%;—21,2%; қарши—29
22. к.үқ. Бадалов Ж.И. Қ 100%; — 0%; қарши— 0

Ҳар эҳтимолга қарши бухгалтериядан битта электрокалкулятор олиб келиб, рўйхатнинг ҳар жой-ҳар жойидан бешта ўқитувчининг “мусбат-манфий”ларини қайта ҳисоблаб, фоизга чақдик—тўппа-тўғри чиқди, масалан, Етмишбоевга 8 фоиз “мусбат”, 92 фоиз “манфий” кўйилибди, 113 талаба унинг ўз фанини ўтишига қарши чиқкан...

Суҳроб, ўзининг кўрсатгичлари бошқаларникига нисбатан ҳаттоти жуда яхши (92%;—7,1% қарши—10) бўлса ҳам, ранги оқариб, гулдираб қолди. “Худди ҳали ўлмаган одамларнинг жанозасида ўтиргандай бўляпман”, деди, Суннатовнинг юзига бир шум ифода қалқди-ю, индамади, тамакига зўр берди, профессор Бегалиев жуда зериккандай чўзиб уф тортди, Орзимуродов ҳаммамизга бир-бир қараб чиқди-да, Суннатовга имо қилди, Суннатов чиқиб кетди. Бир-бирилизни томоша қилиб ўтиравердик. Анча жимликдан кейин Орзимуродов йифламсираб гап бошлиди: “Буларни бирорвга кўрсатиб бўладими? Шарманда қиласи-ку?” “Шарманда бўламизми, бўлмайзми, лекин бор гап”, дедим мен. “Э-э, қойилман!—деди Суҳроб.—Ўзини ҳам қўшиб, тўғрисини кўрсатиб қўйибди-я! Ахвол

шунақа эканда-да, а? Ҳаммаси жойида қўриниб юрган эди, буни қаранг!” “Коллективни ўйлайсизми, йўқми?—деди бурилиб Орзимуродов.— Ё фақат ўзингизнинг яхшига чиққанингизга қувониб юраверасизми?” “Шуям коллектив бўлди-ю”, деди Сухроб. Бегалиев деразага қараб: “Яхшими, ёмонми —коллектив,—деди.— Битта Абдиқуловларингнинг ҳақиқатни очиши билан ахвол тузалиб қолмайди. Буни тузатиш деканнинг ҳам, ректорнинг ҳам, ҳатто министрингизнинг ҳам қўлидан келмайди. Минг йилдан бери айтаман: факультетга ҳар кимни олавермайлик, деб. Мана, оқибати!” Орзимуродов унинг гапни қаёқка бураётганини тушунмай, сапчиб тушди: “Ўн йилдан бери бор-йўғи тўртта одам олдик-ку, домла! Мана, Ашрапов, Байдуллаева, Сухробжон билан Абдиқуловнинг ўзи...”

Бегалиев унга қараб руҳсизгина: “Яшанг”, деб қўйди. Орзимуродовнинг алами келди: “Гап ахволни тузатиш тўғрисида эмас, бу коғозларни нима қилиш тўғрисида кетяпти, сиз бўлсангиз...” “Қоғозларими?— деди Бегалиев киноя билан.— Гугуртингиз борми?” Сухроб чўнтағига шапатилаб кўриб, гугурт олди. “Менга эмас,—деди Бегалиев.—Йигирма йилдан бери чекмайман. Ана, Бердимуродга беринг, ёқиб ташлайди”. Сухроб шоша-пиша гугуртни чўнтағига тиқди. Орзимуродов яна эзилди: “Нима қил дейсиз, бўлмаса? Мана, санаб чикинг: нечта одам? Ҳайдаймизми шуларни? Шунча одамни бўшатиб, ўрнига қайдан одам топамиз? Бошқа институтларда ҳам шундай. Жа шу Абдиқуловнинг қоғозлари билан кўзимиз очилгани йўқ, ўзимиз ҳам билар эдик...”

“Ким сизга ҳайданг, деяпти? Ҳайдаш билан иш битса экан”, деди Бегалиев. “Очиқ партия мажлиси ўтказайлик-да, муҳокама қилайлик,— дедим.—Кун тартибиға кадрлар масаласини қўяйлик. Мана шу кўрсаткичлар

асосида доклад тайёрлайлик — комиссия номидан. Ҳақберди ҳам ўз фикрларини очиқ айтсин. Майли, талабалардан ҳам эшишиб кўрайлик...” Орзимуродов жириллаб берди: “Качондан бери ўқитувчи ўқувчига имтихон берадиган бўлиб қолди?! Ҳамма гапларинг тўғри, айб бизда, деб айтамизми талабаларга? Кулгили ахволда қоламиз-ку!

Ха, энди қайсиси кўп йиқилган, жавоб беролмаган бўлса, учини олган-да бу қофозларда.” “Ёппасига ҳаммаси аламзада эмасдир”, деди Сухроб. Мажлисда бу томонини ҳам аниқлаб оламиз”, дедим. “Ҳали ким билади, балки бу Ҳақберди жўрангиз... Жа бошқаларни анойи деб ўйламанг”, деди Орзимуродов. “Кўп мижи-мижи қилмайлик,— дедим.— Ҳаммаси шу йиғилишда ойдинлашади. Бу ерда ҳал қилолмаймиз”, “Кўриниб турибди-ку,—деди Орзимуродов.—Тўқсон саккизу бир! Кеча келган болага юз фоиз! Бадалов шунча тажрибали бўлиб қолдими?” “Оббо,— деди Суроб,— анкеталарни Абдиқуловнинг ўзи тўлдирмаган-ку!” “Минус”ларни “плюс” қилиб чиқиш қийин эканми?— деди Орзимуродов.—Ўшанақа сиёҳ билан битта чизиқча туширса бўлди-да,— мана, бунақа қилиб...” Сухроб унинг қўлидан ушлади: “Бузманг!” “Ана шу билиб юрганларингизни ҳам йиғилишда очиқ айтасиз,— дедим.— Биз ҳам анойи эмасмиз, Абдиқулов “плюс”ларни ўзи “минус” қилиб чиқсан, дейсиз”. Орзимуродов менга хафа бўлгандай қаради: “Э-э, мен... энди шунақа майда гапларни йиғилишда кўтариб юрамизми? Бўлиши мумкин деяпман, шундай қилган, демадим-ку”. “Шубҳангиз бўлса,— деди Сухроб,— келинглар, анкеталарни экспертизага берамиз, танишларим бор, бир кунда текшириб беришади...” Бегалиев ёқимсиз кулди: “Агар бу қофозлар ташқарига чиқсан...”

Жудаям ташвишманд, ўта шиҷоатли тусда “Бойбўрибий” кирди — гўё бу ерда биз ёш болалар ишни расво қилиб қўйганмиз-у, бу кишимиз ҳам гуноҳимиздан ўтади, ҳам хатоимизни тўғрилаб беради...

Суннатов унга эргашган кўйи бидирлаб кетди: “Мен нима деяпман, Маҳмудали Аскарович? Буларга ҳам тушунтирдим. Мана, Сухробжон ҳам бу қофозларни колективга суикасд, деб тўғри айтди...” Сухробнинг кўзлари олайиб кетди: “Қачон?” Суннатов шоша-пиша гапини тўғрилади: “Мен нотўғри тушунган бўлишим мумкин, Сухробжон, лекин сиз коллективнинг жанозасида ўтирибман, дедингиз, ҳаммамиз эшитдик. Ҳали жуда эрта бу гапни айтишга...” “Менми?” деди Сухроб баттар ловиллаб. “Ҳой, қўйинглар, яхшимас,—деб иноят қилди “Бойбўрибий”.—Тилнинг суяги йўқ, оғиздан чиқиб кетган бўлиши мумкин. Буквалний тушунманг,

Ахроржон. Хў-ўш...” “Сўкинманг,—деди Суннатов Сухробга. — педагог, олим одамсиз!” “Э-э, мен сўкинмаяпман, тавба, деяпман,— деди Сухроб анграйиб.—Одамни бунақа...” “Бойбўрибий” кордонлик билан уларни тўхтатди: “Хў-ўш, танишдингларми, нима қарорга келдинглар. Домла, қандай, бу қофозларда гапирса, арзигулик бир нарса бормикан? Бу Абдиқулов укамиз ўзи ўтирган шоҳга болта урмабдими? Ёмон йиқилса, биздан кўради-да, кейин...” Бегалиевнинг ўрнига Орзимуродов жавоб берди: “Ҳайронмиз, бир томондан, бу қофозларда... иккинчи томондан, мана, Маҳди Ашрапович ҳам...” Суннатов яна бидирлаб кетди: “Буларга ҳам тушунтиридим, ҳозир сизга

айтган гапларим, Маҳмудали Асқарович: анкеталар жуда саводсизлик билан тузилган: мана, ўзингиз кўринг, “билим савияси”, “дарс савияси” — иккови битта нарса эмасми? Яна қаранг”. “Муомала маданияти” ҳам бор, “характери” ҳам бор: “муомала маданияти” “характер”дан келиб чиқмайдими, ўзи эмасми? Нега бунака бўлиб ташлаган — “минус”ларни кўпайтириш учун! “Таклифлар” эмиш! Кимни олиб, кимни қўйишни ёш болалар белгилайдими? Ундай бўлса, деканатни, ректоратни тарқатиб юборайлик — болаларнинг ўзи хоҳлаган ўқитувчисини чақириб дарс тинглайверишин! Мен тушунмай қолдим, Маҳмудали Асқарович, бу совет педагоги, етук олимларни масхара қилишдан бошқа ҳеч нарса эмас!” “Бойбўрибий” Суннатов гапираётганда ҳаммамизни кузатиб турди — ўрганди. “Жуда ошириб юборманг, Ахроржон. Гапларингиз кўп томондан тўғри-ю” жуда сгустит қиляпсиз. Шусиз ҳам бу борада ҳамма яқдил, деб ўйлайман. Ҳозир ҳар хил шахсий муносабатларни йиғишириб қўйиб, коллективни ўйлаш керак. Талабаларнинг олдида ўқитувчиларимизнинг илгаригидай авторитетини кўтариш—мана, главний вопрос. Бир бузгунчини деб... умуман, яхши эмас. Хў-ўш, домла, менингча, бу ишни чўзиб юрмасак, мен бир жиддий, умумий ишимизга ёрдам берадими, деб ўйлаган эдим, арзимас гап экан...” Бегалиев деразадан кўз ўзмади. Унинг ўрнига яна Суннатов бидирлади: “Ҳаммамиз ҳам шу фикрда тўхтаган эдик, Маҳмудали Асқарович,”. Сухроб, кўзлари қисилиб, энгагини чўзди: “Қайси

фикрда?!” Суннатов унга ялинганнамо қаради: ишни бузманг-да, жўражон! “Бу масалани олдинроқ—шу Абдиқуловни ншга олаётганда ўйлаш керак эди,— деди Бегалиев деразадан кўзини олиб,—эсингизда бўлса, ўшанда носинашта одамни олишдан эҳтиёт бўлинг, деб айтган эдим, Махмудали, қулоқ солмадингиз”. “Айтгандингиз, айтгандингиз,— деди “Бойбўрибий” гуноҳкорона тусга ки, иб.—Лекин министрликдан қўнғироқ бўлди, мана, Маҳдијондан сўрадим, ўзи қандай одам, кейин бизни уялтириб қўймайдими, деб. Жуда яхши одам, дейишди”. “Энди яхшилигини кўрмайсизми! Мана санаб чиқинг, нечта одамнинг юзига лой чаплаган!”—деди Суннатов. “Да-а,— деди қайғу билан “Бойбўрибий”— Олтмишга киряпмиз-у, ҳалигача одам танишни билмаймиз. Яхши йигит, деб унга ишонч билдириб юрсак, қилган ишини қаранг! Чистейшее провокация! Шуларни битта савол қиласа ҳам бўлар экан. Нима кераги бор эди, а талабаларни ҳам чалғитиб. Жўрангизнинг мақсадини тушунмаяпман, Маҳдијон. Фикрларини очиқ ёзиб берса ё бирон мажлисда айтса ҳам бўлар эди-ку. Аҳроржон, энди ука, сиз ҳам жуда бунақа... ошириб юборманг. Одамлар нотўғри тушуниши мумкин. Айтгандай, санаб олдингизми?” “Санадим,— деди Суннатов.— Бир юзу ўн еттита”. “Санамай қўярмиди!”, деди Сухроб. Бегалиев соатига қаради: “Нима қилдик энди? Комиссия хулосасини ким ёзади?” “Ҳали ҳеч қандай хулосага келмадик-ку,— дедим зўрға ўзимни босиб.— Нуқул Ҳақбердини ёмонляпмиз. Анкеталарни, улардаги фактларни нима қиласиз? Кўз юмиб кетаверамизми? Сиз айтгандай, Махмудали ака, Ҳақберди нотўғри йўл тутгандир, лекин тўғрисини очиби-ку. Ўртага қўйиб, кенгашиб олайлик”. “Бойбўрибий” қўлинин кўксига қўйди: “Албатта, албатта, Маҳдијон, ана

шундай решительний гапларингиз учун ҳурмат қиласиз-да, сизни. Кенгашайлик, келишайлик. Мана, домла, сиз, Аҳроржон, Сухробжон, ўртоқ Орзимуродов — камчилик эмассизлар”. “Мен кўпчилик деганда, ҳаммани айтяпман,— дедим.— Анкеталарни ҳамма кўриб чиқсин, муносабатини билдирсин: тўғри бўлса—тўғрилигини, нотўғри бўлса—нотўғрилигини...” Орзимуродов қийналиб қаради: “Ҳеч тушунмаяпман сизни! Ё соддаликка соляпсизми ўзингизни? Биз

киммиз — шу кўпчилик ваколат берган комиссия! Биз нима десак, шу ҳамманинг фикри-да”. “Лекин бу ерда кўпчиликнинг фикрини айтмаяпмиз-да,—дедим.—Ҳар ким ўзиникини ўтказиш пайида”. “Жуда мантиқни севасиз-да”, деди Орзимуродов бошқа гап тополмай. Суннатов чичонглади: “Нега ўзимизники бўлар экан? Мана, Маҳмудали Аскарович, чистейшее провокация, дедилар-ку! Бу провокация кимга карши қилингандар—кўпчиликками? Биз кимни ҳимоя қиляпмиз? Абдиқуловними ё шунча йилдан бери қўлни-қўлга бериб, ахил ишлаб келаётган колективними? Шундай экан, кўпчиликнинг фикри қайси томонда бўлади?” “Сиз томонда!”, деб кесатди Сухроб. “Сиз кўп ҳам гапни бураверманг,— деди Суннатов.— Мен кўпчилик томонида турганим билан фаҳранаман. Провокаторнинг ёнини олиш билан эмас.” Орзимуродов унга енгил тин олиб қаради. “Шунақа сўзларни сал ўйлаб ишлатайлик,— дедим мумкин қадар вазминлик билан.— Мавқеимизга ҳам, ёшимизга ҳам ярашмайди”. “Ҳа, ёқмаяптими?— деди Суннатов тантана билан.— Провокацияни провокация, демай, яна қанақа аташ керак?” “Аввал исботлайсиз,— дедим.—Йиғилишда! Манави анкеталар мисолида. Ҳозир айбловчининг ўзини айборд қиласман, деб уриняпсиз. Лекин айбнинг ўзини ҳам тушунтирасиз”. “Тушунтираман! Лекин, ҳайронман, яна қанақа исбот керак сизга? Нима, мени йиғилишда бу гапларни айттолмайди, деб ўйлайсизми?” “Бойбўрибий” илондай буралди: “Ўртоқлар, укалар, арзимаган нарсани деб... Маҳдијоннинг гапи ҳеч нотўғри эмас. Абдиқулов бу ишни душманчиликдан қилмаган бўлиши мумкин. Яқинда қишлоқдан келган, олий ўқув юртининг тартиб-қоидаларини билмайди. Районо-пайоно ўлчови билан юрган одам-да. Балки у бизга яхшилик қилишни кўзлагандир. Комиссия хулосасига, Маҳдијон тўғри айтдилар, бунақа “провокация-мровокация” деган гапларни киритиш шарт эмас. Асли ўзи шунақа-ю, энди, нима қилайлик, бурним сассиқ, деб кесиб ташломмаймиз. Кеча ўзимиз Абдиқуловни қучоқ очиб қарши олсак-да, бугун кетига тепиб юборсак, яхши эмас. Тушунтирайлик, тарбиялайлик бу галча кечирайлик. Адашиб жар ёқасига бориб қолган одамни тўхтатиш ўрнига, итариб юборсак... Шахсан ўзим яхши кўраман шу одамни,

ачинаман: келганидан бери битта костюм-шымда юрибди! Балки унга моддий ёрдам керакдир. Ҳовли оламан, деб анча қарзга ботганини эшилдим, квартира олиб беролмайганимиздан эзилиб кетдим, ишонасизларми, жуда эзилдим. Баъзан иш-иш деб, одамни унутиб қўямиз. Келинглар, майли, бу йил, гап орамизда қолсин, битта-яримта одами бўлса, тўғри менга учрашсин, ҳар кимга сарғайиб юрмасин, тўғри ўзимга учрашсин, бўйнимга оламан. Майли-да, ким-кимларга яхшилик қилмаймиз, ўзимизга ҳам карашайлик. Қарзини узсин, кўкрагини кўтариб юрсин.

Менимча, кейин бунақа номаъқулчиликларни такрорламайди... Бундай, яххиси, Аҳроржонга топширайлик, илтимос, Аҳроржон, деканат билан парткомнинг особий заданияси — комиссия хulosасини уйда ёзиб, эртагтайёр қилиб келасиз. Бу ерда айтилган ҳамма фикрларни инобатга оласиз: боя ўзингиз айтган гаплар, анкеталар саводсизлик билан тузилганлиги, оқибати, ҳм, яна... энди, буёини ўзингиз тўғрилайсиз, лекин такрор айтаман, ошириб юборманг, Маҳдијон ҳам жуда тўғри таклиф киритдилар, боягидака гапларни ёзиб юрманг, орамизда қолади. Ректорат ҳам қистоқقا оляпти, уларга тезроқ етказиш керак хulosани. Улар ҳам ўқиб, ия, орангизда провокатор пайдо бўлибди-да, тезроқ, думини тугинглар, деб қолишса, Ҳақбердијонга ҳам яхши бўлмайди, ҳа, бир инсонни, олимни ўқотиб юборишимиз мумкин, кейин қачон ўнгланади? Ошибка жойларини указать қилинг, маъқулми? Бир куни келиб унга қандай яхшилик қилганимизни ўзи тушуниб олар... Кейин ўртоқлар, бу масалани партмайлисга қўйиб, ҳамманинг дилини оғритиб юрмайлик, жуда хунук гап, кейин бошқа жойларга ўрмалайди, ҳар хил гап-сўз... Комиссия хulosаси охирги нуқта бўлсин, дейман. Майли, эртагами, кейинми, Ҳақбердијоннинг ўзини таклиф қиласайлик, комиссия фикри билан таниширайлик, хатоларини мардлик қилиб бўйнига олсин, биз ҳам мардлик қилиб, айrim жойларини юмшатамиз. Энди, бу қоғозларни менинг сейфимга бекитиб қўйсак, тағин битта-яримтанинг кўзи тушиб...” ўзимни босганим сайин, босилиб-янчилиб кетаётгандай бўлдим-да: “Бу ерда комиссия текшириши эмас, театр томошаси кетаётганга ўхшайди”,

дедим, гапимни давом эттиrolмадим, Сухроб ловиллаб берди: “Нега сизнинг сейфингизга гумдон бўлиши керак? Нега ҳаммамизнинг номимиздан Суннатов ёзди? Бунақа экан, Орзимуродов, Суннатов учовларинг ёзиб қўяверинглар эди! Комиссия деб бизни қўғирчоқ қилиш шартмиди?” “Бойбўрибий” алплар замонида яратилганидан бери бунақа жizzаки тўғрисўзларни кўравериб, пишиб кетган эди, яна буралди: “Мени тушунмадингиз, Сухробжон. Пишириб ейманни бунақа қофозларни? Наҳотки менга керак, деб ўйласангиз? Тағин йўқолиб-нетиб, Абдиқуловнинг тадқиқоти чиппакка чиқиб юрмасин, деган ниятда айтдим-ку. Комиссия бир хulosага келсин, кейин ўзига топширамиз — ишлайверсин. Умум ишимизга ёрдам. Хулосани тезроқ ёзсан, Абдиқуловга ҳам яхши эмасми— иши тўхтаб турибди. Мен шу томонини ўйлаяпман. А, Ахроржон, фикрларингизни бир тартибга солгандан кейин, ўзингиз ҳам кўрасиз, қўл кўйиб беришингиз керак-ку. Кейин, Маҳди Ашрапович, шундай нозик ишни томоша деб, бизни ҳам артистга чиқариб қўйганингиз яхши эмас, майли, мен бу гапни ҳазил, деб тушунаман. Сизни шахсан мен ҳам, коллективимиз ҳам жуда ҳурмат қиласиз. Тартуга бориб, шунча эътиборли, номдор одамлар қаторида сизнинг докладингиз ҳам таъкидлаб ўтилганига қанча қувондик! Мана, Олмаотада ҳам сизни Айвар Калниньш деган фольклоршунос сўради: “Қандай юрибди?” деди. “Жуда яхши, жуда яхши, жуда истеъодли одам, етук олим, яқинда ёқлайдилар”, дедим, бағоят хурсанд бўлди. Ўша ернинг ўзидаёқ “Авторефератларини шахсан ўзингизга юборамиз, битта кулинг ўргилсин такриз уюштириб берасиз”, деб ваъдасини олдим. “Пажалиста”, деди.

Докторлик ёқлаш жуда оғир иш, мана, ҳозирдан ёрдамни тайёрлаяпмиз, шошиб қолманг, деб. Мана шу ғалвалар ўтсин, сизга албатта шароит яратиб берамиз. Гапим қатъий лекин”. “Суннатов ёзган хulosага индамай қўл қўйиб берсам, мени ҳам доцентликка ўтказсангиз керак,— деб узиб олди Сухроб.— Ҳужжатларни тайёрлайверайми?” “Бойбўрибий” қўлларини икки ёнга керди: “Ана холос, шунақа қилманг-да, энди, Сухробжон! Доцентликни мен бермайман, ВАК тасдиқлайди-ку, ахир. Ҳай, деканман, лекин

факультет менга отамерос эмас-ку, доим шу ишда турсам. Бугун — мен, эртага — сиз. Доцент ҳам бўласиз, профессор ҳам... Ҳали бу гапларни эслаб кулишиб ҳам юрамиз. Худо хоҳласа, Маҳдижоннинг зашитасини эсон-омон ўтказиб олсак, деканликни шахсан ўзим қўш қўллаб топшираман. Чарчадим, шунақа ғалвалар деб илмий иш қолиб кетяпти, мен ҳам докторликни якунлаб олай...” “Ўртоқлар масаладан жуда узоқлаб кетдик,— дедим, Бегалиев менга ялт этиб қараб олди.— Майдо-чуйда гапларни қўйиб турайлик. Деканлик тўғрисидаги мишишларни олдинги мажлисда аниқлаб олдик, бу масалага қайтмайлик”. “Мен тўғрисини айтяпман, Маҳдижон,—деди “Бойбўрибий” гул-гул очилиб.— Агар доктор бўлсангиз, шу ишни сизга топширмаган номард!” Унинг гапини эшитмаганга олдим: “Менингча, бундай, комиссия хulosасини шу ерда, ҳаммамиз бирга ёзамиз. Анкета сўрови натижаларини, ўша олдинги келишганимиздай, йиғилишга қўямиз. Хуло самиз ҳам шу фактлар асосида бўлади. Агар, Маҳмудали ака, анкета сўрови ўтказиш жараёни нотўғри бўлса, Ҳақбердининг ўзи тушунтириш беради: нима мақсадда, нима учун қилган, бу йўлнинг нотўғри эканлигини билганми, йўқми — айтади”. “Мен ҳам шуни айтяпман-да, Маҳди Ашрапович,—деди “Бойбўрибий” енгил тортгандай.— Мутахассислар билан гаплашдик. Педнаукка бордим, ўзимизнинг психология кафедрасидагилардан аниқладим, ҳаммасида бир гап—нарушение, грубейшее нарушение! Фақат... йиғилишга қўйисак, унда... Абдикуловга официальний чора кўришим керак бўлиб қолади-да. Тақдирини ўйляяпман, каранг, қанча одам тўғрисида ёмон гаплар... Талаб ташлашмайдими? Зўр билан олиб қолсак ҳам, кейин, ҳаммани ўзига душман қилиб, қандай ишлайди?!” “Майли,—дедим,—бу томонини деканат, парткомнинг ўзи ҳал қиласи. Шунақа маҳсус қарор бўлса, Ҳақберди тегишли жазосини олар. Лекин мен унча ишонмайман: анкета деган нарса мавжуд ахвол тўғрисида объектив фикр тўплаш, бунинг йўллари қандай қилиб чеклаб қўйилади? Комиссия деган отимиз бўлгандан кейин, йиғилишгача буни ҳам аниқлашимиз керак. Лекин, нима бўлса ҳам, Абдикуловнинг анкета сўрови ўтказиши фактларни очиқ-ойдин қилиб қўйди...” “Маҳдижон,— деб мени гапдан тўхтатди шу пайтгacha

ўзини мудраганга солиб ўтирган Бегалиев.— Сиз фанда жуда зўр одамсиз, аммо ҳаётда ҳали жуда ёшсиз”. “Домла,—дедим мен ҳам унинг гапини кесиб,—гап ҳозир менинг ғўрлигим тўғрисида эмас, каттароқ нарса — ҳақиқат тўғрисида кетяпти. Бу ерда ҳадеб эшакнинг гўшти харомлигини муҳокама қилиб, меҳнатини гапирмаяпмиз”. Бегалиев қаддини ростлаб ўтириди, чинакам илмий баҳсга ҳозирлангандек, жиддий тортди: “А, худди шу масалада ёшсиз! Бу ерда эшагингизнинг гўшти ҳам харом, меҳнати ҳам, кечирасиз-у, харом. Яъни очган ҳақиқати ҳам, агар уни ҳақиқат, деб

қарасак ҳам, объектив эмас. Субъектив! Ҳозир исботлаб бераман. Биринчидан, бу анкеталарни осмондан тушган фаришталар эмас, ўзимиз ўқишига қабул қилган болалар тўлдириган...” “Нима, Абдиқулов бошқа факультетнинг болаларига тўлдиририши керакмиди?”, деди Сухроб ажабланиб. “Шошмай туриңг, ука, сизга эмас, Маҳдига гапиряпман, — деди Бегалиев уни силтаб. — Иккинчидан, уларни, қай тартибда қабул қилганмиз? А? Нечтаси ўзи кирган? Бирори—укаларинг, бирори— хотинларингнинг укалари, катта аммангизнинг кенжаси, кичик холангизнинг тўнғичи... Ҳар группада, бўлса, ўзи кирган икки-учта, борингки, бешта бордир. Хўш, Маҳдининг одами йўқ, сездирмай кирилган бўлмаса, билмадим. Лекин, мулла Сухроб, сиз нечта одам кирилгансиз? Фақат тўғрисини айтинг”. Сухробнинг ранги яна оқарди: “Мен ҳеч кимдан яширганман: битта укам билан битта қайнум ўзимизда ўқийди. Опамнинг ўғлини физматга кирилганман, буни ҳам айтишим мумкин. Учкови ҳам “аъло”га ўқийди. Ўзим шу ерда ишлаб, бошқа институтга олиб боришим керакмиди? Менда унақа пул йўқ...” “Сизни айбламоқчи эмасман,— деди Бегалиев.—ҳаммаларинг шундай”. Менинг жаҳлим энди чиқди: “Сизда-чи, домла? Ҳозир шу муҳокама қиласиган масалами? Анкеталардаги фактларни гаплашайлик”. “Э-э,—деди кўзларини жавдиратиб “Бойбўрибий”,— неча марта Бекназар Турдиевичга айтдим, бунақа шароитда ишлаб бўлмаяпти, бўшатинг, деб. Ҳаммага яхшилик қиласан, бир ёмонлик келса, ёлғиз ўзинг қоласан. Ҳамма ёрдамингни олганлар четга чиқиб, томоша қилиб тураверади”. “Менини жуда кўп, Маҳдижон,—деди Бегалиев

кўнгли юмшаб,— қанчаси битириб кетди, қанчаси ўқияпти, қанчаси, худо менга умр берса, энди келади. Ҳаммамиз ҳам шундай. Мана, Орзимуродов нега ҳар йили ёзда қабул комиссиясига пашшахўрда? Ахрор Маҳмудалига бунча ёпишиб олган? Маҳмудалининг ўзи бунча қалтирайди? Шу хақда бирон марта ўйлаб кўрганимисиз, Маҳдижон? Устингиздан шиша қалпоқни бостириб олиб, менга гард юқмайди, деб умид қиласиз... Менга бунақа жаҳл билан қараманг, ука. Сал кўзингизни каттароқ очинг, демоқчиман. Бояги гапимнинг иккинчи томони, анкетадаги манави рақамлар, "мусбат-манфий"лар шунинг учун ҳам ҳақиқат бўлолмайдики, субъектив томонлар субъектив томонлар тўғрисида чала фикр билдирияпти. Факультет ёмон ахволда эканми, демак, тарбиявий жараён жуда ёмон, демак, талабаларнинг савияси ҳам жуда паст, демак, ўқитувчиларни ҳам талабаларни ҳам биргаликда тозалаш керак. Буни бирдан қилолмайсизлар. Шунча талабга жавоб беролмайдиган ўқитувчини бўшатиш керак бўлса, демак, шунга teng фоизда талабаларнинг ҳам баҳридан ўтиш керак. Уқдингизми — ёмон ишчини ҳайдагандан кейин, унинг брак маҳсулотини ҳам бир бало қилиш керак-ми? Менинг таклифим бундай,— деди Бегалиев кутилмаганда,—ўша шум Абдикулов билан келишинглар-да, ишни ёпди-ёпди қилинглар. Ўзига тушунтиринглар, талабаларни тўпланглар, бир чиқиши қилиб берсин, шошма-шошарлик қилганини тан олсин. Кейин манави коғозларини ўзига беринглар, пишириб ейдими, чалпак қилиб сотадими — ўзи билади. Бунақаларга карши курашганларинг сайин куч олади, охири яхшиликка олиб келмайди. ҳеч қанақа комиссия хуносаси, партмажлис керак

эмас. Маслаҳатим шу" "Бўлмаган ran,—деди Сухроб яна кўтарилиб.— Ишни шу ҳолда қолдирмаймиз. Бу — компромисс йўли!" "Биз кексаларнинг йўли шу, ука,— деди Бегалиев ўрнидан туриб.— Сиз ёшсиз, пешонангиз тошдан, деворга ураверинг, ғайратингиз кўп: ё деворни йиқитасиз, ё пешонани ёрасиз... Энди менга жавоб. Маҳмудали, яна ўн беш кунча кўринолмайман-да — шу ишни битирай". "Бойбўрибий" жуда мутаассир бўлди: "Бош устига, домлажон, лекин бу ерда ўзингиз турмасангиз, шундай оғир кунларда... майли... бу нотинчликлар бир коғозгина мақолага арзиса

эди. Ўралашиб қолдик-да. Сиз бораверинг, домлажон, шундай қиласиз”.

Суннатов иргиб туриб Бегалиевни кузатишга чорланди. “Ахроржон, сизга бир маслаҳат, ука,—деди профессор хона ўртасида бир муддат тўхтаб,—кўп ҳам сувни лойқалатманг, факат ўзингиз эмас, бошқалар ҳам атрофни кўролмай қолади. Майли, сузиб кетаверинг, факат лойқалатмай...” Суннатов қайтиб ўтириди: “Мен лойқалатмаяпман, домла, лойқалатганларни ўзингиз кўролмаяпсиз”, “Ҳай, майли, гапни гапир уққанга, дейилган экан”, деди Бегалиев эшиқдан чиқа туриб.

Бегалиев кетди-ю, шунча гаплашганимиз бир тийинга чиқди, ғурбатимиз қайта бошланди: “Бойбўрибий” анкеталарга тўр тўқиб, тепасида ўтириб олди, Орзимуродов йиғламсиради, Суннатовнинг кўзлари зирк-зирк ўйнади — Сухроб икковимиз уларнинг қай ёғидан айланиб ўтишни билмай, бурилиб қолавердик.

Кейин Сухроб айтади: “Ҳақбердини тушунмаяпман...”

Мен айтаман: “Ҳақбердини биламан...”

Кейин Сухроб айтади: “Мен кетаман...”

Мен айтаман: “Мен кетмайман...”

Одамларни фақат мақсаднинг ўзигина дўст қилолмас экан.

Мен илгари илмга унча ҳам қизиқмайдиган, адабиётнинг тарбиявийми, маърифийми аҳамияти тўғрисида диссертация ёқлаб олиб, энди дарсини латифаю ҳангомалар билан ўтказадиган, мардона гурунгларни қувлаб юрадиган, олдидан чиройли қиз ўтиб қолса, гапираётган гапини унутиб қўядиган Сухробни унча хушламас, ҳатто отини ҳам тилим келишмагандай “Суроб” деб айтар эдим, унинг тантилиги ҳам кўзимга олифталик бўлиб кўринар эди.

Йўқ, у чиндан ҳам ҳалол-танти одам экан: “Ўйлаб кўрсам, шу талабаларнинг субъективлиги рост—бўлмаса, менга ҳам тўқсон иккию тўққиз фоиз “мусбат” қўйишадими? Дарс ўтишим Суннатовницидан ҳеч ҳам авло эмас. Ўзимни яхши кўришса керак-да, а? Жа ноқулай-э!”, деди ва ўн-ўн беш кун ичida “Билим” жамиятидан иш топиб ўтиб кетди. “Кетгим келмаяпти-ю, лекин ўзинг курашган нарсага ўзинг нолойик бўлгандан кейин... кейин, буёғига

“Бойбўрибий” ҳам мени шундай қўйиб қўймаса керак,

обруйим борида этакни ёпганим маъқул. Сизга ўхшаб калласига монографияларим билан туширолмасам...”, деди...

Очиғи уни тўхтатиб қолишга кўп ҳам уринмадим: ғурбатнинг бўёғига ўзи ҳам дош беролмас эди: ё аччиқ устида “Бойбўрибий”ни уриб майиб-сайиб қиласарди, ё... билмадим, ҳарҳолда, у—Ҳақберди эмас эди.

Бунгача ҳам ўзи икки ойга чўзилган машмаша Ҳақбердидан бўлак ҳамманинг силласини қурилган, одамларга бу ишнинг қаёққа, кимнинг фойдасига битиши бари бир бўлиб қолган,— ишқилиб, яқунланиши керак эди..

Аввалига “Бойбўрибий” анкеталарда ёмон “баҳо олган” ўқитувчилардан анчасини Ҳақберди билан Сухробга қарши қайради, тўдани бўлиб ур қабилида иш тутиб, қўлидан келганча мен билан ёвлашишдан қочди (ҳозиргача), биламанки, бундан кейин ҳам (“Маҳдижон, сизни авайлашимиз керак, яқинда ёқлайсиз, факультетимизнинг обрўсига обрў қўшишингизни интизорлик билан кутяпмиз”, деб чап бериб келяпти), Ҳақберди дим-дим ўйнайверди, анкеталардан бошдаёқ олдириб қўйган фотонусхаларини (бермайман, деб юрган одамнинг бирдан қўш кўллаб тутқазганидаёқ шундай қилганини сезган эдим) тегишли жойларга кўтариб боришини шама қилаверди, жанжал қўтарилиб-пасайиб, баримизни ҳоритди, охири яна шу бештамиз: “Бойбўрибий”, Суннатов— мен, Сухроб, тарафматараф қолдик. Орзимуродов ҳам малака оширишимга бир бориб келай, деб кетганича бадар кетди.

Йўлимизни Ҳақбердининг ўзи бойлади: Сухроб иккаламиз анкеталар билан бир танишгандан кейин, қайта кўролмадик: асли Орзимуродовнинг сейфида, “Бойбўрибий”га ишонмай, ўзимиз кулфлаганмиз, энди эгаси думини тутқазмайди, кейин билсак, калитни “бий”га бериб кетган экан; нусхаларини Ҳақберди бермайди, устида қаттиқ ишлайпман, дейди, газетага мақола қиласайпман, дейди, министрликка олиб чиқаман, дейди, олиб чиқсамми, деб турибман, дейди,— дастимизда душманга урадиган қиличнинг ўзи йўқ, қуруқ кўлимизни ўқталиб, аҳмоқ бўлиб юравердик...

Бу орада ўн беш кун кўринмайман, деган Бегалиев ҳам қайтди, яна шунчага жавоб олиб кетди, лекин ора-сира кўриниб, хой, ҳалиям тинчимадингларми, деб кўнгил сўраб турди. Бир марта қўлтиғимдан авайлаб тутиб, сайрга бошлади, у доим ишга пиёда келарди, мен уни кузатиб қўйган бўлдим: “Маҳдижон, деди у жуда-жуда ҳалим овозда,—етмиш тўртга чиқдим. Шу, десангиз, ҳозир калламга ғалати ўй келди. Агар худо инсонга бошқа одамларнинг ҳаётини яшаш имконини берса... Тушуняпсизми? Мана, сизга ҳафта вақт ажратилсада, шу вақтда сиз меининг ўрнимга яшаб кўрсангиз, мен эслайдиган нарсаларни эсласангиз, кўрган-билганларимни ҳис қиласангиз. Ишонаманки, қийналардингиз, лекин ўзингиз учун кўп фойда олардингиз. Мен йиқитган одамларнинг ҳаммаси сизга ўхшаган эди. Уларнинг хатоларини ҳам билардингиз. Ҳай, ана, дейлик, мен уларга ёмонлик қилиганман, улар-чи? Ўзларига ёмонлик қилишмадими? Мени

енгаман, деб қанча ишлари қолиб кетди. Чала адолатпарвар, чала олим бўлиб қолди. Илм аҳлига бир-бири билан курашиб юриш кўп ҳам фойда бермайди. Ким билади дейсиз, шунаقا курашларни Маҳмудали билан Абдиқуловнинг ўзига ташлаб қўйиб, илм билан шуғулланишдан чалғимаслик керакми? Ақлли одамсиз — нима демоқчилигимни тушуняпсиз. Ҳув анавида сизга нотўғри гапирдим. Бекорга куйиб-пишиб юрмагандир, бир мақсади бордир, деб ўйлаган эдим... Декан бўлишни хоҳ-

ламайсиз, амални ёқтиромайсиз, нима қиласиз аралашиб, икковига кўйиб бераверинг. Ҳозир фақат ҳалал беряпсиз. Агар сиз аралашмаганда иккови аллақачон келишиб олган бўларди. Маҳмудали сиздан чўчиди, Абдиқулов сизга орқа қилади. Маҳмудали сизнинг юзингиздан ўтолмайди, Абдиқулов эса... сизни алдайди. Шу жўрангиз, хафа бўлманг-у, соддалигиздан фойдаланяпти. Бошда, анкета сўрови ўтказаман, деб ният қилган пайтдаёқ, Маҳмудалига ўзининг кучи етмаслигини ва албатта сизнинг ўзига қўшилишингизни ўйлаган, аниқ ҳисоб-китоб қилган. Э-э, ука, менинг ёшимга етсангиз, мен кўрган нарсаларни кўрсангиз, одамнинг сири қолмайди. Бу болага факультетдаги аҳволни яхшилашнинг ҳеч қизифи йўқ, ўзи мустаҳкамланиши керак, вассалом! Яхшилаб ўрнашгандан

кейин, ҳаммасини қайтадан бошлайди, Мадҳмудалининг бошига етмай қўймайди. Кейин, ўлмасак, кўрармиз, балки сизни кавлар...— Профессор мени ўзига чиндан ҳам яқин олиб гапиради, мен уни шу пайтгача ёмон кўрганимдан хижолатда эдим.— Бирган айтайми, сизга кулгили туюлар. Ахрор билан Ҳақберди жўрангизнинг бир одам, битта иттифоқдош эканини биласизми? Мана, қаранг, Ҳақберди бошлади, тўғрими, Ахрор эса мой қуиди. Шунча миш-миш, сизнинг деканликка интилишингиз хақидаги бемаъни гаплар қайдан чиқди? Сиз

билмайсиз, мен биламан. Шу иш тинчисин, кейин икковининг оғайни бўлишини кўрасиз. Мен эса ҳозир кўриб турибман... Бу гаплар орамизда қолсин, бошқаларга айтсангиз ҳам майли-ю, ўзингиз биласиз. Лекин ўйлаб кўринг. Мен сизни йўлдан қайтариш учун айтаётганим йўқ...”

Ўшандা ичимда: “Бошимни туёғингиз билан силамай қўя қолинг”, деб заҳарханда қилган эдим, аммо, кейин билдим: профессор сувга қараб гапирган экан...

Бироқ на бу кўпни кўрган профессор, на “Бойбўрибий”, на Ҳақберди, на Суннатов бу ишларнинг қандай якунланишини тўғри топди, мен эса тахминан билардим, кўнглим сезарди, нимадир... бир куч— одамларни ҳаракатга келтирадиган нимадир бир нарса қўзғалганини илғаб юрган эдим, шундай бўлди: умумий мажлисда Ҳақберди ҳамманинг ўртасига чиқиб, хатоларни тан олиб, кечирим сўрагандан кейин, “Бойбўрибий” худога шукр қилиб, энди бемалол ишлашга ўтгандан кейин, улар эсдан чиқариб қўйган, ҳисобга олмаган талабалар, талабалар кутилмаганда бош кўтаришди... Ҳар қалай, энди менга анча осон, илгаригидай куйиб-пишиб юришим шарт эмас, тўғрисини айтмасликка имкон ҳам йўқ, кейин шунча талабанинг кўзига тик

қараб дарс бериш хакида гапирмаса ҳам бўлади... Фақат Ҳақбердига оғир — бир томондан энди топишдим, ўрнашдим деганда Маҳмудали акаси билан Суннатов жўраси ундан яна шубҳада қолди, иккинчи томондан талабалар...

Ҳақберди тўқимоқчи бўлган эртагини охир қилолмади, тўғрироғи,

аслида, унинг эртаги йўқ эди.

Энди бу узоқ гаң, давом этяпти, аниқ бир хулосани ҳозирча айттолмайман.

Бир нарсага ҳайронман...

Ўзи мен кўп нарсаларга ҳайрон бўлиб юраман: бугун Офият манти қиласман, деб хамир ёётганда қара-аб туриб, завқим келди: бир газ тахта, бир газ таёқ билан хамирни шундай юпқа ёйиш йўлини ўйлаб топган инсоннинг ақлига балли-е, дедим, ким биринчи ўйлаб топган шуни, амана, қасқон” деган сўзни

қара, қайдан келган, нима дегани, нимани билдиради, Офият кулиб, очқабсиз-а, деди, қара, дедим, ҳамма сўзнинг маъноси бор, “қасқон”никини билмайман, “очқабсиз”—“очиқибсиз”—“оч қолибсиз”—“оч” сўзидан, лекин “оч” деганининг ўзи нимадан, илгари одам овқат егиси келганини оғзини очиб билдиранми ё овқатга қараб оғзини очишиданми, қизик, мана, одамни ол, исми билан туғилмайди, исм унга кейин қўйилади, тўғрими, мана, мен— Маҳдиман, бошқа исм қўйишлари ҳам мумкин эди-ку, дейлик, хўш ана, Маъруф, Офият, қўйсангизчи, деди, шошма, кулмай тур, Маъруфман, демаяпман-ку, чақалокнинг исми пешанасига ёзиғли бўлмайди. Комронга мен “Мансур” деб от қўяйлик, дедим, сен —“Беҳзод”, охири гувоҳнома обормаса, туғуруқхонадан чиқармаслигини билгандан кейин, шошиб-пишиб “Комрон” деб ёздириб келдим, тасодифан эсимга келиб қолди, энди уни Беҳзод деб кўр — бўлмайди, у энди—Комрон, Беҳзод ҳам эмас, Мансур ҳам эмас, фақат Комрон, исм энди унинг ўзини билдиради, Комрон — унинг товуши, овози, мендан “Маҳди” деган товушни олиб ташла, ҳеч нарса, тушунасанми, ҳеч нарса бўлиб қоламан йўқолиб, чунки, исм —шахсият, Маҳди — менман, Маҳди десанг, кўз олдингга менинг дунём келади, яна Маҳди исмли одамлар бор, лекин улар башқа Маҳди, бошқа дунё, Офият, сиз фақат ўзингизнинг эмас, бизнинг ҳам дунёмизсиз, мениям, шу уч фарзандимнинг ҳам ишонган дунёмизсиз, деди, йўқ, мен бошқа нарсани ту шунтири оқчи

эдим, лекин эзмаланиб кетдим, айтмоқчи эдимки, ҳозир шу Маҳди деган дунё — оч, мунча имиллайсан, ке, ўзим тугишиб

юборай, э-э, буни қара, “тугишиб юборай” “тугишиб юборай”га ўхшаб кетар экан; “тугиш”— “туғиши”, бир-бирига тамом тескари сўзлар, лекин уйқаш, сенинг хиндий тилингда “ларка”—ўғил, “ларки”—қиз, фарқи битта товуш, қайдан пайдо бўлган шу сўзлар, нега уйқаш, яхши ҳам тилшунос эмасман — ҳамманинг энсасини қотириб юборар эканман, лекин ҳар бир одамнинг исми унинг ўзидаяширин...

Ҳайронман бир нарсага: одам нега минг турланади, ҳамкасбинг билан бир йил, икки йил, беш, ўн йил бирга ишлайсан, миридан-сиригача биласан, ичигача кўриб турасан, лекин сенга қараб турланади, кошки турланаётганини билмасанг, лекин турланаверади-турланаверади, бошинг айланиб кетмайди, чунки бирга ишлагандан кейин, энди шундай турланмасак бўлмайди, деб сен ҳам унга қараб турланасан, гўё у сени билмайдигандай...

Мен операни ҳалигача тузукроқ тушунмайман, тўғриси умуман тушунмайман, ҳатто униси бунисини ўлдирмоққа чоғланганини ҳам қўшиқ қилиб айтади; “Хо-озир се-ни су-я-ма-ано-о-о!”, бунисига қараб тураман, ҳозир “Э-э, суйсанг ҳам, одамга ўхшаб гапириб сўй!”, деб жеркиб берар, деб кутаман, қаёқда, буниси ундан ҳам чўзади: “О-о-о—у-у-а-а-а, хо-ом-та-ама-а-а бўй-ўй-ўл-ма-а-а-а!..” Лекин бундан энсам

қотишини ҳеч кимга айтмайман. “Жуда юксак санъат-да шу”, дейман, майли, шунча одам тушунгани етар, битта менинг ақлим етмаса-етмас нимадан қўрқаман, дсмайман—турланолмай қолишдан қўрқаман шекилли...

Баъзан эмас, ҳаммавақт!

“Бойбўрибий”нинг ичи шундоқ кўриниб туради, лекин наҳотки мени унақа одам, деб ўйлайсизлар, мана, қаранг, яхшилаб қаранг, мен ўзи бунақа одамман, деб турланаверади, у ўйнаган нағмага Суннатов ҳам тушади, дунёда раққос кўп, лекин куй битта деб кир баданини устидаги лахтак-лахтак жандалари бекитолмаса ҳам, чиройли кўриняпман, деб бу киши ҳам хиром қиладилар. Орзимуродов бечора шунақа содда шумки, шум деб аташ уни ҳаддан ошиқ улуғлаш бўлади, аммо шу ҳам беўхшов, алпанг-талпанг шох ташлашини

кўймайди — қара-а-аб туриб-туриб зерикасан, охири, зерикиш ҳам жонингга тегиб, хунобинг ошади...

Одамларнинг кўнгли шаффоф, шу қадар шаффофки, ҳатто, ичидаги ҳали ўйланмаган, эртага, бир йил кейин, ўн йил кейин ўйлайдиган ўйларигача кўриниб туради—албатта, зерикасан, “Бойбўрибий” билан Суннатовнинг кўнглини кўриб туриб, ҳар куни кўравериб зерикмай бўладими?!

Баъзан эмас, ҳаммавақт ҳайрон юраман: қочган ҳам, қувлаган ҳам битта—ғолибият қўшигини айтади, “Бойбўрибий”нинг ёнидагилар ҳам умум ишини яхшилаймиз, деб хониш қиласди, биз ҳам умум ишини яхшилаймиз, деб ашулави вараглатамиз, улар ҳам ҳақиқатнинг пардаларига тушяпмиз, дейишади, биз ҳам ҳақиқат куйига ўйнаяпмиз, деймиз — ҳақиқатнинг ўзи қаерда чалиньяпти?

Нега қўшиқ айтиб гаплашамиз, деб ўйлайман, нега тўғри, очик, инсонга ўхшаб гаплашиб ололмаймиз, деб хунобим ошади — турланишдан тўхтаб қоламан.

Яхшигина оти бор бу одамнинг—Маҳмудали, келишган, барваста гавдаси бор, агар турланавермаса, тўхтаб ўзини кўрсатса, худо менга шундай қомат бермаган-да, а, қандай яраширли одам, деб ҳавасланиш мумкин...

Суннатовнинг отини қаранг—Аҳрор, нимасидир, тоза, салқин бир шабада келаётгандай исмидан, отаси китоб кўриб, минг умидлар билан шундай улуғ исм берган, турланмай турса, бу қандоқ мутафаккирнинг доно сиёғи экан деб, тўлқин-т...лқин кумушранг товланган сочининг ўзини соатлаб томоша қилиш мумкин

Яна ўйлайман: аввал ўзингга боқ, балки уларнинг кўнгилларини очишларига ўзим халал бераётгандирман, балки улар ҳам мени шунаقا ёмон деб ўйлашар: қара, Маҳди деган пурмаъно оти бор, кўриниши ҳам бинойидай, аммо ўзи... нега бунча... ҳадеб...

Яна ўйлайман: одамлар ўзлари тўғрисида ҳақиқатни севмайдилар, бошқала...нинг астарини аврасига ағдаришадими, bemalol: нега у бизга ўхшаб биз нима учун курашаяпмиз-у... бу устомон ҳайронмиз, кошки билмасак...

Одамга доим бошпана - бошини бекитиб юриш учун пана жой

керак, фақат уй эмас, одам ўзи яшайдиган торгина мұхитда ҳам муносабатлардан бошпана қуриб олади. Муносабатларни бошга пана қилиб юради, Деб ўйлайман. Яна адашиб кетаман - ўзини ўраб қўйигани одам қандай юради, дейман. Адашганимни ахта-иб кетаётib, бир чегарага бориб қоламан. Би, девор тикланади қаршимда ойнадай, ортимдаги ҳамма нарсани қайтаради, қараб бораман - Офиятни, болаларимни, Исрофилни, Шоди акани, Тангирни, Ҳақбердини, Маҳмудали акани, Сухробни, Суннатовни, Орзимуродовни, Бегалиевни, ҳамкасб, таниш-билиш ҳаммасини қайтаради, мана шу сенинг дунёнг, Маҳди деган дунё шу, Маҳди, дайди, лекин ҳеч нарсани тушунтиrmади, ўзининг ортида нималар бор - кўрсатмайди, мен эсам нариги ёқда сирлар ра-авшан, кундузлар тиник, тунлар ёруғ эканини сезиб тураман, усти узоқдан кўз илғаган шаҳар осмонидай нурланиб-төвланади, мана шу мунаварварлик нимадан эканини англай-англай деганимда, чарчаб қолганимни т-яман-да, кувват олиш учун, яшаш учун орқамга ўгириламан, акснинг аслга ўзимнинг дунёмга - одамлар орасида яшашни севаман - яшаш поклик эканини, умримни тўла яшашим зарурлигини тушуниб қайтаман, узоқ тўхтаб ўйлайман.

Ўйлайман: мен - Маҳди, бошқа одам бўлиб чиқармидим, шу туриш-турмушимда ўзга бир Маҳди отлик бегонанинг ҳаётини яшармидим?

Балки, балки...

Чархнинг каж рафтори ўзгарганда, шундай бўлуви ҳеч ran эмас эди.

Лекин ўзгармади. Шунча тасодифлар силсила-силсила кечиб, қўшилиб-боғланиб, айни шу мени бунёдга келтирдими, демак, бошқача бўлуви мумкин ҳам эмас экан.

Мана, шу мен борман, ўз ҳаётимни яшаяпман— айни шу Маҳдиман.

Баъзан ҳатто шундай ҳам туюлади: Шоди ака деган одам ўтмаган, Тангир деган жўрам бўлмаган, Ҳақберди дегани ўқишда ҳам, ишда ҳам менга

йўлдошлиқ қилмаган, ҳатто факультетдаги ҳамкасларим,

талабалар ҳам аслида йўқ, ҳаммаси—ўзим, ўзимни уларга бўлаклаб, ҳаммасининг умрини яшаяпман: манави бўлагим—Шоди ака, манавиниси—Тангир, анави бўлагим—Маҳмудали ака, анавиниси—Ҳақберди... Мен битта одам эмасман, мен— тумонатман, чаман одамзорман, тўп пулдай турланиб, бу дунёда қандай яшаяпман ўзи, оғайниларим, деб ўйланиб-гуллаб турибман..

"Йил ўтган сайн сизга ўхшаб боряпман,— дейди хотиним Офият.— Нарсаларга худди сиз қарагандай қарайман, сиз ўйлагандай гапираман, сизга ўхшаб ўйлайман...”

"Офият,—дейди ичимдаги ўзини ҳаддан ортиқ яхши кўрадиган Маҳди,—учта боламиз бор, улар бизга ўхшамоқчи; менга ўхшаганинг яхши — уларни битта одам бўлиб тарбиялашимиз керак... Яхши эру хотин — аслида, битта одам...”

"Портретингни чизаман, деб кўп уриндим, — дейди узилиб-узилолмаган дўстим Исрофил. — ғалати бир ниятим бор: сенинг юзингда ўзимни кўрсатмоқчиман. Тушуняпсанми? Шунча йил дўстлик қилганимиздан кейин, сендан менга, мендан сенга кўп нарса ўган, кўнглимида шериклик бор. Мана, иккаламиз бирга туриб ойнага қарайлик... Қара, юзимиз ўхшамайди, лекин қаравшимизда нимадир ўхашашлик, яқин ифодалар бор-а?.. Йўқ, сен яхшилаб қара — изласанг топасан. Мен шундок кўриб турибман-ку, сен кўрмайсан?.. Аммо бу ўхаш ифодалар ҳаракатда эмас, қотиб қолган хотирага айланган. Кейинги йилларда бир-биrimиздан анча узоқлашдик. Мен шу туйфуларни—хотира ифодаларни чизмоқчиман. Лекин юзингда бошқа ифодалар ҳам кўп, кўпи менга бегона, чизишга халал беради...”

Одамлар тағин мени ақлдан озибди, деб ўйламасин, деб атрофимга аланглаб, ҳеч ним йўқлигини кўрганимдан кейин, секин овозда “Маҳди!” деб чақираман — шу чақириғимнинг ўзи жавоб — кўп, жуда кўп одам “Маҳди”, деб жавоб бераётган бўлади: ўзим, отам, иккита бувам, иккита бувим, уларнинг ота-оналари, уларнинг ҳам ота-оналари; Маҳди деган овоз ота илдиз, она илдиздан тубга — ўтмишга қараб тармоқланиб бораверади — бир оломон одамнинг нидоси битта ўзимнинг овозимга жамланади, мисоли улкан бир дарахтнинг тепасидаги бакувват шоҳдай, замонлар шамолида зириллаб турганга

ўхшаб қоламан; жуда чуқурларга, тубсиз-ниҳоясиз қадимларга қўш томир узатганман — юз йил, икки юз йилга... ўн бешинчи асрга, унинчи асрга, биринчи асрга, ундан ҳам бурунларга: ўша пучмоқларда юз-кўзими, қад-бастими менга ўхшаган аждодларимнинг томирида ҳам менинг қоним оққан-ку, томирдан томирга, томирдан томирга ўтиб-ўтиб, охири менга етиб келган, мендан болаларимга берилган бу қон!..

"Махди!" дейман бор овозим билан — минг-минг уруғларим кўплашиб, шу овозни бунёд қилишгандай, тумонатнинг жўр овозидай жаранглаб—мен шу залворли минговозни кўкрагимдан чиқаролмаганимдан отимни танимай юрган эканман, туйкусдан енгил тортаман: кимсасиз, овлоқ бир оролда одам овозига зор турган пайтимда мени ахтариб мададга келган ота-она аждодларим отимни тутиб чақиришаётгандай бўлади...

"Махди!" дейман энтикиб — асқартоғларим — авлодларимни чақириб боряпман, товушим, ўғилларим, қизимнинг овозида қалтираб акс-садо беради — жўралар, уз-ок яшайман!..

Узо-оқ минговозларни эшитяпман ...